

## Parraya Wajalpayi, Jijajmili Wangka

<sup>1</sup> Jiyupulajalurni kulila! Julyjurnangku wakarnu mirlimirlingka, Jijajju-jananya wajarnu, kayila-jananya parra wankalpayi.  
<sup>2</sup> Mirlimirlingka jiingka jilanyarna junu, Jijajju-jananya nintilpayi martukaja. Palunyangka-jananya kanalpayi martu kujupakaja. Palunyajanu Jijajpa marlaku yanu ngarnawarra. Palunyangka kurranu Jijajju-jananya wajarnu yiayarnu palunyamilipurlukakaja, wangka-nintikaja, parraya wajalkuranpa, ngurrapartu ngurrapartu. Jijajpa-jananya ngarnkakutu marlaku yankukijalu nintirnu, palumili warrkamu jungaluya palyalkuraku.  
<sup>3</sup> Jijajpa mitujanu wankarringu. Jiikajangka-jananya yutirringama, palunyamili wangka-nintikajangka. Laltu tayimu-jananya yutirrima wirlarra kujungka. Jijajpaya nyakupayi rawalu yuti. Nyanguya kulirnuya, "Yulta wanka yutirringu, Jijajpa."

Jijajju-jananya nintilpayi yutirringuka, "Yulta Mamalu-nyurranya ngampurrju kanyilku, palumili walyjakaja wulikaja." <sup>4</sup> Jijajmili wangka-nintikajaya nyinapayi. Jijajpa-jananya pakarnu ka-janampa wangkangu, "Mirtanyurra yarra!, majalaya ngaangka, Jarujalumja! Mamalu-nyurrampa yiayalku palunyamili Kuurti, jarrpaku-nyurranya

kurrrurnja, panyanyjunyurra nyinara.  
 Mamalu-nyurranya Kuurti jarrpjunku,  
 ngarnawarrapurlukalu. Jarrpjunkukija  
 jamartapungu七月. <sup>5</sup> Palunyayuru七月  
 Jaanju-jananya jarrpjunkupayi kalyungka.  
 Ngaa-nyurranya Kuurti jarrpjunku, Mamalu.”

*Jijajpa yanu ngarnawarra*

<sup>6</sup> Jijajju-jananya七月 martukaja wajarnu  
 yiyanu, palumili wangka-nintikaja. Yanu-  
 jananyaaya nintilpayi ngurra kujupakarti,  
 kujupakarti. Palujanuya palumili wangka-  
 nintikajaya kujungkarringu, Jijajja. Jijajpaya  
 japiro martulu jiikajalu, “Kuwarri-lampajukun  
 yarnngaku maajarriku?, Juwukajaku?”  
<sup>7</sup> Jijajju-janampa wajarnu, “Yiltarna maaja  
 nyinaku, ngula. Tayimkulara nyaangulaku  
 ngurrpa, Mamawiyajura kuju ninti. Yiltampa-  
 lampa wajarnu Mamalunga. Jilanyaya  
 kulila! <sup>8</sup> Mamamili Kurrurnpa-nyurranya  
 jarrpaku, kayila nyinakunyurra punparrpa.  
 Palunyajanunyurra ngayumili wangka  
 jakurljanu wajalku, ngayujanu. Ngurra  
 kujupa kujupa parlparrijanunyurra parra  
 wajalmalpa, ngurra Juutiyawana, ngurra  
 Jamiriyawana, tawunu Jarujalumuwanalurrju.  
 Parra-jananyanyurra wajalmalpa parlparriwana  
 yapurrapurluka, kayilipurluka, kakarrapurluka,  
 yulparipurluka.”

<sup>9</sup> Palujanu Jijajpa ngarnkakutu ngurrakarti  
 yanu. Yirra nyangamaluya ngarnawarra Jijajja.  
 Yanu yurnturrpuru kayila wiyarringu. Mamalu

katingu palumili ngurrikarti. <sup>10</sup> Yirra nyakupay-iluya palunyangka, kayilapula yutirringu puntu kujarra, Mamamili kulujpa mirtamirtawinti, parnangka. <sup>11</sup> Wajarnu-janampapula, “Kulilaya Kaliliyamartajilu! Wiyanyurra parra ngarama! Jiinga wiya wulu yankuni. Ngulampa, parra ngaraku marlakurriku yankurni. Jiinga yanu yurnturrpuru, kayila marlakurriku yurnturrpuru.”

### *Majayajpaya junu marlakarti*

<sup>12</sup> Ngurra jiengkaya Jiijajmili wangka-nintikaja ngarangu purlingka, Yalipajja. Kumuya marlaku yanu Jarujalumkart. Purli Yalipajpanga Jarujalumja kinti ngarangu. <sup>13</sup> Yanuya jarrpakatingu kaninyjarra mayangka, palunyangka. Ngar-nawarraya tatirnu, kayilaya nyinapayi. Punktukajaya nyinapayi wangkakarra, Piija, Jaanpa, Jayimijpa, Yanturu, Pilapu, Tamajpa, Pajalamu, Maajurru, Jayimij kujupa jirlpi Yalpiyajku kaja. Jayimunjiluta, Juutajpa, palunya jirlpi Jayimikju kaja. <sup>14</sup> Kumuluraya nyinapayi Mamakuraya wangkapayi, ngarnawarrapurlukakuraya. Tujukamuluraya nyinapayi, wangkapayi, Miiri, yipira Jiijajku, tujulurrju. Kumuraya nyinapayi Jiijajku marlangulurrju. Jilanyaya kumurripayi wulu.

<sup>15</sup> Palunyajanuya kujungka wiikingkaya kujungkarringu laltukuyarra, wan yantarta an tuwinti, Jiijajmili walyjakaja. Piijalu-janampa wangkapayi. <sup>16</sup> “Walyjakajaluya kulila! Juulyu Mamakurnulu Kuurtulu wangkangulu Tayipitja. Tayipitju kulirnu mirlimirlingka wakarnu

jilanya, ‘Juutajpa ngula nyinaku warrinyji miturriku. Palunya miturringu. Wiya martu kujupa nyinaku ngurra jiingka. Palunyamili warrkamu kujupalu manku.’ Palunyajanu yulta miturringu kuwarri. Juutajju-jananya yanu wajarnu maajakajangka ngalulkurakuya Jiijajpa, jantulwintilu. <sup>17</sup> Jiijajmili七月 wangka-ninti Juutajpa nyinapayi, kumula Mamakurnu nyin-inpa.” <sup>18</sup> Ngayulurna-nyurrampa Luukju wajarninpa. “Jiikajaluraya maajakajalu maniraya yungu, Juutajju wajanyjanju. Mani jiiwintilu kayila yanu payamunu parna. Parna jiingka miturringu ngarntawinti. Nyuru nyinangu raparrkurringu. <sup>19</sup> Jarujalumumartajiluya jilanya kulirnu wangka walyja wajalpayi, ‘Yakaltama’ Ngayunjula jilanya wajalpayi, ‘Parna jiinya puta, mijikurlu.’

<sup>20</sup> Mamakurnu wangka ngarrinpa, Tayipitju wakarnu七月 jilanya, ‘Palunya miturringu. Wiya martu kujupa nyinaku ngurra jiingka.’ Jirlpi Tayipitju yarrarnu wajarnu, ‘Palunyamili warrkamu kujupalu manku.’ <sup>21-22</sup> Pijjalujanampa yarrarnu wajarnu, “Palunyajanu martu kujupala manku, kumula warrkamurriku. Jiijajmili kumula wangka parra wajalku. Jilanyalurjula parra wajalku Jiijajpa miturringu, kana pakarnu. Purrkalula manku, martu kujupa. Jilanyaya kulila!, martu mankukijalu. Jiijajpawana七月 parra yankupayi, martu palunya. Jaanju-jananya kalyungka tupulyjulpayi martukaja. Palunyangkala kumu parra yankupayi, martu palunya. Jiijajpa yanu ngarnkakutu kumulula yirra nyakupayi, martu palunyalu. Mar-

tula jiiyuru manku. Martulula kumulula parra wajanmalpa, Jijajmili wangka.”

<sup>23</sup> Miitingjaya wangkangu, kayila kujarra martu manu. Jii martu kujarra Juujappa kayila Majayajpa. Martu jii yini yupalwinti, Juujappa, Pajapajpa, Jajajjpa. <sup>24-25</sup> Martu kuju junkuki-jaluya Mama ngarnawarrapurluka japiro nintilkuraku. Jilanyaluraya Mama japiro, “Maaja! Nyuntu-janampan yarnngaku nintipuka. Nyuntulu kulini martukaja wanyjalarrrikijalu. Wanyjalpan kulini nyuntulu? Nganalaju junku? Nintila-lanyaju! Nganalu Juutajku warrkamu manku? Nyuntumili warrkamu junu yanu, kayila palya yanu warukarti.” <sup>26</sup> Purliya marraka ngarlpurrima, kayila Majayajpa winarringu. Jijajmili martukaja kumurringu Majayajpa, kayila jii martukaja tuwalparringu.

## 2

### *Mamamili-jananya Kuurti jarrpangu*

<sup>1</sup> Juwukajaya wantapuru kujungkarripayiya, Pintikajja nyinaraku. Palunyangkaluya kujungkarripayi mayi ngalkura, Mamaya marninypungkuraku. Jilanyaya kujungkarripayi wantapurukamu wantapuru, wulu. Pintikajjaya kujungkarrira nyinapayi. Palunyangkaya Jijajmili walyjakajaya mayangka nyinapayi.

<sup>2</sup> Palunyangkaya ngarnkajantu kulirnu wangalyuru, maya jiiwana wiltu wangkangu.

<sup>3</sup> Waruyuru-jananya yutirringu wulikajangka, katawana. Waru jangiyuru-jananya tilingarangu. <sup>4</sup> Palunyangkaya wangka kujupa

kujupaya wangkapayi. Martu kuju wangkapayi, kujupa. Martu kujupa wangkapayi kujupa. Jilanyaya wangkapayi Mamaku Kuurti-jananya jarrpanyjangka. Kuurtilu-jananya Mamamililu nintirnu, wangkaraku.

<sup>5</sup> Palunyangkaya nyinapayi Jarujalumja Juwukaja, Mamamili walyjakaja. Jiikajaya ngurra kujupajanu, ngurra kujupajanu yankuraluya kujungkarriipayi, Jarujalumja. <sup>6-8</sup> Ngarnkajanuya laltulu kulilpayi wangalyuru, kaya kujungkarriipayi, laltukuyarra. Wangka walyjaya kulira pukurlarriipayi Jiijajmili walyjakajaluya wangkanyjan. Jiikajaluya Juwukajalu kulirnu, “Ngayunkurnu-lampaya wangka walyja wangkani.” Parna kujupajanuya-jananya kulirnuka kuru pakarnu.

Wajalpayi-ngkuya, “Ngayunkurnu-lampaya wangka yulta wangkani. Ngaakajaya Kaliliyamartaji murrarni wangka kujupa wangkani. Yaalula-jananya kulirnin ngayunmili wangka wangkanyjanpaya? <sup>9</sup> Ngayunpala wangka kujupakurlu kujupakurlu, ngurra yarngngajanula. Ngurra jilanyajanu, Pajiya, Mitija, Yilumaja, Mijuputamiya, Juutiya, Kapatujiya, Puntuja, Yayija. <sup>10-11</sup> Ngurra jijanulurru Purijiya, Pampiliya, Yijipi, Ruuman, Kuuriti, Yarapiya. Karlkinpaya Lipiyamartaji. Jii Lipiya parna Jariningka ngamu nyininp. Yarnngalula wangka walyja kulini, Juwukajalukamu, Juwuparnilu. Karlkinpaya Juwuparni Mamaku walyjakaja nyininp.”

Yarrarnu-ngkuya wajalpayi, “Nintirninp-lanyaya Mamaku ngarnawarrapurlukaku.

Palunya-lampa maju nyinin, ngampurrju-lanya kanyirnin.” <sup>12</sup> Palunyangkaraya purtu kulilpayi, “Yaalujanuya wangka kujupa kujupa wangkin?” <sup>13</sup> Karlkiluya-jananya nganarnpungu, Jijajmili walyjakaja. Jilanyaya wajarnu, “Ngaakajaya wama jikinyajana wangka kujupa kujupa wangkin.”

### *Pijalu-jananya nintirnu*

<sup>14</sup> Jijajmili jakurlpurlukakajaya, palumpa wangka-nintikaja kujungka yikipayi. Pijalu-jananya martukajangka wiltulu wajarnu, “Kulilaya Juwukajalu, ngaamartajilulurrju! Yakaluya kulila!” <sup>15</sup> Mirtalaju ngayun wama jikinyajana wangkin, ngaangalaju yaarlipala pakarnu wangkinpa. Jikiraya rukawiyaju turangkarrinpa. <sup>16</sup> Jilanya julyju wajarnu Jawulju Mamamili wangka jakurlpurlukalu.

<sup>17</sup> ‘Mamalurna-jananya ngarnawarra-purlukalu ngula jilanyangku. Ngayulurna-jananya ngayumili Kuurti jarrpjajunku, martu yarngangka. Nyuntunmili kajalukamu yurntaltu parra-jananyaya wajalmalpa, ngayumili wangka. Nyuntunmili yirnalukamu warrinyilurniya kapukurrilmal.

<sup>18</sup> ‘Karlki kujupangkarna-jananya warrkamupurlukangka ngayumili Kuurti jarrpjajunku, yirnakajangka, wantikajangkalurru. Kaya jiikajalu wajalmal ngayumili wangka.

<sup>19</sup> Ngarnkawanarna yalyjirrju kujupa kujupa palyalku. Parnawanalurrjurna kujupa kujupa palyalku. Jurta-ngkuya pungkumal parnanga mijimijirriku. Parnawana

warulurrju kamparra wanalmal. Puyulurrju pakara wanalmal. Jiiyuruya martukajalu nyakula ngurlurrimalpa. Wajalmalpangkuya, “Mama ngarnawarrapurluka maparn yiltaminyirri.”<sup>20</sup> Palu tayimu jirntu mungarriku, ka wirlarra mijimijirriku. Palunyajantu-jananya wumulkuka kuru wajalku, Mama ngarnawarrapurlukalu, martu wulikajangka.<sup>21</sup> Palunyangkayila martukajaluraya japidjapurna wankaya nyinakijalu, Mamalu-jananya wankalku’ Wangka jilanya Jawulju-jananya julyu wajarnu.”

<sup>22</sup> Pijalu-jananya yarrarnu wajarnu, “Yjurilkurnu marlajanukajalula kulila! Mamalu-lanya nintinma Jiijajpa Najarajamartaji, maparn maju. Palunyajantu Jiijajju kujupa kujupa-lanyangku nintilpayi, Mamamililurrjulanya wangka yalyjirru nintilpayi. Jiijajpanga maparnkurlu, Mamamili nyakupayinyurra. Nintilunyurra kulirni.<sup>23</sup> Julyju Mamalu kulirnuka, ka yiyanu Jiijajpa kanyurra pungkura miturntankuraku. Jilanya julyu kulirnu Jiijajpanyurra mankura-jananyanyurra yungku, walyukaja kaya katira wiltijunku, kayila miturntanku. Yiltaya Jiijajpa ngaangka miturntanu.<sup>24</sup> Palunyajantu-jananya wankarnuka manu ngarajunu. Jiijajpanga maaja maju yarnngakulampa mirta mitu wulu ngarringu, paki.<sup>25</sup> Yirna Tayipitju julyju wakarnu Kurayijpanga ngulampanga yutirriku.

“Jilanya wakarnu,

‘Ngayulurna kulirni maaja majurni nyin-inpa, ngampurrjurni kanyirni. Mirtarnajanampa ngurlurriku martu karlkiku, jurtapayiku. Maajalurni palunyalu ngampurrju kanyirni. <sup>26</sup> Palunya wuluyilarna marninypungkula nyinin, pukurlju. Kulirnin-parna ngulampangarna miturrikuka, wankarrikuka wanka nyinamal. <sup>27</sup> Mirtarni maa-jalu junku yanku, wulurna mitu ngarriku, yurnarriku. Wankalkurni ka ngampurrju kanyilkku, nyuntumili warrkamupurluka kun-yjunyu. <sup>28</sup> Nyuntulurnin nintirnuka mitur-rirarna wanka nyinamal. Palunyajanurna pukurlpa nyinaku, nyuntungkarnanta.’”

<sup>29</sup> Pijalu-jananya yarrarnu nintilpayi, “Waly-jakajalurniya kulila! Jungalurna-nyurrranya wa-jarnin. Yirna Tayipitpa yilta miturringu. Palun-yangkaya julyju tuunyjunu pirtingka, kaluya yapu ngarajunu. Kintilu yikini, nyakupayila. <sup>30</sup> Tayipit jii Mamamili wangka jakurlpurluka nyinapayi. Jilanyalu julyju jamartapungu, Ma-malu, ‘Ngulampangarna nyuntumili marlajanu kujurna junku, ka-janampa maaja maju nyinaku, puntu yarnngaku.’” <sup>31</sup> Yarrarnu-jananya Pijalu wajalpayi, “Julyju Tayipitju kulirnu, ngulampanga Mamalu palyalku. Palunyajanu Ku-rayijpa mirlimirlingka wakarnu, ngulampanga mitujanu pakalku. Jilanya wakarnu,

‘Mirta Mamalu junku yanku mitu ngarriku, yurnarriku.’”

<sup>32</sup> Wangka palunyayuru yilta Mamalu wankarnu Jijajpa, mitujanu. Kurululaju nyangu kalajura ninti nyinin. <sup>33</sup> Palunyangayila ngarnawarra

ngarnkakutu yanu. Kalu Mamangka kujungka nyinin, maparn kujuwintipula nyininpa. Mamalura yungu palumili Kuurti. Yungkukijalura julyju jamartapungu.

“Palunyajanuyila Jiijajju-lanyaju Kuurti jar-pajunkunyjangka, palunyangkayila kuwarrila murlpirrpa wangkinpa wangka kujupa kujupa. Mamamili wangkanyurra palya kulirni.  
<sup>34-35</sup> Wangka kujupa Tayipitju wakarnu jilanya, ‘Maaja majulu wajarnu ngayumili maaja, Kurayijpa kujungkapula nyinaraku. Ngayulurnajananya marrkulku nyuntungkamarra, walyukajaluntaya pungkujaku. Palunyakajakujanampan maaja nyinamal.’

Wangka jilanya Tayipitju wakarnu.” Pijjalujananya wajalpayi, “Mirta Tayipitpa ngarnawarra yanu Mamangkalu maaja nyinin, kujupalu Kurayijpa nyinin.” <sup>36</sup> Pijjalujananya martukajangka wajalpayi, “Juwu wulikajalunyurra kulilkura. Yulta Jiijaj palunya Kurayijpa maaja maju-lampa nyininpa. Jiijaj jiinyurra wiltijunu ka miturntanu. Maaja-lampa jilanya junu Mamalu ngarnawarrapurlukalu. Julyju-langku jamartapungu, junkura yankukijalu.” <sup>37</sup> Wangka jilanyaya kulirnuka wirla walykurringu, martukaja.

Pijjamapungka-jananyaya japirnu, Jiijajmili jakurlpurlukakajangka “Walyjakajalunyurra kulirni. Wanyjalmankulaju?” <sup>38</sup> Pijjalu-janampa wajarnu, “Yiwarraya walykuwana jurra kayilaya jungaranyurra Jiijajku nyinama!, kujunguru kujunguru, palunyangka-nyurranyaya kalyungka jarrpajura. Jarrpajunkunyjangkayila

Mamalu walyku manku wirrupungku. Kayila palunyamili Kuurti-nyurranya Mamamili jarrpajunku. <sup>39</sup> Jilanya-nyurranya七月 jamartapungu, Kuurti-nyurranya Mamalu ngarnawarrapurlukalu yungku-nyurranya, nyuntumili kajararrankamu yurntalrarran. Laltu kujupalurru tiwaya nyinanyjan, Mamalu-jananya kujungkanku, ka-jananya palunyamili Kuurti jarrpajunku. Jilanya jarrpajunkukijalu七月 jamartapungu.”

<sup>40</sup> Piijalu-jananya yarrarnu marrkulpayi. Wangka kujupa-jananya wajalpayi. Palujanu wangka jilanya wajalpayi, “Kuwarriya martukajaya puta nyinara wanarnin, ngulampanga-jananya Mamalu pungku. Jilanyangkamarraaya walyku jurra!, karaya Mamaku junga nyinama!” <sup>41</sup> Yarnngakuyarraluya jii Piijakurnu wangka kulirnu, ka-jananyaya kalyungka jarrpajunkupayi. Yarnngakuyarraya Jiijajmili walyja kujungkarringu, jurri jawujun wulikaja. Laltu kujungkaya-jananya kujungkarringu,七月 Jiijajmilikajangka. <sup>42</sup> Palunyangkayilaya-jananya nyinara kulilpayi, Jiijajmili wangkanintikajangka, Jiijajmili jakurlpurlukakajangka. Kujungkaluya mayi ngalkupayi. Kujungkaluya Mama marninypungkula kaya japirakaluya wangkapayi.

### *Jiijajmiliya lalturringu*

<sup>43</sup> Mamalu-jananya Jiijajmili jakurlpurlukakaja nintirnu yalyjirru kujupa kujupaya palyalkuranku. Martu laltuluya-jananya nyakulaka kuru pakalpayi. <sup>44</sup> Jii

Jijajmili walyjakajaya kujungka parra nyinapayi, Mama marninypungkulaka. Kujungkankuya ngaparrku yinyanunga yungkupayi.<sup>45</sup> Jijajmili walyjakajalungaya mayakamu parna, wartakajalurrju jalamanukurakaya mani mankupayi. Kaya-jananya martu karlki kujupa yungkupayi, Jijajmili walyjakaja, mayiparniya nyinanyjan, kulujuparni.<sup>46</sup> Karrpu kujupa karrpu kujupaya kujungkarrira Juwumilingka jaaji majungka. Kaya marninypungkulaya kujungka mayinga ngalkupayi, maya walyjawana. Pukurljuya Mama nyinara marninypungkupayi.<sup>47</sup> Karlkiya-janampa Jarujalumumartaji kulirnuka pukurlarringu nyinapayi. Kulirakaya-jananya karrpuparaku karrpuparaku kujungkarriipayi, puntu laltukuyarranga. Jilanyaya puntu laltukuyarra wankarringu, Jijajmili walyjarringu. Mamalu jilanyarnu-jananya.

### 3

#### *Yirna mukuntu wankarnu*

<sup>1</sup> Pijjakamupula Jaan ruka yanu Jaajikarti, majukarti, Juwukurnukarti. Jiikartiya murrarni Juwukaja ruka yankupayi, Mamangka wangkaraku, ngarnawarrapurlukangka.

<sup>2</sup> Jaajingka jiingka nyinapayi yirna mukuntu. Jiji juku nyinangu mukuntu majurringu. Jaajingka tuwungka nyinapayi. Tuwu jiiya wajalpayi, “Tuwu kunyjunyu.” Jiingkaya katira nyinajunkupayi palumili walyjakajalu, ngajilkuranpa-jananya, maniku. <sup>3</sup> Pijjakamupula

Jaan kurrungkukija jaajingka ngajirnu-pulanya, mukuntulu.

<sup>4-5</sup> Pijjalukamu Jaanjupula nyangu, kalu Pi-ja wangkangu, “Nyawa-linyaju!” Nyangu-pulanya ka kulirnu, “Mayitpirnipula yungku?”

<sup>6</sup> Pijjalura wajarnu, “Maniparnirna jampin-gurnangku ngapilku. Jiijaj Kurayiju Najar-ijmartajilu martu wankani, maparn majulu, palunyangka pakala yarra!” <sup>7</sup> Pijjalu manu mara ka ngarajunu. Kayila palyarringu ka ngarapayi. <sup>8</sup> Mukuntujanu pukurlarringu, ka parra wuurlkalpayi, jaajjaya jarrpangu, yupalpa. Yirna mukuntujanu wuurlkalpayi kaninyjarra, pukurlpa, ka marninypungkupayi Mama, ngarnawarrapurluka. <sup>9-10</sup> Nyanguya kuru pakarnu, pertuya kulirnu, “Yilta ngaa tuwungka nyinapayi, mukuntu.”

### *Jaaji majungka-jananya Pijjalu nintirnu*

<sup>11</sup> Mayangka yawujayiti yirnalu-pulanya mara ngalunma Pijjakamu Jaan, puringka. Puri jiiya martukajalu wajalpayi, “Jalamanku ngurra.” Martukajaluya nyanguka pinirringuka kujungkarringu, martuya palunya nyakuraku.

<sup>12</sup> Pijjalu-jananya wajarnu, “Ngayumili martukajaluya kulila! Nganajanunyurra kuru pakarnu?, mirtanyurra kulinma jilanya! Ngayu kujarraluliju wankarnu ngaa mukuntu martu, yalyjirru. Mirtanyurra kulinma! Mamakulijura junga nyinapayi, palunyangka ngaa wankarringu, paki. Jiijajkurnu maparnjuliju wankarnu.

<sup>13</sup> “Jijajpa Mamaku warrkamupurluka nyinani. Mamalu-lampa junu palunya maaja maju, ngayurtinku. Kulirninparyurra Mamalujananya ngampurrju kanyilpayi julyju, Yipuram, Yajik, Jayikap. Mamalu palunyalu Jijajpa yulta junu-lampa maaja maju. Nyuntunjunyurra manu katingu Jijajpa, yungu-jananyanyurra maajakaja katiraya pungkuraku, mitu. Maa-jangka Payilatja Jijajpa ngarapayi. Payilatjnyurrampa wajarnu yiylkjalu, kanyurra paki wajarnu. <sup>14</sup> Ngaanga Jijajpanga ngurrpa mirta pungu junu martu. Wulu kunyjunyu nyinapayi, Mamaku junga. Martu kujupanyurra yiylkjura wajarnunyurra. Martu palunya puta, pungu junu martu kujupa.

<sup>15</sup> “Payilatjanyurra Jijajpa yarljamulngara, jiilu martu juninpa wanka wulu nyinaranpa. Ngaampanyurra junu, jilanyanyurra wajarnu Jijajpa miturrira. Palujanu Mamalu mitujanu wankarnu. Jijajpa wankalaju nyangu kalajunyurrranya wajarninpa. <sup>16</sup> Yirna ngaa junta kunyjunyurringu, Jijajju maparnju palyamanu. Kunyjunyunyurra nyanginpa, palunyalu kulirnu Jijajpa maparnwinti.”

<sup>17</sup> Jilanya Piijalu-jananya nintilpayi. “Ngayumili martukajaluya kulila! Kulirninparna nyuntunjunyurra Jijajpa miturntarnu kulilparnilu Mamamili. Nyuntunmili maajaluya mirta kulirnu. <sup>18</sup> Julyjuya Mamamili wangka jakurlpurlukalu wajalpayi, Kurayijipayaya pungkuraku. Julyjuya wajaranpa, wangka palunya yiltarringu.

<sup>19</sup> “Palunyajantu puta junkula Mamakuraya junga nyinama!, puta-nyurrampa wirrupungkuraku, murlpirrparanyurra nyinaku. <sup>20</sup> Palunyangka Mamalu marlaku yiylaku palumili-nyurrampa, Jijajpa. Julyju jamartapungu Mamalu Kurayijpa marlaku yankurarni. <sup>21</sup> Mamamili ngurrangka Jijajpa wulu nyinamalpa, Mamalu parnakamu palyamanku. Palu tayimu marlakurni yanku. Jilanya julyjuya wajarnu palumili wangka jakurlpurlukalu.”

<sup>22</sup> Pijalu-jananya yarrarnu wajalpayi, martukajangka, “Yirna Muujajju-jananya julyju wajarnu, ‘Maajalu-nyurrampa ngarnawarrapurlukalu maaja kujupa kurtingku Mamamili wangka jakurlpurluka, nyuntumili ngurra walyjajantu. Ngayurni Muujajpa-nyurrampa kurtingu nintilkura. Ngayuyuru maaja kujupa-nyurrampa ngula kurtingku. Maaja palunya purinyjunyurra kulilkura! <sup>23</sup> Yiipinyurra maaja jii kuliklu junku, Mamamili wangka jakurlpurluka, Mamalu-nyurranya mitu pungku wiylaku, mirtanyurra nyinaku Mamamili walyjakaja.’

<sup>24</sup> “Mamamili wangka jakurlpurlukaluya yarnngalu wajalpayi, julyjulu Kurayijparni yanku, yirna Jamiyuljulurrju. Karlkinkuya wajalpayi wangka jii marlalu. Jilanyaya wajalpayi kuwarri yiltarringu. <sup>25</sup> Julyju-jananya Mamalu jamartapungu, mitunyjanirrikaja kanyilkuraku. Jilanyayuruwa wajalpayi Mamamili wangka jakurlpurlukakajalu. Nyininpanyurra marlajanukaja, mitunyjanirriku palunyakajaku.

Nyuntunpalurrju-nyurranya kanyilku, julyuju-jananya jamartapungu. Mamalu julyju wajarnu mitunyjarripurlukangka Yipuramja, ‘Nyuntumili marlajanu nyinaku. Palunyajamu yarnnga kujuparna-jananya kanyilku ngampurrju. Yarnngakuyarraya pukurlpa nyinaku, nyuntumili marlajanu.’”<sup>26</sup> Piijalu-jananya jilanya wajalpayi martukajangka, “Palunyajamu Mamalu-lampa palumili kaja kurtingu ngayunkarti Juwuka-jakarti kurranyulu, ngayunpala kulira pukurlar-rira. Mamalu witulkijalu kulirnu Jijajmili wangkanyurra kulilku, walykunyurra junkura kanyurra junga nyinara Mamaku.”

## 4

### *Kuutja-jananyapula      Piijakamu      Jaanpa wangkangu*

<sup>1</sup> Piijalukamu Jaanju martukaja-jananyapula nintijulpai, karlkinpa-jananyaya yanu jarrpangu yatilykajakamu Jaajmili maajakaja, maaja kujupalurrju. Maaja jiilu-jananya kanyilpayi, jantulwintikaja.

<sup>2</sup>

Kulirnuka-pulampaya wirrilyirringu Piijakukamu Jaanku, jumajipula jilanya wajarnu, “Mamalu Jijajpa wankarnu mitujanu, palunyajamu ngayunpalurrjula miturrikaka wankarriku.”

<sup>3-4</sup> Martu yarnngalu-pulanyaya wangka kulirnu, yiltaya Jijajpa Mamakurnu kulirnu. “Jijajkulara junga nyinara!” jilanyaya kulirnu Jijajmili walyjakajalu. Kujungkarringu-jananyaya nyinapayi yarnnga kujupa, Jijajmili walyjakajangka. Julyjuya Jijajmili

walyjakajarringu. Yarnngakuyarraya Jijajmili walyja nyinapayi, payip jawujun, jiingka tawun Jarujalumja.

Pijjakamu Jaanpa-pulanyaya manu katingu jiilkarti, jiikajalu yatilykajalu, Jaajmili maajakajalu. Mungajarrapula nyinangu yungun pakarnu. <sup>5-6</sup> Ngurra jiingka Jarujalumungkaya yungunpa kujungkarringu, Juwuku-janampaya maajakaja, yirnakaja, Muujajmili wangkapurlukakajalurrju, martu kujupakajalurrju. Maaja yatily kujarrapula kujungkarringu, Yanajpkamu Kayapajpa. Walyja-pulampaya nyinangu, Jaan Yalikijantalurrju. <sup>7</sup> Kujarra-pulanyaya witurnu yiayarnu yankura-pulanya Pijjakamu Jaan mankura katira. Katingu-pulanya ngarajunu miitingja. Maajalu-pulanya japiro, “Wanyjalupulan mukuntu kunyjunyunu? Nganakurnu maparnwintilu?” <sup>8</sup> Mamamili Kurrrunpalu Pijjangka jarrpangu. Mirtajanampa ngurlurringu murlpirrpa ngarangu.

Pija Jilanya wangkangu, “Maajakajaluya kulila!, yirnakajalulurrju. <sup>9</sup> Japiro linyajuyan yirna mukuntu kunyjunyurrinya. <sup>10</sup> Kulilkuranyurra Juwu yarnngalulurrju! Mukuntu ngaa kunyjunyu ngarinpa, Jijajkurnu maparnjanu. Julyjunyurra wajarnu katira wiltijunkula miturntara, Jijajpa Najarajamartaji. Jijajpa mitujanu wankarnu Mamalu. <sup>11</sup> Julyju mitunyjarripurlukalu wakarnu wangka Mamamili, Jijajpa maaja nyinamalpa. Jilanya wakarnu,

‘Puntuparakuluya puri palyalku warta wiltu warta kujarrangka ngarnawarra ngarrijunku. Warta wiltu jiinyaya mankura wirrupungku puta karalku. Mamalu warta wiltu palunya manu palyarnu puri. Palunyangkala nyangu yakarringu, yalyjirru warta palunya mankula ngarnawarra ngarrijunu. Ngurra palyayila ngarangu. Warta wiltu wululu yikiku. Jii-jpa paluyuru warta wiltuyuru wulu nyinaku, maaja maju-lampa.’”

<sup>12</sup> Pijalu-jananya yarrarnu wajalpayi, “Jijajjuwiyaju martuku puta maninpa, wirrupungkula kunyjunyuni. Kujupalu paki putajanu kunyjunyunku. Mirta Mamalu wajarnu kujupa puta mankuraku.”

<sup>13</sup> Maajakajaluya purtu kulirnu, “Yaalupula nintipuka wangkinpa? Mamamili wangkapula murlpirrpa wangkin, nintipurlukapula. Mirtapula kuulja jarrpangu nintirringu.” Marlaluya kulirnu, “Jijajju-pulanya nintirnu. Jijajku walyjapula nyinapayi.” <sup>14</sup> Maajakajaluya purtu kulirnu japilkija, kaya yaka nyinama, jumaji mukuntuya nyangu, kunyjunyu ngarapayi. Kujungkaya ngarapayi Pijakamu Jaan ka mukuntuyila. <sup>15</sup> Palunyangka-jananyaya wajarnu mawu yankuraya yitiwana ngarakura, jumajiya wangka kuliljaku, Pijamapulu.

Maajakajalu-ngkuya japirnu,  
<sup>16</sup> “Wanyjalmalkula-pulanya jii kujarra? Yarnngaya ninti, jii kujarralupula wankarnu jii mukuntujuanu, maparnwintilu. Wiyalajananya wajalku martukajangka jii kujarrapula puta. <sup>17</sup> Jijajkurnu wangka martu karlkinjuya

tiwajanuluuya kuliljaku, wiyapula jii kujarralu parra wajalkura.”<sup>18</sup> Palunyajanu-pulanyaya katingu ngarajunu, maajakajangka. Wajarnupulanyaya, “Mirtapulan wangka katima, ka parra wajanma!, Jijajkurnu wangka, laltungka.”

<sup>19</sup> Pijjalupula Jaanju wajarnu, “Ngananyurra kulirni, nyuntunju? Wanyjalpa Mama ngarnawarrapurluka pukurlarriku? Mayitpiliju nyuntumili wangkaliju kulira palyalku. Mayitpi jiiku pukurlarriku Mama? Mayitpiliju Mamamili wangka kulira palyalku. Mayitpi jiiku Mama pukurlarriku? Kuranjunyurra kulilkura.

<sup>20</sup> Wiyaliju yaka nyinaku, jumaji nyanguliju Jijajpa, palumili wangka murlpirrpa.”

<sup>21</sup> Kulirnukaya wirrilyirringu ka-pulanyaya wajarnu, “Wyanpula Jijajmili wangka parra wajanmalpa, jurrapula!” Wajarnupulanyaya yiayarnu, pertuya kulirnuka, jiilja-pulanyaya jarrpajulkija, martuluya-jananya warrkiljaku. Martu laltuya jiiku mukuntujanuku pukurlarringu, kaya Mama ngarnawarrapurluka, marninypungu. <sup>22</sup> Yirna jii mukuntu nyinapayi puutiyi yiya, rawa.

### *Mamaraya japiro, murlpirrpa nyinaraku*

<sup>23</sup> Pijjakamu Jaanpapula palujanu pakarnu yanu. Yanupula Jijajmili martukajangka wajarnu, maajakajalu-pulanyaya warrkirnu, mirtapula Jijajmili wangka parra wajalkura. <sup>24</sup> Kulirnuya ngurlurringu kaya Mamangkaluya wangkangu jilanya, “Maaja-lampajukun maju nyuntu. Palyarnun warrarnpa parlparri, ka kukakamu mayilurrju, parnakamu ngarnka.

Yilta nyuntu Maaja maju, murlpirrpa nyininipa.  
<sup>25-26</sup> Julyju nyuntumili wangka wakarnu mitunyjarripurlukalu Tayipitju, nyuntumili Kuurtilu nintirnu. Jilanya nyuntumililu warrkamupurlukalu wakarnu,

'Ngurra kujungkaya laltu kujungkarringu, maajakaja jurtakija, Mamaku ngarnawarra-purlukaku, palumili Kurayijkulurru. Kurayijpa jiinya Mamalu julyju jamartapungu, yiylalkija. Mirta-pulampaya jii kujarraku wirri-lyirrikura, Mamaku ngurrpakaja. Mirta Kurayijpaya minyilpa kulilkura.'

<sup>27</sup> Yarrarnuluya wangkangu Jijajmili walyjakaja, Mamangka, "Kujungkarringu-pulanyaya ngurra Jarujalumungka, ngaangka, Yirutkamu Payilatja, Juwukajakamu Juwuparnilurru. Kujungkarringuukaya wangkangu Jijajpa mitu pungkuraku. Jijajpa jiinya nyuntumili kunyjunyu, nyuntumili warrkamupurluka. Mamalun julyju jamartapungu jii Kurayijpa yiylalkijan. <sup>28</sup> Julyju nyuntulun walyjalu kulilpayi, Kurayijpaya wiltijura miturntankura, ka nyuntulu kulirnu marlaku wankalkura. Jilanyalun kulira pukurlarriipayi. Jilanyaya yilta palunya kujungkarringu Kurayijpa pungkukijalu <sup>29</sup> Ngaa kujarrangka-pulanyaya marrkurnu, mirtapula Jijajmili wangka wajalkuran laltungka. Mama, kulinmalyaju! Murlpirrmala-lanyaju!, nyuntumiliku wangkakulaju wajalkuran nyurilu, nyuntumili warrkamupurlukalu. <sup>30</sup> Murlpirrmala-lanyaju!, yalyjirrjulaju wankalkuran, kujupa kujupalurru nintilkuran, Jijajmililu maparnju."

31 Mamangkaluya wangkangu, ka maya yurriyurirringu, palumili Kuurti-jananya jarrpangu. Palujanuya Mamamili wangka parra wajalpayi, murlpirrwintilu.

*Ngaparrju-ngkuya yungkupayi, Jijajmilikajalu*

32 Jijajku walyjakajaraya Mamaku murlpirrpa nyinapayi, yilta. Mirta-ngkuya jurtarringkupayi, kunyjunyu-ngkuya nyinapayi. Mirtaya mikujaka nyinapayi paki, yungkupayi-ngkuya yirnilu, wartakaja, mayikajalurrju. 33 Jijajmili jakurlpurlukaluya murlpirrju parra wajalpayi. Jilanyaya wajalpayi, “Jijajpa yiltangulyu mitujuanu wankarringu, kurululaju nyangu.” Mamalu-jananya wulikaja murlpirrmanu, kunyjunyuya nyinaraku, kujungka. 34-35 Jijajmili walyjakajaluya mayakamu parna, wartalurru jalamanunirra ka maniya-jananya yungkupayi, Jijajmili jakurlpurlukaja. Kayila maniya-jananya kangkura yungkupayi, kujunkujunpa, mirrkaku, wartakulurrju. Palunyajanu mirtaya karlkinpa maral nyinapayi, paki. Yungkupayiyananya karlkinpa maralpa. 36-37 Jiingka nyinapayi yirna Juujappa. Parnangku jalamanu ka mani-jananya kangu yungu, Jijajmili jakurlpurlukakajangka. Juujappa jii Jayipurijmartaji, mitu palumili Lipayi七月 nyinapayi. Jijajmili jakurlpurlukaluya yini wajalpayi, ‘Panapaj’. Yini palu ngayunjula wajani, ‘Pukurlmalpayi.’

## 5

*Yananayajukamu Japaralu kajarnu*

<sup>1</sup> Nyupararralupula parna kanyilpayi walyja, Yananayajjukamu Japaralu. Palunyapula parna jalamanu. <sup>2</sup> Yirna palunyalu mani manuka karlki kanyirnu, karlki-jananya katingu yungu Jijajmili wangka-nintikaja, Jijajmili jakurlpurlukakaja. Wanti palunya ninti nyinapayi yirnalura ngarranpungu yungu karlki. <sup>3</sup> Pijjalulu wajarnu, “Yananayaj! Kulila! Malpuku maajalunta muunpungu, manin karlki ngarranpungkula kanyilkuraku. Kuliran junkungara. Mirtarnin ngayungkawiyaju kajarnin, Mamamili Kurrurnjalurrjulun kajarnin. Manin karlki kukujunu kanyirninpa, parna jalamanuka. <sup>4</sup> Parnangku nyuntuku yilta nyinangu. Jalamanun parna ka mani manu. Maningku jiinya nyuntuku walyja ngarripayi. Nyaakun jilanyalu lurrparnu? Wajalngararnin karlkin mani ngarranpungu. Pakirnin kajarnu mirta ngayungkawiyaju Mamangkalurrjulun kajarnu, ngarnawarrapurlukangka.” <sup>5</sup> Yananayajju jampa wangka jiinya kulirnu punkarnu miturringu. Jampaya yarnngalu kulirnu Yananayaj punkarnu miturrinya ngurlurringuminyirriya. Mamalu maparn majulu miturntanu.

<sup>6</sup> Yangupalakajaluya wararringka miturrinya murljirnu katingu tuunyjunu. <sup>7</sup> Wanti pukurramili ngurrrpajaru-jananya yanu yikipayi, Pijjamalungka. <sup>8</sup> Pijjalulu japiro, “Kaji mani ngaa wulikaja parnanpula jalamanujajanu?” <sup>9</sup> Palunyangkulu wantilu wajarnu, “Yuu mani ngarrinpa wulikaja.” Pijjalulu wajarnu wantingka, “Mamamili Kurrurnjanpula kajarnu, lurrpalparnilunpula junkungara.

Yangupalakajaya kuwarri marlakurriku, nyuntumiliya nyupa kangu tuunyjunu. Kantaya nyuntu kangku tuunyjunku.”<sup>10</sup> Ka jampa jii wangka kulirnu wantilu, ka jiingkalyu punkarnu miturringu. Yangupala jiikajaluya marlakurringu nyangu mitu, ka manu katingu tuunyjunu.<sup>11</sup> Jijajmili walyjakajaluya kulirnu, ka karlkilurrjuya yarnnga ngurlurringuminyirri, “Mamalu-pulanya pungu.”

### *Nintirnuya-jananya yalyjirrju*

<sup>12</sup> Palunyajanuya-jananya yalyjirrju kujupa kujupalu nintijulpayi wankalpayi, wangkanintikajalu, Jijajmili jakurlpurlukakajalu. Jijajmili walyjakajaya rawa wumurripayi, jaajingka majungka Juwumilingka, yawujayiti puringka. Puri palunyaya wajalpayi, “Jalamanku ngurra”, martukajalu.<sup>13</sup> Jarujalummartajiya ngurlurringu Jijajmilikajangkamarra. Jiimartajiluya karlkilu kulilpayi, “Jijajmili walyjakajaya palya nyininp.” Karlkiya-jananya jiimartaji wumurripayi, yirnakamu wantikaja.<sup>14</sup> Palukajaraya ngurrpa nyinapayi. Kulirnuya Jijajmili wangka, kaya-jananya walyjarringu.

<sup>15</sup> Jijajmili jakurlpurlukakajalu-jananyaya kujupa kujupa wankalpayi, martukaja. Palunyajanuya karlkinju-jananyaya ngarntakaja ngarri-junkupayi, pulanykartingka, ruutuwati. Kulilpayiya Piija wati yankunyjangka, palumili purilu wankalku-jananya.<sup>16</sup> Martu yarnngarniya ngurra kujupa kujupajantu yankupayi Jarujalumkarti. Katipayirningku-jananyaya ngarntakaja. Karlkinpaya yulta ngarnta, karlkinpaya

malpujanu ngarnta. Jiingka-jananyaya yarnnga wankarnu, Jiijajmilikajalu.

*Jiijajmili jakurlpurlukaya-jananya manu katingu*

<sup>17</sup> Yatilypa maju, palumili walyjakajalurrujuya-janampa wirrilyirringu, Jiijajmili jakurlpurlukakajaku. Yatilypa jiimapuya nyinapayi, Jaajmili maajakaja. <sup>18</sup> Jiikajaluya-jananya manu katingu jiilja junu, Jiijajmili jakurlpurlukakaja. <sup>19</sup> Mungangka Mamamili wikarru pakarnu kiitu wupuntamunu-janampa. Winirnu-jananya katingu yawujayiti junu. <sup>20</sup> Wajarnu-janampa, yankuraya majukarti jaajikarti, martukaja-jananyaya nintilkuraku, Jiijajmili wangkaya kulira nintirrira, ka wanka nyinara. <sup>21</sup> Kulirnuya mungangka yanu jaajkarti. Yungun pakarnuya jarrpangu jaajingka, nintilpayi-jananya martukaja. Yatilypa maju nyinapayi ngurrpa, mirta-jananya kulirnu, Jiijajmili jakurlpurlukakajaya pakarnu jiiljanu. Yatily majuluya-jananya wumurnu, palumili walyjakaja, maajakaja, Juwukaja. Wumurringuya nyinapayi. Wajarnuya-jananya yiayarnu, warrkamupurlukakaja, yupalpa, jiilkarti. Wajarnu-jananyaya Jiijajmili jakurlpurlukakaja mankura kangkurarni-jananyaya.

<sup>22</sup> Jiilkartiya yanu jarrpangu, purtu-janampaya ngurriirnu. Palunyajanuya marlaku yanu jilanya-janampa wajarnu, maajakaja, <sup>23</sup> “Jiilkartilaju yanu nyangulaju kiitu jatamapu. Jantulwintikajaya yikipayi. Kalaju

wupunamunu kiitpa nyangulaju-janampa, paki. Palunyakajaya yanu.”<sup>24</sup> Maajakajaluya purtu kulirnu, jantulwintikajaku maajalurrju. Purtuya kulirnu, ka-ngkuya japirnu, “Wanyjalarringuya?”<sup>25</sup> Martulu kujulu yanu-jananya wajarnu, “Kulilaya! Jiikajaya nyinapayi jiilja. Kuwarriya nyininpa majungka jaajingka, nintini-jananyaya.”<sup>26</sup> Jantulwintikajaya yanuya jaajikarti, maajalurrju. Pukunyu-jananyaya manu katingu, maajakajakarti, Jijajmili jakurlpurlukakaja. Pukunyu-jananyaya manu katingu, martu yarngangkamarra, wirrilyirriraya yungkaljakungkamarra-jananyaya, purliwintilu.<sup>27</sup> Katinguya-jananya yikijunu, maajakajangka.

Yatily majulu-jananya warrkirnu,  
<sup>28</sup> “Julyjulaju-nyurrranya wajarnu, mirtayan wajalkuran Jijajmili wangka. Wangkayan kulirnu junu, Jarujalumwana nyuriluyan wajalpayi. Wangka jilanyalurrijyan wajalpayi, ‘Yatilymapuluya Jijajpa pungu.’ Mirtalaju jilanyanu.”<sup>29</sup> Palunyangka Pijjamapuluya wajarnu jilanya, “Nyinakulajura junga Mamaku, ngarnawarrapurlukaku, mirtalaju kulilku martu karlkinja.”<sup>30</sup> Mamalu-jananya kanyilpayi mitunyjarrikaja. Jii lu maparn majuwintilu Jijajpa wankarnu, mitujanu. Jijajpanyurra nyunturtinju wajarnu wiltijunkura wartangka miturrira.

<sup>31</sup> “Palunyajanu Mamalu wankarnu, kalaampa junu maaja maju. Kujungkapula nyininpa Jijajkamu Mama. Jijajju-lanya mankura walykukaja warningkuni, ka-

lanya wankani. Mamalu Jijajpa junu Juwukajaku-lampa, ngayurtinjula kulira walyku junkuraku, kalara Mamaku nyinara, junga.<sup>32</sup> Jijajpa yilta wankarringu mitujanu. Nyangulaju kalaju-nyurranya jakurljuninpa. Mamamili Kuurttilulurru nyanguka kulini. Mamalu jarrpajuninpa Kuurti martukajangka, jampala Mamamili wangka jungalu kuliklu.”<sup>33</sup> Wangkaya kulirnu kaya wirrilyirringu, maajakaja. Kaya wajarnu Jijajmili jakurlpurlukakajangka-jananya pungkuraku mitu.<sup>34</sup> Kujulu maajalu wajarnu, katira-jananya, junkura yawujayiti, Jijajmili jakurlpurlukakaja, mirtaya wangka kulilkura maajamili. Maaja palu yini Kamiliyal, Juwuku nyinapayi nintipuka. Maaja jiilu-jananya nintilpayi, Muujajku wangka. Kaya wajarnu martukajalu, palunyanga maaja palya.

<sup>35</sup> Palulu-jananya wajarnu, “Walyjakajaluya kulila!, Yijurilmili marlajanukajalu. Mirtanyurra ngarrutalu wajala jiikaja-jananya pungkura, mitu!<sup>36</sup> Nyukurni nyinapayi Jatiyajpa, nintiluyan kulirni. Jilanya-jananya wajalpayi, martukajangka, ‘Maajarna maju nyininpa, kulilkurarniyan.’ Laltuluya kulilpayi kaya wanarnu, ngapilu?, puu yantartakajalu. Palunya kuju-palu pungu mitu. Palunyangkaluraya yanu, mirtaluya kujungka nyinapayi.<sup>37</sup> Palunyayuru-janampa kujupa Juutajpa nyinapayi, Kaliliya-martaji. Martu laltuku-janampa maaja majurringu. Julyjuya kapamankajaluya mirlimirlingka wakarnu, martu yini. Palunya tayimu Juutajpa-janampa maaja majurringu. Palunya tayimu

marturaya laltu kujungkarrira nyinapayi. Palunyayuru kujupalu mitu pungu. Palunyajanuluraya yanu wiyarringu. Jumajiya Jijajpa julyu pungu, palujanuya martukaja palumilikaja pakirrikunirra.

<sup>38</sup> “Palunyangkala-jananya Jijajmili jakurlurluka mirta wajalku pungkuraku. Yiyalaya-jananya! Mayitiya walyjalu Mamamili wangka kulirninpa, pakiwanalu. Jii pakiwanaya parra wajarninpa. Palunyangaya mirta martulu kulilku, jumaji martukurnu wangka. Palunyajanuya Jijajmili wiyarriku. <sup>39</sup> Jampa palukajaluya Mamakurnu wangka nintini, purtula-jananya mitu pungku, jumajiya laltu kujupaluya Mamamili wangka nintinmalpa. Mamalu-jananya ngampurrju kanyilku, mayiti Mamakuranyurra jurtarrinpa. Yumurringuluya maajakajalunga kulirnu.”

<sup>40</sup> Yiyarnuya-jananya warrkamupurlukakaja, yankulaya Jijajmili jakurlurlukakaja mankuraya-jananya katirarni. Katinguya-jananya ngarajunu. Palunyangkaya-jananya wiipukurlulu pungkupayi. Marrkurnuya-jananya mirtaya Jijajmili wangkaya wajalkuranpa, kaya-jananya yiayarnu. <sup>41</sup> Pukurlarringuya, yanu jumaji Jijajkuraya junga ngarangu. Kulirnuya, “Mama-lampa pukurlarrin, jumajila Jijajmili nyininpa. Julyjuya Jijajpa pungkupayi, palunyayuru-lanyajuya kuwarri pungkupayi. palunyangkamarra-langkuya pungkupayi.” <sup>42</sup> Nyuriluya-jananya Juwuku jaajingka majungka jarrpara nintilpayi. Jijajmili walyjakajangkalurrjuya-jananya mayawana

jarrpara nintilpayi, wangka kunyjunyu, Jiijajmili. Nintilpayiya-jananya “Yilta Jiijajpa nyinin, Kurayijpa, Mamalu-jananya julyju jamartapungu, yiyalkura.”

## 6

### *Martuya japan wulikaja junu*

<sup>1</sup> Jiijajmiliya lalturrira nyinangu. Jaajipurlukaluya-jananya karrpuparaku karrpuparaku wululu yungkupayi, mayiya payamura ngalkuraku, wanti yirnaparnilu. Karlkiya-janampa wirrilyirringu, Kiriki wangkawinti, Yipuru wangkawintiku. Kiriki wangkawintuya jilanya wajarnu, “Ngayurtinkurnu-lampaya mani julijuli ngarranpungkula yunginpaya-jananya wanti yirnaparni. Wanti yirnaparnikaja kujupaya-jananya Yipuru wangkawinti mani maju yunginpa.” <sup>2</sup> Palunyangkaya-jananya mirrangu kujungkanu wulikaja, Jiijajmili jakurlpurlukakajalu, tuwal wulikajalu.

Jilanyaya-jananya wajalpayi, “Ngayunjulaju-nyurrranya Mamamili wangka nintirninpa, mirtalaju jii warrkamu junku, manilaju-jananya jii wanti yirnaparni yungkukija.

<sup>3</sup> Palunyangkamarranyurra-jananya martu japan wulikaja manku, wanti yirnaparniya-jananya ngampurrju kanyilkuran. Palun-yakajangaya Mamaku nintipukakaja manku-jananyanyurra, Mamamili Kuurtiwinti,

Mamakuraya murlpirrpa. <sup>4</sup> Palunyangkalaju-nyurranya Mamamili wangka nintilmal, Mamalajura japidmal.”

<sup>5</sup> Laltuluya kulirnu pukurlarringu. Yintarnuya-jananya manu martu japan wulikaja, Tiipan. Jii Mamakura punparrju nyinangu, Mamamili Kuurtiwinti. Martu kujupanga Pilapunga, Purukuruja, Nikanu, Timun, Paminaj, Nikulaj jii Yantiyukamartaji, Juwuparni. Juwuyurulu palunyalu marninypungkula nyinapayi, Mama. <sup>6</sup> Palunyangkaya-jananya manu katingu ngarajunu, Jijajmili jakurlpurlukangka, wangka-nintikajangka. Maraya-jananya katangka junukaya Mamaraya japidnu, maaja-jananyaya junkukija. <sup>7</sup> Palunyajanuya martu yarnngakuyarrau Mamamili wangka kulirnuka Jijajmili walyjarringu nyinapayi, Jarujalumungka. Yatilykajalulurrjuya kulirnuka lalturringuka, Jijajmilirringu kaya nyinapayi.

### *Tiipanpaya katingu ngarajunu*

<sup>8</sup> Tiipanju-jananya yalyjirru kujupa kujupa nintilpayi, ngarntalurrju-jananya yalyjirru wankalpayi, jumaji Mamalunga murlpirrmara kanyilpayi. <sup>9</sup> Martu karlkinjuya Tiipanpanga ngaparrpungkula warrkilpayi, Juwuku jaajipurlukaluya. Jaaji-janampa palunyanga yininga, “Ngaakajala warrkamurrira mani mancupayi. Ngurra ngaa-lampa.” Jaaji palunyangkangaya kujungkarriipayi, Juwukaja Jarinimartaji, Yalikijantaramartajilurrju. Jiimartaji karlkiya-jananya kujungkarringu

Juwukaja, Jilijiyamartajikamu Yayijamartaji. Jilanyaluya kujungkarringu ka Tiipanja ngaparrpungkulaya warrkilpayi. <sup>10</sup> Mamakurnu Kuurtilu jarrpangu ka murlpirrmanu, Tiipantu-jananya ngaparrpungu, jananya junga wajarnu. Karaya pertu kulirnu ngaparrpungkulaluya wajalkura. <sup>11</sup> Palunyajanuraya Tiipanku wirrilyirringu. Kaya-jananya karlki kujupa mani yungu, kaya-jananya karlki kujupangka parra paki jakurljunkupayi.

Jilanyaluya-jananya kajalpayi, “Kulirnulaju Tiipantu Mama ngarnawarrapurlukakamu mitunyjarripurluka Muujajpa nganarnpungupulanya.” <sup>12</sup> Jilanyaya wangka paki kulirnuka wirrilyirringuraya martukaja, yirnakaja, Muujajmili wangkapurlukakajalurrju. Tiipanpaya yanu winirnu katingu ngarajunu, maajakajangka. <sup>13</sup> Mirranguya-janampa kaya paki kajalpayi-jananyaya. Jilanyaluya-jananya wangka wajalpayi, “Martu ngaalu mitunyjarripurlukakurnu Muujajkurnu wangka nganarnpungkupayi. Jaaji majulampa kaarlzungkula wiylakura, wajalpayi.” <sup>14</sup> Kulirnulaju jilanya wajarnu. “Jijajju jaaji maju kaarlzungkula wiylaku, Najarajamartajilu. Muujajju-lampa jii luwu yungu, Jijajju-lampa jiilu kaarlzungku, ka-lampa luwu kujupa ngarajunku.” <sup>15</sup> Ka maajakajaluya nyangu Tiipanmili ngumpa kujuparringu, Mamakurnu wikarryuyururringu.

## 7

*Tiipanju-jananya nintilpayi, maajakajangka*

<sup>1</sup> Yatilyparaku-janampa maaja maju nyinapayi. Jiilulu Tiipanja japiro, “Wangka jungaya jakurljuninpa?” <sup>2</sup> Tiipanju-janampa jilanya wajarnu, “Walyjakajalurniya kulila!, yirnakajalulurrju. Mama ngarnawarrapurluka maparn maju nyininpa. Mitungka-lampalura Yipuramja julyju yutirringu, palunyanga Yipurampa parna Mijuputamiyangka nyinapayi. Palunyajanu yankula nyinapayi, tawunu Yaranja. <sup>3</sup> Yutirringukalu jilanyara wajarnu, ‘Nyuntunmili ngurra walyjakamu walyjakajalurrju junkun yanku. Yankun ngurra kujupakutu. Katikurnanta nintilku ngurra palunyanga.’ <sup>4</sup> Palunyajanuyila Yipurampanga yanu tawunu Yarankarti, ngurra walyja junu yanuka. Nyinangu mamangayilara jiingkalyu wiyarringu. Palunyajanuyila Mama ngarnawarrapurlukalu wajarnu yiayarnu, ngurra ngaakutu. Ngurra ngaangkala nyinin. Yipurampa yanu ngurra ngaangka nyinapayi.

<sup>5</sup> “Palunyajanu mirtara Mamalu parna yungu walyjalu kanyilkuranku, paki, ngurra kujupakurnungka nyinapayi. Palunyangka Mamalulu jamartapungu ngulampara parnanga yungkukijalu, palunyamili marlajanukajaluraya kanyilkura. Jilanyara Mamalu wajarnu, jampa Yipurampa jijiparni nyinapayi. <sup>6</sup> Yipuramjalu Mamalu yarrarnu wajarnu, ‘Nyuntumili marlajanukaja ngulangaya parna kujupawana nyinamal. Parna jiinga-janampa

mirta walyja-janampa nyinaku. Parna jiimartajiluya-jananya warrkamukuya-jananya miikamura kanyilkku. Wuluya warrkamurrrira maniparni nyinaku. Maajakajaluya-jananya wiipukurlulu pungamalpa, warrkamurrriraya. Jii nyuntumili marlajanukajaya wulu nyinamal warrkamurrriraka, puu yantarta yiya.  
<sup>7</sup> Ngulampangarna-jananya jiikajanga martu walykukajanga pungku. Palunyajanuya nyuntumili marlajanukajalu ngurrraya jii junku yanku. Ngurra ngaakutuya yanku, karniya ngayu marninypungamal, Mama ngarnawarrapurluka.'

<sup>8</sup> ‘Palunyajanu Mamalulu nintirnu Yipuramja, jiji julijuli yirnamalkura. Yipuramju kulirnu, Julyjurni Mamalu jamartapungu ngurra yungkukijalu. Wajarnurni jijirna jukujuku yirnamalku. Jilanyarna Mamaku wangka kuliraka junga nyinaku.’ Palunyajanu ngula Yipuramju palunyamili kaja Yajikpa yirnamarnu, jiji jukujuku, karrpuparakungka. Yajikju majurringuka palunyamili kaja yirnamarnu, Jayikappa. Palunyajanuyila Jayikapju majurrirakayila-jananya palunyamili kajakaja yirnamarnu. Jayikapku kajakaja tuwal wulikajarringu. Jiinpa-lampaya ngayunku mitunyjarrikaja lalturringu. <sup>9-10</sup> Jayikapku kajakajaraya nyinapayi jurtarringuraya palunyankurnu marlanguku, Juujapku. Ngalurnuya kanyirnu kaya-jananya jalamanu, kamalkajawintingka, martu karlkingka. Palunyajanuya parna Yijipikutuya katingu. Katinguya junu warrkamurrrira wulurtuka

nyinapayi, maniparni. Warrkamupurluka jalayipa nyinapayi, jii Juujappa. Palunyanga Mamalu ngarnawarrapurlukalu ngampurru kanyilpayi, karlki kujupaluya nyurnimankupayi. Parna Yijipingka maaja maju nyinapayi, Piiru. Palunyangkaluya Juujappa katingu ngarajunu. Palunyangka Mamalu Juujappa murlpirrmanu ka nintipuka wangkapayi. Piirulu kulirnukara pukurlarringu. Ka palunyajanu maaja maju junu. Piiruku warrkamupurlukakulurrju-janampa maajarringu, maaja-janampa puntu laltku nyinangu, parna Yijipiwanajanampa nyinangu, wulikajaku.

<sup>11</sup> “Palunyajanu-janampa kalyukamu mayi wiyarringu, parna Yijipiwanakamu parna Kayinanwana. Mitunyjanirriluraya purtu mayiku ngurrilpayi. <sup>12</sup> Parna Yijipiwan mayinga wulu ngarripayi. Parna Kayinanjanu mitunyjarripurlukalu Jayikapju kulirnuka ka-jananya palumili kajapartarnukaja junu yanu. Ka wajarnu-jananya yiyanu. Parna jiikuraya ngurrparaya. <sup>13</sup> Yanuya mayikaja manu kayilaya marlaku yanu. Wiyarrinyjangkangaya witukaraya marlaku yanu. Palunyangka-jananya Juujapju maaja majulu wajarnu palunyamili kurtakajangka, ‘Ngayurna ngarinpa Juujappa, nyuntunkurna-nyurrrampa marlangu.’ Palunyajanuyila maaja maju-janampa Piiru kulirnuka nintirringu-janampa. <sup>14</sup> Palunyajanuyila-jananya Juujapju wajarnu yiyanu Mamakamu karlki kujupaya-jananya mankura marlaku katirarni, parna Yijipikutu. Jilanyaya laltu nyinapayi japanti payip wulikaja.

**15** Jayikapmapuya pakarnu yanu parna Yijipikutu. Yanuya mayikurlupi nyinapayi.

“Parna Yijipingkaya wululpi nyinangu. Miturringunirraya Jayikapkamu palunyamili kajakaja. **16** Kajakajaluya-jananya mitu tarrkakajanga-janampa marlaku katingu parna Kayinankarti. Ngurra Jikimjaya-jananya tuunyjunkupayi, tarrkakaja. Ngurra Jikimpanga Yipuramju julyju manikurlulu payamunu, mitukajaya-jananya walyjakaja tuunyjunkuranku. Yamamapuluya julyju ngurra palunyanga kanyilpayi. Palunyangka-jananya Yipuramju parnanga payamunu.”

**17** Tiipanju-janampa yarrarnu wajarnu, “Mamalulu ngarnawarrapurlukalu julyjulu jamartapungu Yipuramja, parna Kayinanpanga-jananya yungkukija, palunyamili marlajanukaja. Tayimurringu-janampa, Mamalu kulirnu, ngurra-jananya yungkukija. Palunyangkaya parna Yijipingka laltukuyarrarringuya, nyinapayi, ngayunku-lampaya mitunyjanirri. **18** Palunyajanu Piiru maaja wiyarringu. Palunyangka-janampa maaja kujupa nyinapayi, Yijipimartajiku-janampa. Maaja palunyangara ngurrpa Juujapkunga nyinapayi.

**19** “Maajalu-jananya majulu, walykulu muunpungkura-jananya yiyalpayi jijinkuya-jananya katira junkupayi, ngurrangka yitiwana, ngarriraya miturripayi. **20** Jilanyangkayila Muujajpa jiji juku puunarringu, kunyjunyuminyirri. Palunyangkayila Muujajpanga palunyamili yipilunga jijinga kukujura kanyinma, ngurrangkartuka, wirlarra yupal wulikajangka.

**21** Maaja Piirulura wajanyangkayila, palunyamili yipilu katingu, kalyungka tartalpa, puutjartuka ngarrijunu junu. Palunyangkayila Piiruku yurntalpartarnulu manu kanyirnu majumanu, yipi walyjayurulu. **22** Majurrinyjayilaya Yijipimartajilu martuluya nintilpayi, yipirrijingkura kulirnu nintirringu. Palunyalu yalyjirru pamparrjulu ngapilpayi, junga nintipukajaru wangkapayi. **23** Muujajpa nyinangu yatilyarringu. Ka-janampa marlaku yanu palunyamili walyjakajaku Yipuru wangkawintiku. Palunyangka-jananya walyjakajangka nyinapayi. **24** Kapulanya nyangu Yijipimartajilu pungkupayi palunyamili walyja. Purnturringuka mitu pungu Yijipimartaji.

**25** “Muujajju jilanyalu kulilpayi, ‘Kulirninpaya ngayumili walyjakajalu, Mamalurni ngarnawarrapurlukalu yiayarnu, ngayulurna-jananya walajura katiraku, ngurra kujupakarti.’ Mirtaya jilanyu kulilpayi. **26** Karrpu kujupangkapulanya Muujajju nyangu jurtangkupula warrkilpayi, palunyamili walyja kujarralungkupula. Ka-pulanya marrkulpayi, ‘Mirtankunpula jurtalu warrkinma!, kunyjunyupula nyinama!’ **27** Jurta walyjajarralunga yurnturnu junu yanu, Muujajpa. Kara wajarnu, ‘Mirta-lampajun maaja maju nyuntu, paki. Mirta-linyaju marrkunma! **28** Nyuntulungarnin pungkula junkujaku, Yijipimartaji jiiyuru.’ **29** Wangka jii kulirnuka Muujajpanga junuka yanu, ngurra kujupangka parna Mitiyangka nyinapayi. Ngurra jiingkartuka nyinangu nyupakurlurringu. Ka nyinanguka kaja

kujarrakurlurringu.”

<sup>30</sup> Yarrarnu-jananya Tiipanju jilanyartuka wajalpayi, “Palunyanga rawa jiingkartuka nyinapayi, puutiyi yiya. Palunyajanulu Mama ngarnawarrapurlukamili wikarru yutirringu, purli Janiyangka ngamu. Palunyangkayila Muujajju nyangu wartanga, tiliyikipayi, ka mirta palu warta punkarnu. <sup>31</sup> Purtu ngurinyjirringukalu yanu kintirringu. Palunyangkayila Mama ngarnawarrapurlukalu wangkangu. <sup>32</sup> ‘Ngayurna Mama ngarnawarrapurluka. Ngayurna-janampa mitunyjanirriku maaja maju nyinapayi, Yipuramku, Yajikku, Jayikapku.’ Muujajjunga kulirnuka tititipungkupayi, ngurlu. Kulirnukalura nyuurrarringu.

<sup>33</sup> “Mamalura yarrarnu wajarnu, ‘Parna ngaanga ngurlu. Jinapukangangku yarrala jurra!

<sup>34</sup> Nyakupayirna-jananya ngayun kujarramili walyjakaja, Yijipingkaya nyinanyjanpa. Maajakajaluya-jananya putalu pungkula kanyilpayi. Palunyangkayilaya mungajarra ngarrira warlkurninpa. Yiltarna-jananya kulirnin. Yanurnirna-janampa walajurarna-jananya yiylkjija, ngurra kujupakartiya, maaja putangkamarra. Nyamurnanta junkula yaninpa, yankun parna Yijipikutu.’”

<sup>35</sup> Tiipanju-jananya yarrarnu wajalpayi, “Muujajpangaya palunyanga nyurnimanu junu, Yijurilmili marlajanukajalu. Jilanyaraya wajarnu, ‘Mirta-lampajun nyuntu maaja nyinin, paki. Mirta nyuntulu-lanyajun maajayurulu wajalkuran.’ Ka Mama ngarnawarrapurlukalu

Muujajpanga-janampa junu yanu, maaja-janampa nyinaku. Yankula-jananya walajura yiylkura, parna kujupakartiya yankura. Mamamili wikarrulu yutirringu, waru palunyangka. Kara Mamalu yiylarnu, Mamamili wikarru marlpararralu-jananyapula, yankura walajura yiylkura. <sup>36</sup> Muujajju-jananya Yijurilmili marlajanukaja walajunu ka katingu, parna Yijipijanu. Palunyalunga yalyjirrju-jananya kujupa kujupa palyara nintilpayi, parna Yijipiwanu, kalyu mijimijiwana, ngurra kujupawananalurrju. Wululungulyu-jananya nintilpayi, puutiyi yiiya.

<sup>37</sup> “Muujajju-jananya palunyakajanga Yi-jurilmili marlajanukaja wajarnu, ‘Ngulampanga-nyurrampa Mama ngarnawarrapurlukalu-nyurrampa yiylaku Mamamili wangka jakurlpurluka. Ngayurni-nyurrampa yiylarnu Mamalu, palunyayuru-nyurrampa yiylaku. Palunyanga-nyurrampa walyja yiylaku.’ <sup>38</sup> Muujajpa-jananya jii parra nyinapayi, yitiwana pujimanwana, ngayunku mitunyjanirriwana. Mamamili wikarrulu wangkangu yapu Janiyangka. Palunyangka jiilu Muujajju Mamamili wangka yapungka wakarnuka. Ka-jananya yungu ngayunku-lampa martu parlparriku. Martulula palunyanga wangkanga kuliraka wanka nyinamalpa. Yilta Muujajpanga maaja-janampa maju nyinapayi, yalyjirrpa. <sup>39</sup> Mitunyjanirriluya Muujajmili wangka nyurnimanukaya yurntunu ngarajunu yankuraya marlaku, parna Yijipikarti. <sup>40</sup> Muujajpa yapungka Janiyangka

nyinapayi, Yiranpa-janampa yatilypa nyinapayi. Wajarnukaya ‘Muujajjulanku junu yanu, jiilulanku parna Yijipijanu katingu. Nyuntulu-lampa miikamula maaja kujupa!, Mama ngarnawarrapurlukayuru.’

<sup>41</sup> “Palunyajanuya miikamunu pulukuyuru, kuulungkaya, kayilaya marninypungkupayi, Mama ngarnawarrapurlukayuru. Karaya pukurlarringu, kaluya katira mirtayirti junkupayi. Pulukukuraya jiiku pukurlarringu kujungkarringu, kaluya mayi ngalkulaka yinkalpayi. <sup>42</sup> Palunyangka-jananya Mamalu junu yanu, jiirtukaya pulukukamu kurtalya wululurtuka marninypungkuran. Jilanyartuka Mamamili jakurlpurlukalu julyju wakarnu,

‘Yijurilmili marlajanukajaluya kulila! Purtujuranyurra katira pungkula yungkupayi, mirtayirti kuka, pujimanwana, wululu puuti yiiya.

<sup>43</sup> Mama ngarnawarrapurlukayuru-jananyanyurra marninypungkula nyinapayi, jii Muluka, Ripana, kurtalyakajalurru. Kalikinyurra Muluka jiiku miikamunu, ka parra katipayi. Maralunyurra palyara par-nawana junkunyan, kurtalyayuru. Jiinyurra yini wajalpayi, Ripina. Palunyangkarna-nyurranya yiylaku tiwa, ngurra Papilunja munkarranyurra nyinamal.’”

<sup>44</sup> Tiipanju-jananya wajalpayi, “Mitunyjanirriluya pujimanwanaluya tiinti parra katipayi. Palunyangara tiintinga murtitikirljanuya kiinanuka parra katipayi. Ngurra palunyanga parra katira ngarajunkupayi, jijingkaluya Mama marninypungkuraku. Julyjulu Mamalu

Muujajja wajarnu, kayilaya jiiwana jungalu wakarnu palyamanu. <sup>45</sup> Mitunyjanirriluya-jananya kanyirnu yunguya-jananya palunyamili kajakaja. Kaja jiikajaluya-janampa jiinya tiintinga katingu parna Kayinankarti. Palunya tayimunga-janampa Jajuwa maaja nyinapayi. Palunyamartajinga-jananya Mamalu pungu yiyanru, palunyamili kajakajaya-janampa kunyjunyu nyinara. Ngurra jiingkangaya tiintinga jiinga ngarajunu. Ngarangu, wulurtuka ngarangu Tayipit maaja tayimukutu. <sup>46</sup> Mama ngarnawarrapurlukara maaja Tayipitku pukurlpa nyinapayi. Palunyangkara Tayipitju Mama japirnu, maya kujupa murlpirrpa palyalkura, Mamakura. Palunyajamu Mamalunga marrkurnu, ‘Ngulampaju nyuntukurnu kajalu miikamunku.’

<sup>47</sup> “Palunyajamu Jalamanju palunyamili kajalu miikamunu. <sup>48</sup> Mama-lampa ngarnawarrapurluka jiinga maju nyininpa, mirta mayangka nyininpa, martulu miikamunkunyajanungka. Jilanyangulyu Mamamililu wangka jakurlpurlukalu wakarnu, julyju,

<sup>49-50</sup> ‘Mamalu-jananya wajarnu. Ngayulgarna ngarnkawanakamu parnawana kanyirni. Mirtarna mayawana nyininpa, martulu miikamunkunyajanungka. Ngayulgarna wamumpu palyarnu, majuminyirrilu. Mirtarna ngurra kujungka nyininpa, parlparriwanarna nyinin.’”

<sup>51</sup> Tiipanju-jananya yumurringu warrkirnu, “Mirtanyurra kulira Mamamiliwana

nyininpa. Mannganyjulunyurra kulira nyuntunkurnuwana nyininpa. Ngakumpa-nyurra yiltaluminyirrinyurra Mamamili wangkanga nyurnimaninpa. Nyuntunkurnu mitunyjanirriyurunyurra nyininpa, mannganyjuminyirri. Mamamili Kurrurnju-nyurranya nintilpayi, kayilanyurra kulira junkupayi. Yiltanyurra ngakumpa nyininpa.  
<sup>52</sup> Nyuntunkurnu mitunyjanirriluya-jananya Mamamili wangka jakurlpurlukakajanga pungkula miturntankupayi. Mirta kujukamu wanka nyinapayi, wulikajaya-jananya pungu wiyamanu. Jiikajaluya Mamamili wangka jakurlpurlukakajalu julyju wajarnu, Kurayijparni ngulampanga yankurni, Mamamili warrkamupurluka kunyjunyu. Kulilparnilunyurra palunyalurru pungu miturntarnu, manilunyurra yunguka.  
<sup>53</sup> Yiltalunyurra Mamamili wangka kanyirnin, palunyamili wikarrukajalu julyju nintinyjajanu. Kulinyjaparninyurra wulu nyininpa.”

### *Tiipanpaya yapuwintilu yungkalpayi*

<sup>54</sup> Jii maajakajangaraya wirrilyiminyirringu, Tiipanku, yirra-ngkuya pajara wanarnu.  
<sup>55</sup> Tiipanju ngarnkakutu yirra nyanguka, Mamakamu Jijajpa-pulanya. Jirntuyurulupula rantarnuka ngarapayi. Jilanyartuka Tiipanjunga nyangu, Mamamili Kurrurnwintilu. <sup>56</sup> Yirra nyanguka-janampa wajarnu, “Nyarraya nyawa! Ngarnka wupunarrinyjangkarna-pulanya nyanginpa, yarningaku-lampa marlpakamupula Mama. Kujungkapula ngarin, maaja maju

kujarra.”<sup>57</sup> Tiipanju-jananya wajanyjangka, ka-ngkuya kulinyjangkamarra, mara kuran kujarrangka junuka kaya pinirringu, maranguru winirnu.<sup>58</sup> Winirnuya katingu tawunja yitiwana wirrupungu. Kaya yapuwintilu yungkalkijalu kuurtukaja-ngkuya yarrara wirrupungkutingu, warrinyjikutuluya, Juulkutu.<sup>59</sup> Wululurtukaya yungkalpayi, yapuwintilu. Palunyangkayilara Jijajpa japistu, Tiipanju. Jilanyara wajarnu, “Maaja Jijajpa! Kuwarrirna miturriku, kurrrurnparni marra kati!”<sup>60</sup> Pupatingukalu Mamangka wiltu wangkangu, “Mama! Walykulurniya punginpa. Mirtan-jananya ngaanpa puntajulu pungku, jurra-jananya!” Palunyajanuyila miturringu.

## 8

### *Juulju-jananya pungkupayi, Jijajmilikaja*

<sup>1</sup> Juulju nyangu Tiipanpa miturrinyja, kayila pukurlarringu. Karrpu palunyangkaya kulirnukaya, kaya-jananya Jijajmili walyjakaja, yankura pungkura, martu karlkinju, Jarujalum-martajilu. Palunyangkamarra Jijajmili walyjakaja junuka pinirringu tiwa, parna Juutiyawananamu parna Jamiriyawana. Jijajmili jakurlpurlukawiyajuya nyinapayi, Jarujalumungka. <sup>2</sup> Martu karlkinjuya Mamamili walyjakajalu, Tiipankuraya yulangukaya manu katingu tuunyjunu. <sup>3</sup> Juulju-jananya palunyamili warrkamupurlukakaja muunpungu, Jijajmili walyjakajaya-jananya mayangka jarrparra

yilalpayi. Mankulakaya-jananya yilatira jiilja jar-rpjunkupayi, yirnakajakamu wantikajalurrju.

### *Pilapulu-jananya nintilpayi*

<sup>4</sup> Jiijajmilikajalungaya yanu parlparrirringu. Yankunyjanjungaya yankula parra wajalpayi, Jiijajmili wangka. <sup>5</sup> Pilapunga yanu tawun majukarti, parna Jamiriyangka. Yanu-jananya parra nintilpayi, jiingka, “Jiijajpanga yulta Kurayijpa nyininpa, Mamalu julyju jamartapungu-langku yyalkijalu-lampa.” <sup>6-7</sup> Martukajalungaya yakalu kulilpayi. Pilapulunga yalyjirru kujupa kujupa palyalpayi. Jiengkanga-jananya Pilapulunga ngarntawinti-jananya wankalpayi, parralayijikamu mukuntu. Malpulurrju-janampalura payira yyalpayi. Payinyjangkanga-janampalura malpunga pakara wiltu mirrara pinirripayi. <sup>8</sup> Jamiriyamartajilungaya Pilapu nyangukaraya pukurlarripayi, jumaji-jananya ngarntawintikamu malpuwinti kunyjunyunkupayi.

<sup>9</sup> Tawun jiengkanga-jananya martu kujupalu Jayimunju wankalpayi maparnwintilu, yalyjirru-janampa kujupa kujupa palyalpayi. Jiimartajiluya nyakura kuru pakalpayi. Palunyalungangku marninypungkupayi, wajalpayi-jananya, “Ngayungarna maju maparnwinti.” <sup>10-11</sup> Palunyangkaya martu jiimartajilunga wajalpayi, “Palunyanga maparn majuwinti, Mama ngarnawarrapurlukalura yungu maparnpa. Yulta Mamakurnu nyininpa.” Palunyamili wangka yarnngaluya

kulirakaraya pukurlarripayi, maniwintika-jalukamu puupalakajalulurrju. <sup>12</sup> Pilapulu-jananya jakurljunkupayi, Mamalu-jananya palunyamili walyjakaja ngampurrju kanyilmal, Jijajmili wangkalurrju. Kulirayilaraya pukurlarripayi. Palunyangkayila-jananya kalyungka jarrpjunkupayi, laltukuyarra, yirnakajakamu wantikaja. <sup>13</sup> Jayimunpanga Jijajmili wangka kulirnuka kalyungka jarrpangu. Kalu pakarnu Pilapungka ngarapayi. Palunyalunga nyangukara ngurinyjirringu, Pilapulu yalyjirrjuminyirri kujupa kujupa palyalpayi.

<sup>14</sup> Palunyajanungkaya Jarujalummartajilu walyjakajalu, Jijajmili jakurlpurlukakajalu, jakurlpaya kulirnu, martu laltuluya Mamamili wangka kulira pukurlarringu. Palunyajanuyila Pijjakamu Jaanpaya-pulanya yyiyarnu tawun jiikarti Jamiriyakarti. <sup>15</sup> Yanupula jarrpangu, karapula Mamangkalupula wangkangu. Japirnurapula Mamamili Kururnpa jarrpjunkura-jananya, Jijajmili walyjakajangka, kuwarrijanungka.

<sup>16-17</sup> Palunyangka-jananyapula Piijalukamu Jaanju mara katangka junu, kalupula Mamangka wangkangu, Mamamili Kuurtiyila-jananya jarrpapayi. Palunyamartajingka-jananya mirta julyju Mamamili Kururnpa jarrpangu, paki, Jijajmili wangkawayajuya kuliraka kalyungka jarrparra nyinapayi. Yiltaya kulirnu, “Jijajpanga maaja maju-lampa nyininpa.” Mama ngarnawarrapurlukakuraya Kuurtiku ngurrpa nyinapayi. <sup>18</sup> Jayimunjunga

palunyalunga nyangu Mamamili Kurrrurnpanjananya jarrpapayi. Palunyangka-pulanya mani yungkukija japidnu-pulanya,<sup>19</sup> “Nintilarnipula. Ngayululurrjurna-jananya Mamamili Kuurti jarrpjunkuran. Yungkurnantapula maninga.”<sup>20</sup> Ka Pijalu wajarnu, “Wiya! Mamaluwiyajura Kurrrurnpanga yunginpa, mirtan palunyanga manikurlulu payamurninpa. Pakiwanan kulirnin, manikamulyunpula warungka kamparra wiyarrijaku.<sup>21</sup> Nyuntungan ngurrrpa, mirtala kujungkalu Mamamili warrkamunga palyalku, mirtaran Mamaku kulira junga nyininpa, paki.<sup>22-23</sup> Mirta pakiwana kulinma!, jiiyuru walyku jurra! Mamara japila!, walykungkura mankura wirrupungkura. Japilara! Mayitpiran purtu japilku. Ngayulurnanta kulirnin, mayitin wulu walykurrira nyinin. Nyuntu-limpajun mikurrin.”<sup>24</sup> Jayimunjupulampa wajarnu, Pijakukamu Jaanku, “Nyuntu kujarralujuranpula japila Mama!, yiltarrijaku nyuntu kujarramili wangka.”<sup>25</sup> Jilanyalu-jananyapula Jiijamili wangka nintilpayi, julyjupula Jiijajpa nyakunyjajanulu. Palunyajanupula marlaku Jarujalumukarti yankunyjanju-jananyapula nintilkatipayi, ngurra parlparriwana, parna Jamiriyawana.

### *Yijiyupiyamartaji Pilapulu nintilkatipayi*

<sup>26-28</sup> Mamamili wikarrulu Pilapungkalu wajarnu, “Nyamu! Wartakamu payikingku marraka yarra yulparirra!, ruutu majukarti. Ruutu jiinga pujimanwana wati yanin, tawun Kaajajanu, Jarujalumkarti.” Pilapulu wartakajangku

manuka yanu, ruutu palunyawana. Ruutu jiinga julyjujanu, mirtaya jiiwanakamu yanin. Palunyangka ruutu jiiwananga yirna turilakurlu yankupayi, Jarujalumja Mama ngarnawarra-purluka marninypunguka. Turilanga yawartalu yillalpayi. Yankupayi yirna jiinga Yijiyupiyamar-taji. Yijiyupiyangkanga maaja maju wanti nyinapayi, yini Kantiji. Yirna jiingkanga nyinapayira, warrkamupurluka wantiku, manikajara kanyinma. Yirnanga palunyanga kirriji nyinama nyupaparni. Palunyanga turilangka yankunyjanjura riitamulkatipayi, Mamamili wangka. Wangka jiinga Mamamili wangka jakurlpurlukalu julyju wakarnu, Yayijayalu.

<sup>29</sup> Palunyangka Pilapulu nyangu turila yawartawinti. Palunyangka Mamamili Kuurtilulu wajarnu, “Turilanga jiinga wanala!”

<sup>30</sup> Pilapulu pinirrira kulilkatipayi, Mamaku wangka riitamunyjanpa. Palunyangka Pilapululu japirnu, “Kajin nintilu riitamulkatin?”

<sup>31</sup> Wajarnulu, “Purturna riitamulkatin, kujupalurni nintilkura!” Pilapura japirnu, “Nyuntumnin turilangka tatilku?” Pilapunga tatirnuka kujungkapula nyinatikatipayi. <sup>32</sup> Jiinga Mamamili wangkanga ngarangu jilanya,

“Palunyanga jiipuyuru nyinaku. Mankuya katiku mitu pungkukijalu, martu karlkinju, yaka ngaranyjanpa, jiipu jukujukuyuru. Jipiupu jukujukumpa murrarni yaka ngarinpa, mitu pungkunyjangkanga. Yaka ngaramalpa jampaya wuuna katungkunyjan. Yulta palunyayuru ngaramalpa, yaka. <sup>33</sup> Martu lal-tuluya palunyanga nyurnimanku, mirtaya

jungalu walajunku, miturrijakungkamarra. Ngulampangaya martu jiikajangaya nyinaku putaminyirri, jumajiya mirta jungalu walajunku. Yiltaluya miturntanku.” Jilanya Yayijayalu julyju wakarnu.

<sup>34</sup> Kara yirna palulu japidnu Pilapunga, “Wajalarni! Nganampa palunyanga? Mayiti Yayijaya, mayiti martu kujupa?”

<sup>35</sup> Kara wajarnu Pilapulu, “Jiijajpa palunga.” Palunyangkalu Mamamili wangka Pilapulu nyakula nintilkatipayi. Nintilkatipayilu yulta palunyanga Kurayijpanga, Jiijajkurnu wangkalurrju. <sup>36</sup> Ruutuwanapula yanu, yanukapula kalyu nyangu. Kara Pilapuku wajarnu, “Nyarra kalyu ngarrin. Jiingkarnin kalyungka jarrpjunku.” <sup>37</sup> Pilapululu wajarnu, “Ngayulurnanta kalyungka jarrpjunku, jampan Jiijajpa yiltalu kulilku, Mamakurnu.” Pilapungkalu wajarnu, “Palunyangarna yiltalu kulirnin. Jiijaj Kurayij yulta Mamakurnu kaja nyininpa.” <sup>38</sup> Kayila turilanga yikijunkuraku wajarnu palumili warrkamupurlukangka. Tiputinguyilapula yanu kalyungka jarrpangu. Palunyangayila Pilapulu kalyungka jarrpjunu.

<sup>39</sup> Palunyangkapula kalyujanu pakarnu tatirnu. Kayila Pilapunga Mamamili Kuurtilu winirnu katingu, tiwa, mirta palunyalu martulu Pilapunga yarrarnu nyangu, paki. Purtura ngurrirnu yumurringuyila turilangka tatirnu yanu. Jiijajpa yulta kulirnuka pukurlarringuka yanu. <sup>40</sup> Pilapu yanu tawunu Yajututangka yutirringu. Palunyajanulu-jananya yankula wajalkatipayi Jiijajmili wangka. Tawunkaja

yiwarrawana ngarapayi, jiiwanalu-jananya wajalkatipayi. Yanu tawunu Jijariyangka jarrpangu.

## 9

### *Juulju Jijajpa kulirnu*

<sup>1</sup> Juulpa parra yankupayi, wajalpayi-jananya, “Wanyjaya Jijajmili walyjakaja? Mankurna-jananya katiku jiilkarti, mitu pungkuraku-jananyaya, karlkinju.” Yanu Jarujalumkartu, yatilypa majuwartakarti, ka japirnura mirlimirliku. <sup>2</sup> Juulju kulirnu, katikijalu mirlimirli, ngurra yini Tamajakajkarti, katira nintilkija, Juwukurnungka jaajingka maajakajangka, mirlimirli. Kulirnu Juulju “Mirlimirliya nyakura palya wajalkuraya, mankurakurna-jananya, Jijajmili walyjakaja. Mankurna-jananya marlaku katiku ngaatu Jarujalumkartu, ka jiiljarna-jananya junku, yirnakajakamu wantikajalurru.” <sup>3</sup> Juulpa yankupayi, Tamajakajkarti ka kintirringu, nyanguyla tili. Palu tili majuwartalu rantarnu, ngamu Juulja. <sup>4</sup> Palunyangka parnangka punkanyjanju ngangkurnu wangka. Jilanya kulirnu, “Juulpa Juul! Nyaaku-lampajun putarringu, ngayumiliku walyjakajaku. Nyaaku-jananyan mankurni?” <sup>5</sup> Juuljura japirnu, “Nganan nyuntu maaja wangkinpa?” Juuljalu wajarnu, jilanya, “Ngayurna Jijajpa Nyuntulurnin putamanu.” <sup>6</sup> Yarrarnura wajarnu Juulku, “Pakala yarra, nyarra tawunkarti! Palunyangka martu kujupalunta

nintijulku, nganan ngapilkura.”<sup>7</sup> Palunyamili warrkamupurlukakajaya ruutungkaya yikipayi, kaya kulirnu wangkapayilu Jiijajpa. Kulirnuya ngurlurringu, kaya yaka ngarapayi, martu kujupa nyakuparni.<sup>8</sup> Juulju pakarnu purtu nyangu, kuru pampururringu. Palunyangkaya mara winirnu katingu tawunpa Tamajakajkart. <sup>9</sup> Karrpuparakungka nyinangu mirrka ngalkuparni, ka kalyu jikilparni.

<sup>10</sup> Palunyangka tawunja jiingka nyinapayi, yirna Yananayajpa, Jiijajmili walyja. Yananayajju jukurrmanu, Jiijajpara mirrangu. Ka Yananayajju wajarnu, “Maaja! Ngaangkarna nyininpa.”<sup>11</sup> Jiijajjura yarrarnu wajarnu jilanya, “Pakala yarra jiiwana ruutungka!, yiwarra kujupakutu. Martuluya yiwarra jii wajarninpa, ‘Yintulpa’ Ngurrilara jiiwana Juutajku ngurraku. Japilara Juulku!, Taajajmartajiku. Jiingka ngurrangka Mamangkalu wangkinpa.”<sup>12</sup> Yarrarnulu Jiijajpa Yananayajja wangkangu, “Juuljunta jukurrju nyuntungka nyakupayi. Nyuntulun yanku pampulku kuru maralu, palunyangkila nyaku. Jiinganta nyakuninpa maralun pampurninpa.”<sup>13</sup> Yananayajju Jiijajja wajarnu, “Maaja! Ngurlurriinparna mayitirni jiilkarti kangkujaku. Wajarnurniya jiilu-jananya yirnalu Jarujalumungka, mankula katipayi jiilkarti, nyuntumili walyjakaja. Yiltajananya jiilu putamankupayi.”<sup>14</sup> Kuwarri Juulpa palu ngaakarti ngurrakarti yankupayi, nyuntumili walyjakaja-jananya mankura kangkupayi jiilkarti. Jarujalummartajiluya yatilypa majulu palu yiyanu, mankuraku-

jananya nyuntumilikaja, walyjakaja.”  
 15 Maajalura Jijajju wajarnu, Yananayajja, “Kuwarrilu yarra Juulkarti! Ngayukuju warrkamupurluka nyinaku, kuwarrirna junku. Ngayulurna kulirninpa, ngayukuju wangka-jananya parra wajalku, Juwuparnikajangka, maajakajangkalurru, ka Juwukajangkalurru.  
 16 Ngula Juulpa jiinya wirrilyirrikuya pungku, ngayukuju jampa nyinaku. Jilanya Juuljarnalu wajalku.” 17 Palujanu Yananayajpa yanu mayangka jarrpangu. Juuljalu mara junuka wajarnu, “Juulpa! Nyuntu ngayukujun walyja. Maaja Jijajjurni yiayarnu nyuntumnanta kuru pampulkura, kunyjun-yunkura, nyuntungkarnanta palumili Kuurti jarrpajulkura. Jijajpan jii kulirnu ruutungka.”  
 18-19 Palunyangka kuru pampurnu Yananayajju, ka nyakupayi. Palunyangka Yananayajju manu kalyungka jarrpajunu. Mayiyila ngalangu murlpirrarringu. Karrpuparakungka-jananya Juulpa kujungkarringu nyinapayi, Jijajmili walyjakajangka.

### *Tamajakajja-jananya Juulju nintilpayi*

20 Juwukurnungka jaaji laltungka-jananya Juulju yanu nintijunkupayi. Jilanya-jananya nintijunkupayi, “Jijajpa yilta Mamaku kaja nyininpa.” 21 Palunya wangkaya kulirnu, yakaya ngarapayi. Wajarnu-ngkuya, “Ngaalujananya yirnalu Jarujalumungka ngurrangka mankura pungkupayi, Jijajmili walyjakaja. Jilanyaku ngaakutu yankupayi, mankuraku-jananya kangkura yungkuraku, yatilyparaku

Jarujalumungka.”<sup>22</sup> Juulju-jananya murlpirrju nintilpayi. Jungalu-jananya Juwukajangka, Tamajakajmartajingka nintilpayi. Jijajmili wangka-jananya jilanya nintilpayi, “Mamalu julyju jamartapungu Kurayijpa kurttingkijalu. Yiltangulyu-lampa Kurayijpa kurttingu, yini Jijajpa.” Wangka palunyayuru Juulju-jananya yilta jungalu wajarnu. Palunyangkaya purtu kulirnu ngaparrjuya warrkilkijalu, Jijajku ngurrpakajalu.<sup>23</sup> Palunyajanuya karrpuparakungka Juwukajaya kujungkarringu wangkapayi, Juulpaya pungkuraku.<sup>24</sup> Palunyangka kujupalulu jakurljunu Juulja, pungkurakuya. Tawunja palungka tinkijunu wuulju, kiitukurlu ngarapayi. Kiitungka jiingkaya, purtu majalpayi Juulku, mankuraya pungkuraku. Jirntu karrpungkaraya majalpayi, mungangkalurrju.<sup>25</sup> Juulku ngulyjukajaluya mungangka wirningka majungka karrpirnuya ruupuwintilu, kurttingu wintawanalu, wuulja nyarrakarti, pungkujakungkamarra, walykukajalu.

### *Juulpanga Jarujalumukarti yanu*

<sup>26</sup> Juulpa Jarujalumkarti yanu, Jijajmili walyjakarti-jananya yanu, nyinaraku-jananya. Nyanguya ngurlurringu pungkujaku-jananya, Juulpaya pakikajal karanu. Kulirnuya, “Wiya palunyara Jijajku walyja, mayitpi-lanya pungkukijalu.”<sup>27</sup> Panapajju palunyangka winirnu katingu, Jijajmili walyjakajakarti, palumili jakurlpurlukakarti. Panapajju-jananya jakurljunu, ruutungka Juulju kulirnu

maaja Jiijajpa, wangkangulu. Wajarnujananya jilanya, "Juulju-jananya Tamajakajja wangka Jiijajmili, murlpirrju nintilpayi." <sup>28-29</sup> Palunyangka-jananya Jarujalumungka Juulpa Jiijajmili walyjakajangka nyinapayi. Jarujalumungka-jananya Juulju-jananya parra wajalpayi, murlpirrju, Jiijajmili wangka, martu laltungka. Juwukajangka-jananya minyirru nintilpayi. Palumili wangkaya kulira junkupayi, Kiriki wangkawintikajalu. Wangkanguya pungkurakuya, mitu. <sup>30</sup> Jiijajmili walyjakajaluya kulirnu, kaya katingu tawun kujupakarti, Jijariyakarti. Palunyajanuya katingu yiayarnu, tawun Taajajkartu. <sup>31</sup> Palunyajanuya Jiijajmili walyjakaja kunyjunyu nyinapayi, parna parlparriwana, parna Juutiyawana, parna Kaliliyawana, parna Jamiriyawanalurru. Mirtaya-jananya pungkupayi, paki, kunyjunyu nyinapayi. Jiijajmili walyjakajaya murlpirrpa nyinangu, yiltaminyirri, kurrungu-jananya Mamamili Kuurti. Kuurti palunyalu-jananya murlpirrmanu. Laltu kujupaluya kulirnuka kujuparringu, Jiijajmilirringu, walyja. Maajakuraya Jiijajku yulta nyinapayi.

### *Pijanga tawunu Liitakarti yanu*

<sup>32</sup> Palunyajanu Pijalu-jananya tawun kujupa, tawun kujupangka kujungkara-jananya nintilpayi, Jiijajmili walyjakaja. Yanu tawunkarti yini Liitangka jarrpangu, Jiijajmili walyjakaja nintilkura. <sup>33</sup> Yirna Yaniji, ngarnta yanu nyangu, parralayiji ngarripayi, warntungka. Wulu ngarripayi ngarnta, yayit wulikajangka yiyyangka.

<sup>34</sup> Piijalura wajarnu, “Yaniji! Jijajjunta kunyjunyurnin ka pakala warntungku ruulamula!” Palunyangka palunyalu kulirnu ka yiltangulyu pakarnu. <sup>35</sup> Parrayila yankupayi kaya nangguka kulirnu, “Yiltangulyu Jijajpa Mamamili.” Jilanyaya kulirnukaya Jijajmili walyjarringu, Litamartajilu ka tawun Jaranmartajilu.

<sup>36</sup> Palunyangka kinti tawun kujupangka ngilypi kuju nyinapayi, Jijajmili walyja. Yini palunga Tapija. Wangka palu Kiriki wangkapayi, palunyangkaya yini palu wajalpayi, ‘Tuukaja’. Ngilypi palunyalu-jananya kulupja wakara yungkupayi, nyarrukaja, maniparnikaja. Yulupirti-jananya yungkura ngampurrju kanyilpayi.

<sup>37</sup> Palunyajanu ngilypi palunya ngarnta majurringu, ka miturringu. Murrarniluya mayangka ngarnawarra ngururrpa mitukaja ngarrijunkupayi, tuunyjunkuraku, ngula. Jilanyaluya mitu palunya waajamura kangkura ngarnawarra ngarrijunu. <sup>38</sup> Jakurlpaya

kulirnu Pija tawun Liitangka nyinapayi. Tawunpa Jaapa Liitangka kinti ngarapayi. Jaapamartajiluya Jijajmili walyjakajalu yiayarnu martu kujarra Jijajmili, Pijaku mankuraku. Yanulupula Pijakarti ka mirrangurapula jilanya, “Yirna! Yarrarni wala!” <sup>39</sup> Palunyangka Pija pakarnu ka kujungkaya wala yanu marlaku, maya palunyakarti. Mayangkaya palungka katingu jarrpajunu, kaya ngarnawarra tatirnu, mitukutuluya. Ngilypikajaya nyupaparnikaja yulara yikipayi. Pijangkaluya nintirnu, kulujkaja wakara-jananya yungkupayi, ngilypi

palunyalu. <sup>40</sup> Pijalu-janampa wajarnu, jaalpuwa yankura ngarakura. Palunyajanuya jiinpa yanu ngarapayi. Ka Piijalu pupatingu Mamangka wangkangu. Ka mitungkalu nyanguka wangkangu, “Tapija! Pakala!” Kurungku paarlanu, ka Pijiangkalu nyanguka pakarnu, mitujanu. <sup>41</sup> Mara winirnu Piijalu, ka palungka ngaratingu. Ngarajunuka-janampa mirrangu, Jijajmili walyjakajakukamu ngilypikajaku, nyupaparnikajaku. Nintijunu-jananya wanka ngarapayi. <sup>42</sup> Ngilypi wankarringu kaya yanu wajalpayi, parlparri Jupawana, kaya Jijajku walyjarringunirra. <sup>43</sup> Pija Jupangka wulu nyinapayi, Jayimunmili ngurrangka. Jayimunju palu kiinkaja ngapilpayi, wulura warrkamu nyinapayi.

## 10

### *Pija yanu maaja Kuniliyajkartu*

<sup>1</sup> Tawunja Jijariyangka maaja Kuniliyaj nyinapayi. Maaja-janampa jantulwintikajaku nyinapayi. Jantulwintikajaya jiinya yini “Yitaliyankaja”. <sup>2</sup> Kuniliyaj maaja maju, Mamakura nyinapayi, ngarnawarrapurlukaku, palumili walyjakajalurru. Palunya Mamangkalu wangkara nyinapayi. Yungkupayi-jananya manikamu warta martukaja nyarrukaja. <sup>3</sup> Rukarukangka yirna jiilu Kuniliyajju jukurrmanu nyangu, Mamamili wikarru. Jiinya wikarru palumillingkalu mayangka jarrpangu. Jiilulu wajarnu, “Kuniliyaj!” <sup>4</sup> Palunyangka Kuniliyaj ngurlurringukalu nyakupayi. Ka japirnura,

“Maaja, nganawayi?” Kuniliyajkura wajarnu, “Mamangku pukurlpa nyinani. Nyuntulun wangkapayi Mamangka, kulilpayinta. Mamalunta nyakupayi, nyuntulu-jananyan yungkupayi, martukaja, nyarrukaja.”

<sup>5</sup> Yarrarnura wajarnu wikarrulu, “Warrkamupurlukakaja-jananya yiyla tawun Jupakutu!, mankuraya kuju yirna, yini Piija. Palumili yini kujupa Jayimunpa.

<sup>6</sup> Jayimun kujupangkalu palu nyininpa, kiinkaja ngapirninpaa. Jayimunmili maya palu yikini kujungurrungka yirritingka.”

<sup>7</sup> Mamamili wikarrululu wajarnu jilanya, ka yanu. Palunyangka-janampa Kuniliyajpa mirrangu, jantulwintiku, ka warrkamupurluka kujarraku. Jantulwinti jii Kuniliyajkura mirti nyinapayi, Mamakulurrjura walyja. Julyjura Kuniliyajku warrkamurripayi. <sup>8</sup> Wangka jiinya wikarrulu wajanyjangka, Kuniliyajju-janampa wajarnu. Palunyajamu yiylarnu-jananya tawun kujupakarti, Jupakarti, Piijaku mankuraku.

<sup>9</sup> Jiikajaya yankupayi mungarringuyila-janampa. Jupangkaya kinti yankupayi ka karrpurringuyila.

Piija yurtuyurtungka mayangka tatirnu, ngarnawarra, Mamangkalu wangkakura.

<sup>10</sup> Palunyajamu wangkangu kalyparturringu.

<sup>11</sup> Piija mayiku majarnuka jukurrju nyangu, ngarnka wupunarringu. Kaliki majuyuru nyangu, tiputilpayi. Kaliki jiinya kuuna puu wulikaja nyangu, ruupuwintiyuru karrpirnu, kuunakaja. <sup>12</sup> Kalikingka palungka nyangu, kukaparnikaja, ngarriipayi. Kaarnkakajayuru,

wukukajayuru, jilakajayuru, jilanya kukaparni laltu ngarripayi. Kukaparni palunyakajaya Juwukajalu mirta ngalkupayi, luwu-janampa jilanya nyinapayi. <sup>13</sup> Ngarnawarrajanulu Pijangka wajarnu, “Piija pakala puwa ngala!” <sup>14</sup> Pijjalura wajarnu, “Maaja! Luwu-lampaju jilanya, mirtalaju ngalkurnin. Ngayurna parlanya jiiyurukurna, mirta ngalkurninpa. Jiikajaya puta, mirtarna ngalkurninpa.”

<sup>15</sup> Pijangkalu yarrarnu wajarnu, “Jiikajan palyalu ngalku, Mamalunta wajarni. Mirtan jiikaja puta wajala!” <sup>16</sup> Jiiyuru Pijalu yupalja kulirnu, palunyajantu marlakuya yanu wulikaja, mirrkaparnikaja. <sup>17</sup> Jilanya ngarangu Piija ngurinyjirringu, “Nganarni jilanyalu nintirni?” Palunyangkaya Jijariyamartaji kiitungka ngarapayi. Jiikajaluya julyju japirnu, “Wanyja Jayimunku maya?” Japirnukaya yanu kiitungka ngarapayi. <sup>18</sup> Japirnuluya Pijaku, jilanya, “Mayitpi Jayimunpa ngaangka nyininpa, yini kujupa Piija?” <sup>19</sup> Pijalu jukurrju nyangu ka ngurinyjirripayi. Ka Mamamili Kuurtulu wajarnu, “Kulila! Yirna yupalju-ngkuya ngurrini. <sup>20</sup> Pakala tiputi ka kujungkaya yarra!, mirta-jananyan parlany ngaraku, ngayulurna-jananya yiayarnu.”

<sup>21</sup> Piija tiputingu ka-jananya wajarnu, “Ngayurna Piija ngarinpa, kajijunyurra ngurrirninpa? Nganakujunyurra yanurni?” <sup>22</sup> Wajarnuluya, “Kuniliyajju-lanyaju yiayarnu, jantulwintikajamili maajalu, Mamamili walyjalu. Juwukajaluya palunya wajarninpa, ‘Kuniliyajpa yirna kunyjunyu.’” Pijangkaluya

yarrarnu wajarnu, “Mamamililu wikarrulu wajarnu Kuniliyajja, nyuntulajunta mankuraku. Kujungkala yankuraku Kuniliyajmilikarti, ngurrakarti. Yirna jiilunta wangka kulilkuraku.”<sup>23</sup> Palunyangka Pijjalujananya wajarnu, “Mayangkala kurrungkura ngalkura, ka ngarrikura yungunpala yankura!” Kaya kurrungu nyinapayi. Yungunpaya pakarnu kujungka yanu, Pija, Kuniliyajku warrkamupurlukakaja, ka Jupamartaji karlki, Jiijajmili walyjakaja.<sup>24</sup> Yanuya kutungka ngarringu. Yungunarringu kaya tawunja Jijariyangka jarrpangu. Kuwarripaya kurrungkukija jii tawunja, Kuniliyajju-jananya mirrangu kujungkarnu, palumili walyjakaja, marlpakajalurrju.

<sup>25</sup> Piijamapuya yanu yawujayiti ngarapayi. Palujanu Kuniliyajpa yanulu Piijangka pupatingu ka marninypungu. <sup>26</sup> Ka Pijjalu winirnu ka wajarnu, “Yiki! Wiyarnin marninypuwa!, ngayurna martu nyuntuyuru.”<sup>27</sup> Wangkangupula yanu mayangka kurrungu. Kurrungu-jananya Piijalu nyangu, yarnngaya nyinapayi, Juwuparnikaja. <sup>28</sup> Piijalu-jananya wajarnu jilanya, “Juwukajalulaju murrarni martu kujupa, Juwuparni, parna kujupamartaji nyakura junkupayi. Wiyalaju kujungka nyinapayi. Jilanyakunyurra ninti. Yilta Juwuparnilaju nyakura junkupayi. Kuwarri Mamalurni nintirnu, ngarnawarrapurlukalu, wiyarna martu kujupamartaji nyakura junkuraku, wiyarnara puta wajalkuraku.”<sup>29</sup> Kuniliyajjalu wajarnu, “Nyuntumili

wangkarna kulirnukarnanta pakarnu yanu, karlki kujupalurniya walarnu. Yanurnirnanta ngarinpa, Nyaakujun japidu ngaakartirna yankurakurni?”

<sup>30</sup> Kuniliyajjura wajarnu, “Karrpuparaku karrpuparakulajulu murrarni Mamangka wangkaninpa. Karrpu yupaljarnalu

ngaayurungka Mamangka wangkapayi, ngayumili mayangka, rukaruka. Karna jiingga nyangu, ngarapayi kuluja wayitwankurlu.

<sup>31</sup> Palulurni wajarnu, ‘Mamalunta kulira nyinapayi, nyuntulun japilpayi. Nintilu

kulini, nyuntulu-jananyan manikamu wartakaja yungkupayi, martukaja, nyarrukaja. Palunyajanungku pukurlpa nyininpa.’

<sup>32</sup> Yarrarnurni wajarnu, Mamamili wikarrulu, Warrkamupurluka-jananya yiyala tawun Jupakarti!, yirna kujuya mankuraku, yini Pija, paluku yini kujupa Jayimunpa. Jii nyinin kujupakurnu mayangka Jayimunkurnungka, kiinkaja ngapirninpa. Jayimunmili maya jaalpu ngarinpa, kujungurruwati.’ <sup>33</sup> Wikarrulu jii wangka wajanyjangka, palunyangkarnangku pipurru mirrangu. Kunyjunyun nyuntu yanurni. Kuwarrila yulta Mamangka kujungka nyinaku.

Kujungkarringula nyininpa, nyuntumili wangkalaju kulilkura, Mamalunta nintinunyja, Maajalu.”

### *Pijalu-jananya nintilpayi, Juwuparnikaja*

<sup>34-35</sup> Pijalu-jananya wajalpayi, “Ngayulurna kulirni jilanya, Mama-lampa pukurlpa nyininpa yarngaku, mirta-lampaju Juwukuwiwayu

pukurlpa nyininpa, paki. Jampa martu Mamaku junga nyinaku, marninypungku, palunyangka Mama pukurlarriku, mirta-lampaju Juwukuwiyaju pukurlarriku, paki. <sup>36</sup> Mamalu-lampaju jakurlpa junu yanu, Juwukajaku. Jakurlku palunyakunyurra ninti nyininpa. Mamalu jilanya jakurljunu, martula kawalya Mamaku nyinara, Jiijajpa kulilkula maaja maju-lampa. <sup>37-38</sup> Jakurlpa jiinyaya parna Juutiyawanalu jakurljulpayi. Nintilunyurra kulirninpa, Jiijajpa Najarijmartaji parna Kaliliyawana nyinapayi. Julyju-jananya Jaanju nintilpayi, ka-jananya kalyungka jarrpajulpayi. Palunyajamu marlaya wangka jiinya parra wajalpayi, Jiijajpa maaja maju-lampa nyinapayi. Mamalura maparn maju yungu, palumili Kuurtelu jarrpajunu, palunyajamu murlpirrpa nyinapayi. Parlparrwanalu-jananya parra nintilpayi, ka wankalpayi-jananya ngarntakaja. Karlki kujupaku-janampa malpu payira kurtingkupayi, Mamamili maparnwintilu.

<sup>39</sup> "Jiijajju Juwumili ngurrawanalu-jananya parlparri parra wankalpayinirra, ngurra Jarujalumwanalurrju. Jilanyalaju kurulu nyakupayi. Palunyajamu Jiijajpaya wartangka nyilamunu wiltijunu, miturntanu. <sup>40</sup> Palunyajamu Mamalu mitujamu wankarnu, karrpu kujarrangka mitu ngarringu. Palujamu yutirringu-lanyaju martukajangka. <sup>41</sup> Mirtaya martulu yarnngalu nyangu, paki, karlkinkjuwiyajulaju martulu nyangu. Julyju Mamalu kulirnu, ngayunjulaju Jiijajpa mitujamu nyakuraku. Ngayunjulaju Jiijajja kujungka ngalangu marla, jampa

mitujanu wankarringu. <sup>42</sup> Palunyajanu Jijajju-lanyaju wajarnu, palunyamili wangkalaju parra jakurljulkuraku. Wangka jilanyalurrjulaju parra jakurljulkuraku, Mamalu jiinya Jijajpa maaja maju-lampa junu. Ngulaya mitukaja wankarriku ngaraku, wankakajalurru. Jijajju-lampa wajalku, karlki-jananya warukarti kurtingku, ka-jananya karlki, palumili ngurrikartu katiku. Jilanya-lampa wajalku, Jijajju, parlparriku. <sup>43</sup> Mamamili jakurlpurlukakajaluya jilanya wajalpayi, 'Jampa martuluya Kurayijpa kulilku, Mamakurnu kaja. Palunyangka Mamalu-jananya walykukaja warningku, ka kunyjunyunku kururnpa. Kurayijpa maparn maju murlpirrminyirri.'

### *Mamamili pilurrpa-jananya jarrpangu*

<sup>44-46</sup> Pijalu jilanya wajanyangka, Mamamili Kuurti-jananya jarrpangu Juwuparnikajangka, ka wangka kujupa kujupaya wangkapayi, Mamaya marninypungkupayi. Palunyangkaya Pijjamapuya kuru pakarnu, Jaapamartaji, Juwukaja, jumaji Mamamili Kurrurnpanjananya jarrpangu, Juwuparnikajangka.

<sup>47</sup> Pijalu-janampa wajarnu Jaapamartajiku, "Ngananyurra kulirninpa? Palyaya kalyungka ngaanpa jarrpaku? Yilta-jananya Mamamili Kuurti ngaanja jarrpangu, ngayunjala-yaju julyju jarrpangu, palunyayuruya."

<sup>48</sup> Palunyangka Pijalu wajarnu palunyakajaya kalyungka jarrparaku, jilanya, "Jumaji Jijajpa maaja maju-lampa, ngaankulurru."

nyininpa.” Palunyajanu Piijangkaluya wajarnu, nyinakuraku-jananya karrpuparaku karrpu.

## 11

*Pijjalu-jananya jakurljunkupayi Jarujalu-mungka*

<sup>1</sup> Juwuparnikajaluya Mamamili wangka kulilpayi. Jilanyaya kulilpayi jakurlpa karlki ku-jupamili, Jiijamili jakurlpurlukakajalu, Jiijamili walyjakajalulurrju, parna Juutiyawanalu. <sup>2</sup> Palumapungka, Juwuparnikajangka nyinapayi Piija, ka marlaku yanu Jarujalumkarti. Yanu jarrpangu kaya kuru wajarnu, Jiijamili walyjakajalu, Juwukajalu. <sup>3</sup> Jilanyaraya wajarnu, “Mirtan nyuntu Juwuparniwanangka nyinara ngalkura. Jurra-jananya! Nyaaku-jananyan yanu ngalangu?”

<sup>4</sup> Pijjalu-jananya jilanya wajarnu, <sup>5</sup> “Tawun Jupangkarna nyinapayi. Mamangkarnalu wangkangu, ka jukurrjurna nyangu, kalikiyuru maju tiputingu, ngarnawarrajantu. Kaliki jiinya kuuna puu wulikajarna nyangu, ruupuwintiyuru karrpirnu, kuunakaja. <sup>6</sup> Kalikingka palungkarna kintilu nyangu, kukaparnikaja, ngarriipayi, kaarnkakajayuru, wuukukajayuru, jilakajayuru, jilanya kukaparni laltu ngarriipayi. <sup>7</sup> Ngarnawarrajanturni wajarnu. Jilanyarni wajarnu, ‘Piija! Pakala puwa ngala!’ <sup>8</sup> Ngayulurnara wajarnu, ‘Maaja! Luwu-lampaju jilanya, mirtalaju ngalkurnin. Ngayurna parlanypa jiiyurukurna, mirta ngalkurninpa. Jiikajaya puta,

mirtarna ngalkurninpa.’<sup>9</sup> Ngayungkarni yarrarnu wajarnu, ‘Jiikajan palyalu ngalku, Mamalurnanta wajarni, mirtan jiikaja puta wajala!’<sup>10</sup> Jiiyururna yupalja kulirnu. Palunyajamu marlakuya yanu wulikaja, mirrkaparnikaja.

<sup>11</sup> “Palunyangkaya yanu ngarapayi, mayangka yawujayiti, Jijariyamartajikaja. Maaja Kuniliyajju-jananya kurtingu.<sup>12</sup> Mamamili Kuurtilurni wajarnu, mirtarna-jananya parlany ngaraku, kujungkalaju yankura. Palunyajanulaju yanu Kuniliyajmili ngurratu, ka jarrpangulaju nyinangu, Jupamartajilurrjulaju yanu wulikaja. Ngaangkaya ngarinpa, jii Jupamartaji Jijajmili walyjakaja, jikij wulikaja.<sup>13</sup> Kuniliyajju-lanyaju wajarnu, Mamamili wikarru nyangu. Jilanyalu wikarrulu wajarnu, Kuniliyajja, ‘Yiyala-jananya nyuntumili warrkamupurluka!, tawun Jupakutu, mankurakun Piija, yini kujupa Jayimun.<sup>14</sup> Jiilu-nyurranya Mamamili wangka nintilku. Palunyanyurra kulikku, ka Mamalunta wankalku nyuntun wulu nyinakura, nyuntumili walyjakajalurrju.’”

<sup>15</sup> Piijalu-jananya yarrarnu wajarnu, “Jungarna yanu Kuniliyajmili ngurrakutu, Mamamili wangkarna-jananya nintilpayi. Palunyangka Mamamili Kuurti-jananya jarrpangu, julyju-lanyaju ngayunja jilanya jarrpangu.<sup>16</sup> Palunyangkarna kulirnu, Jiijajju-lanya julyju wajarnu, ‘Jaanju-jananya kalyungka jarrpjulpayi, jilanyayuru ka ngulanga Mamalunyurranya palumili Kuurti jarrpjunku.’”

<sup>17</sup> Piijalu-janampa yarrarnu wajarnu, “Julyjula Jiijajpa kulilpayi, ka Mamalu-lanya jarrpajunu palumili Kuurti. Palunyayuru-jananya Mamalu kuwarri jarrpajunu Kuurti, Kuniliyajmapungka. Palunyangkarna wiya ngayulu marrkurnu Mama, mirta-jananya Kuurti jarrpajunkuraku.”

<sup>18</sup> Jiijajmili jakurlpurlukakajaluya kulirnu Pijjamili wangka, kaya yaka nyinapayi. Purtuya kulirnu ngaparrpaya wangkakuraku, mirtaya warrkirnu. Palunyajanuya Mama marninypungkupayi, jilanya, “Mama kunyjunyuminiryi nyininpa, Juwukaja-lanya wankarninpa, ka-jananya Juwuparnikajalurru wankarninpa, walykuya junkuraku, ka kunyjunyuya nyinaraku.”

*Jiijajmili      walyjakajaya      nyinapayi,  
Yantiyukangka*

<sup>19</sup> Juwukajaluya julyju Tiipanpa pungu. Palunyajanuya Jiijajmili walyjakaja yanu parlparri, mankujaku-jananyaya. Parna Pani-jiyakutuya yanu, parna Japurijkutulurrju, ka tawun Yantiyukakutulurrju. Juwukajangkaya-jananya yankura jakurljulpayi, Jiijajmili wangka, mirta Juwuparnikajangka, wiya. <sup>20</sup> Jiijajmili walyjakajaya yanu tawun Yantiyukakarti, Japurijmartajiya. Jiingkaya Jiijajmili wangka jakurljulpayi, Juwuparnikajangka, Kiriki wangkawintikajangka. Tawun jiikutu-jananyaya yanu nintilpayi Jiijajmili wangka, parna Jarinimartajilu.

<sup>21</sup> Palunyakajaluya Mamamili maparnwin-tilu parra nintilpayi, murlpirrju. Paluny-

januya Yantiyukamartajilu yarnngalu, martulu kulirnu, Jiijajpa maaja maju yilta.<sup>22</sup> Kulirnuya Jarujalummartajilu yiltaya Jiijajmili walyjarringu nyinapayi, Juwuparnikaja, yarnngaku-yarra, kujungka. Palunyajanu Panapajpaya kurtingu, tawun Yantiyukakarti.<sup>23</sup> Yanu tawun palunyakarti jarrpangu Panapajpa, ka nyangjananya pukurlarringu, jumaji Mamalu-jananya wankarnu pukurlmanu. Panapajju-jananya nintilpayi, wuluya junga nyinaraku, Jiijajku.<sup>24</sup> Panapaj jii yirna kunyjunyu nyinapayi, Mamamililu Kuurti jarrpangu. Jiijajkura junga wulu nyinapayi. Panapajku wangka jiimartajiluya kulirnu Jiijajku walyjarringuya nyinapayi, yarnngaku-yarra.

<sup>25</sup> Palunyajanu Panapaj yanu tawun Taajjakarti, Juulkura ngurrilpayi. <sup>26</sup> Juulpa manu ka marlaku katingu tawun Yantiyukakarti. Jingkapula Jiijajmili walyjakaja nintilpayi, rawalu yiyyangka kujungka. Ngurra jiingkaya wajalpayi, kuwarriwyajuya jilanya, "Ngaanpaya Kirijinpa nyininpa." Mirta jilanyaya七月 wajalpayi, pak.

<sup>27</sup> Palunyajanuya Mamaku wangka jakurlpurlukakajaya yanu tawun Yantiyukakarti, Jarujalumjanu, <sup>28</sup> Yantiyukangkaya jarrpangu. Ka jiikajangka kuju nyinapayi yini Yakapajpa. Yakapajjalu Mamamili Kuurtelu nintirnu. Palunyangka palu Yakapajpa ngarangu ka wajarnu, jilanya, "Ngurra parlparriwana ngula mayiparnirrikula, ka kalyuparnirrikulurrjula." Jilanya-janampa wajarnu Yakapajju. Wangka palunya yiltarringu, maaja Kulutiyajpa tayimu. <sup>29</sup> Mirrka pakirrijaku ka kalyu

pakirrijakulurrjuya kurranyi kujungkarringu, Jiijajmili walyjakaja, Yantiyukamartaji. Yakapajmili wangkaya kulirnukaya wangkangu maniya-janampa warningkura kaya, kurtingkura, parna Juutiyamartajiku, Jiijajmili walyjakajaku.<sup>30</sup> Maniya pirtijunu ka yunguya-jananya katirakuya, jaajiku maajakajaku. Juuljupula Panapajju mani palunya katingu-jananyapula yungu.

## 12

### *Yirutju Jayimij mitu pungu*

<sup>1</sup> Parna Juutiyangka maaja maju nyinapayi, yini Yirutpa. Jiijajmili walyjakaja-jananya mankura pungkupayi. <sup>2</sup> Maaja jiilura wajarnu Jayimijpa wakara junkuraku, nayipu warlpukur-ruwintilu. Jayimijpangara palunyanga Jaanku kurta nyinapayi. <sup>3</sup> Yiltaya Jayimijpa wakarnu junu. Palunyangkaya pukurlarringu Juwukaja kaya maajanga palunyanga marninypungku-payi. Palunyajamu maaja Yirutju kulirnu yarrara-jananya pukurlmankura. Ka-janampa wajarnu, yankuraya Piija mankura. Kaya yanu Piija manu, jantulwintikajalu. Murrarniya ku-jungkarrima turlku Pajuwupangka nyinakura. Palunyangkaya Juwukajalu mayi pikinpawutuparni ngalkupayi, Mama marninypungkuraku. Jilanyaya ngalkupayi mayi-janampa yini Pa-juwupa.

Palunya tayimungaya Piija manu katingu,  
<sup>4</sup> jiilja jarrpajunu, ka wulu kanyinma,  
 jantulwintikajalu, pinirrijakungkamarra.

Jilanyaluya kanyilpayi, puu wulikajalu, jirntu jarrpanyjangka. Puu kujupaluya kanyilpayi kutuwartirnikutu. Palunyajanu puu kujupaluya kanyilpayi jirntu pakanyjangka. Puu kujupaluya kanyinma karrpuwarti. Puu kujupaluya kanyilpayi jirntu jarrpanyjangka. Jilanyaluya Piija wiltulu kanyilpayi. Juwukajalu ngalangu mayi Pajuwupa wiyyarrinyjangka, maajalu kulirnu Piija katira ngarajunkura. <sup>5</sup> Piija jiilja nyinanyjanja Jijajmili walyjakajalu Mamangkaluya wulu wangkapayi, Piijaya mitu pungkujaku.

### *Wikarrulu Piija jiiljanu yiyyarnu*

<sup>6-7</sup> Piija mungajarrarrynja kunyala ngarriipayi, jantulwinti kujarrangka, kutungka, jiin kujarrakurlu. Kiitungka yawujayiti, kujarra kujupapula jantulwinti ngarapayi. Palunyangka mungangka maaja Yirutju kulilpayi, yungunjarrarrynja Piijaya katira maaja Juwukajangka ngarajunkura. Munga palunyangka Mamalu yiyyarnu wikarru, yanu rantara ngarapayi jiilja. Wikarru jiilu yanu Piija ngurnti pamphurnuka kanarnu. Kara wajarnu, “Pakala!” Pakarnu ngaranyjangka jiinpa kujarralu marajanu wupulyanuka parnangka punkarnu.

<sup>8</sup> Ka yarrarnu wajarnu, “Marra nanpangku yilpijula! Marra jakapiringkalu jarrpa!” Palunyangka Piijalungku manu nanpajunu, kalu jakapiringka jarrpangu. Kara wajarnu, “Kuurtungkalu jarrpa, yarrarni!” <sup>9</sup> Piijalu palunyanga

wikarrungkangalu wanarnu, ka ngurinyirrikati-payi, kapukurril kukalpayi. <sup>10</sup> Yankulapula jantulwintinga nyakula junkutikatipayi. Wululu-jananyapula nyakula junkutikatipayi. Yanupula kiitukutu, jiinya kiitungara walyja wupunarringu. Yanupula ruutuwatirringuka ngarapayi, ruutu jiingga tawunkutu maa yanu. Ruutu jii-wanapula yanu, ka Piija junu yanu, Mamamili wikarrulunga. <sup>11</sup> Pijjalu kulirnu, “Mirtarna kapukurririnin, Mamamili wikarrulurni yulta wala-junu yiayarnu, Mamalura wajanyjangka. Wala-junurni Yirutjurni pungkujaku, Juwukajalulur-rju.”

<sup>12</sup> Pijjalu yikira purtu kulirnukayila, yumur-ringukayila Miiriku mayakutu yanu. Miirira yipi nyinapayi, Jaan Maakku. Palunyangkangaya mayangkanga Jijajmili walyjakajaraya nyinapayi, Mamangkaluya wangkapayi. <sup>13</sup> Pijjalu yanu tuwuвати pungkupayi. Palunyangkayila wanti Ruuta kulirnuka pakarnu yanu, tuungka ngarapayi. Ruutanga wanti jiingga palunyangka mayangka warrkamurripayi. <sup>14</sup> Palunyangka Pijaku wangka kulirnuka-jananya marlaku pinirringu, karlkingka jakurljunu, tuwu wupuntamulparnilu. Wajarnu-jananya, “Piija yawujayiti ngarinpa!”

<sup>15</sup> Paki kararnuya, wantikuraya wajarnu, “Ngakumpayurulun paki kulirnin.” Kayila-jananya wiltulu wajarnu, “Yulta jii ngarinpa.” Karaya wajarnu, “Pijayuru, kujupa Mamamili wikarru, ngarinpa.” <sup>16</sup> Palunyangka Pijjalu wululu tuwunga pungama. Yumurringukaraya tuwu wupuntamunu. Nyangukaya kuru

pakarnu. Nyangukaluya kujungkarringu.

<sup>17</sup> Kayila-jananya maralu marrkurnu, yakaya ngararaku. Jakurljunu-jananya jiilja nyinanyjanjanu, Mamamili wikarrulu walajunu yiayarnu. "Yiltarni walajunu yiayarnu, Mamalu ngarnawarrapurlukalu." Yarrarnu-jananya wajarnu, "Yarraya-jananya jakurljula!, Jayimijjakamu Jiijamili walyjakajangka, ngayurni Mamalu walajunkunyajajanu." Jilanya-jananya Piijalu wajarnu, kayila pakarnu yanu.

<sup>18</sup> Yungun pakanyjangka, pakarnuraya purtu kulirnu, jantulwintikajalu. <sup>19</sup> Yirutjaluya jakurljunkunyjangka, kulirnuka-janampa wajarnu, "Yarraraya parra ngurrila!" Palunyajanuraya Piijaku purtu ngurripayi. Yirutju-jananya kujungkanu purtu japilpayi. Ka wajarnu-janampa palumili warrkamupurlukakajangka, "Jiikaja-jananya jantulwintikaja, mitu pungkura!" Palunyajamu maajanga Yirutpanga tawun Jijariyakutu tiwa yanu, wulu nyinapayi, parna Juutiyanga junu yanu.

### *Maaja Yirutpa miturringu*

<sup>20</sup> Palunyajamu-janampa Yirutpa maaja nyinangu wirrilyirringu, Taayamartajiku, Jayitanmartajikulurrju. Wirrilyirringu-janampa, ka-jananya mayi mirta yungkupayi. Kaluya maajakaja jiimartaji yanu maaja Pulajajja wangkangu. Maaja Pulajajpa jii Yirutmili mayakura warrkamupurluka nyinapayi. Maaja

Pulajajparaya yanu jilanyalu japiro, “Yarralampajura maaja Yirutpa japila!” Yuwajunukajananya jarrpajunu. Kaluya yanu maaja Yirutja wangkangu, “Kunyjunyu-lajungku wulu nyinaku. Mayikulajura purtu kulirnin.” Yirutju kulirnuka-janampa wajarnu, “Ngula karrpu kujupangkarna-nyurrranya wajalku.”

<sup>21</sup> Palunya tayimurrinyjanga maaja Yirutpanggalu kuut palyangka jarrpangu. Murrarniluya maaja majukajanga kuut palyangka jarrpapayi, jiiyangka palyangkalurrjuya, nyinapayi, wangka majuya wajalkuraku. Maaja Yirutpanga jarrpanguka nyinanguka-jananya wangkangu, martukajaya laltukuyarra kujungkarrynyjangka.

<sup>22</sup> Martukajaluya Yirutmili wangka kulirnu wiltulu wajarnu, “Mirta martunga nyininpa, yilta Mama ngarnawarrapurluka yuti nyininpa. Yilta Mama ngarnawarrapurluka-langku wangkin.” <sup>23</sup> Palunyajanu Mamamili wikarrulu Yirutpanga ngarntamanu, jumaji-jananya mirta marrkurnu. Wajalngara-janampa

“Mirtarna ngayu Mama ngarnawarrapurluka, paki.” Palunyajanuyila ngarnta maju ngarripayi, wilyjiwilyji, ka miturringu.

<sup>24</sup> Palunyajanuya martukajalunga Mamamili wangka kulirnuka, laltukuyarraya Jijajmili walyjarringu. <sup>25</sup> Panapajjukamupula Juulju parra wajalpayi, Mamamili wangka, kapula tawun Jarujalum junu yanu. Kayilipula yanu tawun Yantiyukakarti. Jaan Maakpapula manu katingu.

# 13

## *Panapajkamu Juulpa-pulanya yiyarnu*

<sup>1</sup> Jiijajmili walyjakajaya Yantiyukangka nyinapayi. Karlkiya Mamamili wangka jakurlpurluka nyinapayi. Karlkin kujupaya Mamamili nintipurlukaya nyinapayi, Mamamili wangka-jananyaya nintilpayi. Nintipurlukaya jiikaja, nyinapayi, yini Panapaj, Jimiyan. Jimiyan jii wajalpayiya yini kujupa, ‘Maru’. Karlki kujupangaya yini Lujiyaja jii Jarinimartaji, Juul, Manayin. Jiingara七月 julyju maaja Yirutkura warrkamurripayi. <sup>2</sup> Jiijajmili walyjakajalungaya Mama nyinara marninypungkupayi, mayi ngalkunyjaparnilu. Palunya tayimu Mamamili Kurrurnju-jananya wajarnu, jilanya, “Yiyalaya-pulanya!, ngayuku warrkamupula parra nintilku, Panapajjupula Juulju. Ngayulurna-pulanya witurnin, ngayumili wangkapula parra nintilkuraku.” <sup>3</sup> Palunyajanuluya wituka Mamangka wangkapayi, mayiparni. Palunyajanuya-pulanya mara junu, kaluya Mamangka wangkangu, kayilaya-pulanya yiyarnu.

## *Parna Jayipurijjapula parra wajalpayi*

<sup>4-5</sup> Mamamili Kurrurnju-pulanya nintirnu Panapajkamu Juulpa, kayilaya yanu tawun Jalijiyakarti, Jaan Maakpalurru. Jiingkaya tawunja puutungka tatirnu, yanuya parna Jayipurijkarti. Yanuya tiputtingu tawun Jalamijja. Jaan Maakju-pulanya ngampurru parra wanalpayi. Yanuya jarrpangu jaajingka, Juwumilingka, ka-jananyapula

nintilpayi, Mamamili wangka. Palunyajanuya jaaji laltuwana parra wajalpayi. <sup>6</sup> Parna Japurijpa kalyungka kutungka ngarapayi. Parna palunyawananaya kutuwana yankuraka jarrpangu, tawun Paapujja. Yirna yalyjirrpaa jiingka nyinapayi, yini Pajijaj, yini kujupaya wajalpayi, ‘Yilimaj’. Julyju yirna palunyalu-jananya yalyjirru kujupa kujupa jiimartajingga, nintilpayi. Jilanyalu-jananya pakiwana wajalpayi, “Ngayungarnara Mamamili wangka jakurlpurluka.” Palunga Juwu nyinapayi. Yanuluya kujungkarringu, Juulmapu.

<sup>7</sup> Yirnanga jiingara miirti nyinapayi, maaja majuku jiimartajiku, yini Jajajpulajaku. Jiinga Jajajpulajpa nintipuka nyinapayi. Jiilu-pulampa wajarnu Panapajkamu Juulku yankurakupula, palunyamili mayakarti, Mamamili wangkapulanya kulilkura. Palunyalunga wangkapulanya Mamamili kulirnuka pukurlarringu.

<sup>8</sup> Palunyangka Pajijajju kulirnuka marrkurnu, maaja jiimartaji Jajajpulajpa, kulira-pulampa junkura. <sup>9</sup> Palunyangkalu Mamamili Kurrurnpa jarrpanguka murlpirrmanu Juulpa. Yini kujupaya wajalpayi, ‘Puulpa’. <sup>10</sup> Puulju warrkirnu ka kuru wajarnu Pajijajpa. Jilanyara wajarnu, “Nyuntun malpukurnu, jungan mirta nyininpa. Wulun walyku nyinin, yalyjirrjun walykuwiyaju palyarnin. Mirtan Mamamiliwana wangkin, walyjalun kuliraka wangkinpa. Mamamili wangkan kuliraka kujupakartirnin. <sup>11</sup> Kuwarrinta pampurulku Mamalu, nyakunyjaparnin nyinamalpa karrpuparaku.” Palunyajanu yulta

pampururringu. Parra-jananya martukaja japilpayi, parraya winitiranku. <sup>12</sup> Maaja Jajajpulaju nyangu kuru pampururrinya, Jiijajkurnu wangkayila kulirnuka walyjarringu. Puulmili wangka七月 julyjujanu kulirnuka pukurlarringu.

*Tawun Yantiyukangkapula parra wajalpayi,  
parna Pijitiyawana*

<sup>13</sup> Puulmapuya tawun jiingga puutungkaya tatirnuka yanu, parna Pampiliyakarti, tawun Paakakarti. Jiingkanga-pulanya Jaan Maakju junu yanuka marlaku yanu, Jarujalumkart. <sup>14</sup> Palunyajanupula parna Pijitiyakarti yanu, tawun Yantiyukakarti. Jiingkangapula karrpu Jarritingka Juwukurnu jaajingga jarrpangu nyinapayi. <sup>15</sup> Jaajiku maajakajaluya riitamulpayi, Muujajku wangka. Palunyajanuya wangka kujupa riitamulpayi, Mamamili wangka jakurlpurlukalu七月 julyju wakanyjajanu. Jiikajaluya-pulanya wikarru yiayarnu japilkura. Jilanyaya japirnu, “Walyjalu-lanyajunpula mayiti Mamamili wangka nintilku? Mayitintapula七月 julyju Mamalu nintinyjajanu.”

<sup>16</sup> Puulju-jananya pakarnu maralu marrkurnu, yakaya nyinaraku. Nintilpayi-jananya jilanyalu, “Ngayunku walyjakajaluya Juwukajalu kulila!, karlkinjulurrju Mamamili walyjakajalu, Juwuparnikajalu. <sup>17-18</sup> Juwukajaku-lampa Mama ngarnawarrapurluka maju, maaja nyinin, Yijurilmili marlajanukajaku. Ngayunku mitunyjanirrikuwiyyaju-janampa wajarnu, palunyaku walyjakajaraya nyinaraku. Jiikuraya

walyjakaja lalturringu, jumaji-jananya Mamalu ngampurrju kanyilpayi, parna Yijipingka. Mama jiilu-jananya maparn majulu walyjakaja walarnu katingu, kalyuparniwana, pujimanwana. Rawalu-jananya katipayi, puuti yiya. Nyarrurringuka-jananya ngampurrju katipayi, yankularaya jurtarrikatipayi, Mamaku.

<sup>19</sup> “Palunyajanuya parna Kayinanja jarrpangu. Palunyamartajiya ngurra japan wulikajangka jaalpu jaalpu nyinapayi. Parna jiimartaji-jananya Mamalu pungkura wiichernu. Kajananya ngurra jiingka palumili walyjakaja junu, parna palunyangkangaya nyinangu walyjarringu. Rawaya nyinapayi, puu yantartan pipiti yiya. <sup>20</sup> Palunyajanu-janampa maajakaja junkupayi, Mamalu. Maaja-janampa nyinara wi-yarripayi. Palunyangka kujupa junkupayi. Jilan-yartukaya nyinapayi, maaja yarnnga. Maajakaja nyinaraya, maaja Jamiyul tayimurringu. Jiinga Mamamili wangka jakurlurluka nyinapayi.

<sup>21</sup> “Mitunyjanirrikajaluya japiroo Jamiyulpa, maaja kujupa-janampa kiingu nyinara. Palunyajanu-janampa Mamalu junu yini Juulpa, maaja maju-janampa wulu nyinangu, puuti yiya. Juulpanga jiinga nyinapayi, Kijaku kaja. Kijjamapungaya nyinapayi Pinjaminkurnu marlajanukaja. <sup>22</sup> Juulpanga payirnu yyarnuka maaja kujupa junu, yini Tayipitpa. Mamalu wajarnu jilanya, ‘Tayipitpanga yilta kunyjunyu nyininpa. Ngayulurnara pukurlarrinpa, Jiijiyiku kajaku. Ngayulurna wajanyjangka yirnilu palyarnin.’ <sup>23</sup> Jijajpanga yilta mitunyjarripurlukakura

Tayipitku marlajanu nyinapayi. Mamalu-lampa Jiijajpanga junu, wankalkura-langku, Yijurilmili marlajanukaja. Wankalkura-langku julyju-lanya Mamalu jamartapungu, Jiijajpa-lampa yiylakura.

<sup>24</sup> “Julyju-jananya Jaanju Yijurilmili marlajanukaja nintilpayi, Jiijajpanga marlawana yankurarni. Jilanya Jaanju-jananya nintilpayi, walykuwintikajalungaya walyku junkurakaya junga Mamaku nyinara. Kaya kalyungka jarrpara palyarrira palya nyinaku.

<sup>25</sup> “Jaanju-jananya wululu nintilpayi. Palunyajananu maaja kujupalu kulirnu jiilja mankura jarrpjunkura. Palunyangka Jaanju-jananya martukaja jilanya nintilpayi, ‘Nganarninyurra ngayu kulirni? Kurayijpa-lampa julyju jamar tapungu maaja-lampa yiylakurarni. Mirtarna ngayu maaja Kurayijpa, paki. Kurayijpa-lampa jii yankurni, maaja majuminyirri, karnara ngayu palumili warrkamupurluka.’”

<sup>26</sup> Puulju-jananya wituka wajarnu, “Walyjararranjuya kulila! Yipurammili walyjakala nyininpa. Wulikajaluya kulila!, karlki kujupalulurrju, Juwuparnikajalu, Mamamili walyjakajalu. Wulikajaku-lampa wangka kunyjunyu yiylarnu Mamalu, ngayunpala wankarrira. <sup>27</sup> Jarujalumumartaji martukajakamu maajakajaraya ngurrpa nyinapayi, Kurayijku, martukaja-langku wankalku. Mamamili wangka jakurlpurlukaluya julyju wakarnu, Kurayijpa yankurni. Jarriti kujupa Jarriti kujupaluya Jarujalummapulu pertuya kulilpayi, wangka palunyanga, riitamunyanjanu. Jiikajaluya wajarnuraya Jiijajpaya mitu pungkura. Wangka

palunyanga yiltarringu, Jijajpa miturrinyjangka.  
<sup>28</sup> Purturaya kulirnu Jijajpaya mitu pungkuraku. Mirta putamanu, wiya. Manngarripayiraya Jijajpaya pungkuraku, Payilatparaya muunpungkupayi.

<sup>29</sup> “Mitunyjarrikajalukamu Mamamili wangka jakurlpurlukaluya kulirnuka julyju wakara wanarnu, Jijajpaya mankura wartangka wiltijunku. Wangka palunyawanananga yiltarringu. Yiltaluya Jijajpanga wiltijunu miturntanu. Palunyajanuya wartajanu tipujunu katingu pirnkingka ngarrijunu.

<sup>30</sup> Palunyajanu Mamalu palunyanga wankarnu. <sup>31</sup> Palunyajanuluya palunyamilikajalunga karrpuparakungka nyakupayi, wanka parra yankunyjan. Julyjuya Jijajmili walyjakajaya Jijajjaluya kujungkarringulu yanu Jarujalumkart, parna Kaliliyajanu. Palunyakajaluya-jananya kuwarrilu parlparri parra wajarnin, Jijajmili wangka. <sup>32</sup> Ngayunjulaju-nyurranya jakurljuninpa wangka kunyjunyu Mamamili. Mama ngarnawarrapurlukalu-jananya julyju mitunyjanirringka jamartapungu, Kurayijpa mitujanu wankalkura.

<sup>33</sup> “Kuwarri Mamalu jilanyalu Jijajpa yulta wankarnu, mitujanu. Jilanyalu julyju, mitunyjarripurlukalu Tayipitju Mamamili wangka wakarnu. Turlku laltu wakarnu. Nampa tungka ngarrin jilanya.

‘Nyuntungan ngayuku kaja nyinin. Kuwarrirnanta maaja maju junu, martukajangka mirangka.’ ”

<sup>34</sup> Puulju-jananya wituka nintilpayi, “Yarrarnu-jananya wajarnu Mamalu, Jijaj Kurayijpa mitujuanu wankalku, mitu ngarrira kawu yurnarrijaku. Jilanya julyju wajarnu,

‘Ngayulurnangku jungalu palyalku, Maaja Tayipitkurnara ngayulu jungalu julyju pal-yarnu, palunyayuru.’

<sup>35</sup> Tayipitjulu wangka kujupa wajarnu, Mamangka. Jilanyalu wajarnu,

‘Mirta nyuntulu junku, nyuntumili warrkamupurluka, mitu ngarrira yurnarrijaku.’”

<sup>36</sup> Puulju-janampa wituka wajarnu, “Mitu Tayipit palunyangara Mamaku junga nyinangu, miturringu. Palunyangaya katingu mitunyjanirri karlkinjaya-jananya tuunyjunu.

Mitu yilta yurnarringu. <sup>37</sup> Martu kujupa mitujanu Mamalu wankarnu, mirta ngarringu yurnarringu. Martu palunyanga Jijajpa, Mamalu wankarnu, mitujanu. <sup>38-39</sup> Kulilaya walyjakajalu! Jijajpa-lampa kuju nyininpa. Jijajjuwiyyaju-lampalura walyku mankula wirrupunginpa. Palunyangkalaju-nyurrranya wangka palya kuwarri wajarnin, Jijajjuwiyyaju-langku wankalku. Julyju-janampa Muujajju Mamaku luwu wakarnu. Jilanya-lampa Muujajku luwu ngarinpa. Martu walykuwintilu kuka mirtayirti mankura pungkura, kara Mama yungkura, ngarnawarrapurluka. Jilanyaya

julyju Mama yungkupayi, palujanuya wulu walykuwinti nyinapayi. Yiipi martulu Muujajmili luwu wanalku, wulu walykuwinti nyinaku. Ka yiipi Jijajmili wangka kulilkuka Jijajjura walyku wirrupungku.”

**40** Puulju-jananya wituka wajarnu,  
 “Purrkaluya kulila!, jilanyarrijakunyurra.  
 Mamamili wangka jakurlpurlukalu julyju jilanya  
 wajarnu,

**41** ‘Karlkinjuluyurra Mama ngarnawar-  
 rapurluka jankani. Kulilaya! Purtu  
 kulilkunyurra nyinaku miturriku.  
 Ngayulurna-nyurrampa yalyjirru kujupa  
 kujupa ngapirninpa, kuwarri. Nyakuranyurra  
 purtu kuliklu. Palunyangka-nyurranya martu  
 kujupalu purrkalu kujupa kujupa nintijunku,  
 palunyangkaranyurra purtu kuliklu, wululu.’  
 Kulirnuya yakarringu, jiimartajilu.

**42** Palunyajanupula wangkangu wiyarringu,  
 Juwukurnu jaajingka. Palunyangkaya-pulanya  
 martu karlkilu japiro, Jarriti kujupangkapula  
 marlakurrira, wangka palunyayuru-jananyapula  
 nintilkura. **43** Laltu kujupangaya yanu  
 ngurra walyjakarti, karlkii kujupaluya-pulanya  
 wanarnu. Wanaraya kulilkura Mamamili  
 wangka, jiikajangaya Juwukajakamu Juwuparni.  
 Juwuparnikajangaya Mamakuraya walyja  
 nyinapayi. Palunyakajangka-jananyapula  
 wajarnu, “Wuluraya junga nyinama!, palulu-  
 nyurranya Mamalu ngampurru kanyilku.”

**44** Palunyajanuya Jarriti kujupangka martu  
 laltukuyarra kujungkarripayi, Mamamili  
 wangkaya kulilkura. **45** Martu laltukuya-  
 janampa Juwukaja nyangu wirrilyirringu, juma-  
 jiya mirta martukajaya-jananya kujungkarripayi  
 Juwukajangka. Kaya-pulampa Puulkukamu  
 Panapajku mikurringu. Palunyajanuya Puulpa  
 warrkirnuka pinyijunu. **46** Junkuparnipula

wulu wangkapayi, jilanyapula, “Juwukajaluya kulila! Mamalu-linyaju nintirnu Juwukajaliju-nyurranya kurraryilu nintilkura. Mirtanyurra jungalu kulirni, kuliranyurra junin, palujanu mirtanyurra wanka wulu nyinaku Mamamili ngurrangka. Palunyajanu juninpaliju-nyurranya. Yankuliju-jananya Juwuparniwana, parra nintilmal.

<sup>47</sup> “Mamalu-linyaju julyju wangka yungu. Jilanya nyininpa,

‘Yintarnurnanta manu, nintilkuran-jananya martu yarnngakuyarra, wankalkuran-jananya, Juwuparnikaja. Mungajarraya martulu tili nyakuka kujungkarrikuluya. Palunyayuru tiliyurun-janampa nyinaku. Nyuntungkantaya kujungkarrira ngayumili wangka kulilkuka wankarriku.’”

<sup>48</sup> Wangka jilanyaya kulirnuka pukurlarringu, Juwuparnikaja, kaya Mama ngarnawarra-purluka marninypungama, Juwuparnilurrjananya wankalkura. Laltuluya Jijajmili wangka kulirnukaya Jijajmilikaja yarnngarringu. Jiinga Jijajmilikajanga julyjungulyu-janampa wangka junu, Mama ngarnawarralu. <sup>49</sup> Palunyajanuya martukajalunga Mamamili wangka kulirnuka, laltukuyarraya Jijajmili walyjarringu.

<sup>50</sup> Tawun jiingka Yantiyukangka Juwu karlkinjuya-jananya maaja jiimartaji muunpungu, Puulkukamu Panapajku wirrilyiyapulampa nyinara. Jiingkangaya maaja Juwukaja yirnakajakamu Juwuparnikaja, wantikaja nyinapayi. Jiikajalungaya wantikajalunga Mama marninypungkupayi, Juwuyurulu.

Palunyangka jii maajakajalungaya-jananya muunpungu martu karlkinjuya-pulanya yiylalkura, parna kujupakarti, Puulkamu Panapaj.<sup>51</sup> Yanupula tawun yitiwanalu jakapiri yarrarnuka, wiilypungu. Murrarniluya Juwukajalu jilanyarninpa, martukajaya-jananya jankanyjangka. Palunyajanupula tawun Yakuniyamkartu yanu.<sup>52</sup> Jijajku walyjakaja, Yantiyukamartajiya pukurlarringu nyinapayi, Mamamili Kurrrurnpa-jananya jarrpanyjangka

## 14

### *Tawun Yakuniyamjapula parra wajarnu*

<sup>1</sup> Tawun Yakuniyamjapula yanu jarrpangu, Juwuku jaajingka, Puulkamu Panapaj. Jii kujarralu-jananyapula wangka Jijajmili nintilpayi. Wangkaya kulirnu Jijajmili kaya walyjarringu yarnnga, Juwukajakamu Juwuparnikaja. <sup>2</sup> Jiiku wangkakuya Juwu karlkinpa wirrilyirringu, kaya-jananya yanu muunpungkupayi wirrilyilu, Juwuparnikajangka. Palunyajanu ji-ikaja Juwuparnikaja-janampaya wirrilyirringu, Puulkukamu Panapajku, Jijajmili walyjakajakulluru. <sup>3</sup> Ngurluparnilupula wululu nintilpayi, tawunja palungka, Mamamili wangkapula murlpirrju wajalpayi. Mamalu-pulanya nintirnu yalyjirrju kujupa kujupapula ngapilkura. Martu jiimartajiluya karlkilu kulirnu jilanya, “Yalyjirr kujupa kujupa-lanyajupula nintirni. Yiltapula Mamaku wangka wajarnin. Yulta-lampa Mama nyarru nyininpa.” <sup>4</sup> Jiimartajiluya purtu kulirnu, karlkiya Puulkukamu Panapajku pukurlarringu,

karlkinpaya Juwukurnuku wangkaku pukurlarringu. <sup>5</sup> Palunyajanuya Juwu karlkikamu Juwuparni karlki kujungkarringu yaka wangkangu, pungkuraku-pulanyaya yiylakuraku purliwintilu, Puulkamu Panapaj. <sup>6-7</sup> Wangka jiipula kulirnu wala yanu tawun Lijarakarti. Jiingka kinti tawun Taapi nyininpa. Tawun palunya kujarrapula parna Lakuniyangka nyinin. Ngurra jiiwanapula parra wajalpayi, Jijajmili wangka.

*Tawun Lijarakamu Taapingkapula parra wajarnu*

<sup>8</sup> Tawun Lijarangka yirna mukuntu nyinapayi, jinangu wiya yankupayi. Palunya yirna mukuntu julyju nyinapayi, japuwartajanu. <sup>9</sup> Puulpa wangkapayi palunyangka mukuntulu kulilpayi. Puulju palunya nyakupayi mukuntu kulirnu, “Mamamili wangka kulirninpa. Y尔ta Mamalu kuwarri wankalku.” <sup>10</sup> Palunyangka Puuljura wiltulu wajarnu, mukuntuku, “Pakala yiki!” Palunyajanu pakarnu pipurru, parra yankupayi. <sup>11</sup> Jinangka parra yankupayi palunyangkaya laltulu nyanguka wiltulu wajarnu, Lakuniya wangkawintilu “Yiltapula jii kujarra ngarnkajamu yankupayi, palu kujarra, yini Jiyajakamu Yamijpa. Marturringupula ngarinpa.”

<sup>12</sup> Lakuniyamartajiluya laltulu marniny-pungkupayi, Mamayuru kujarra. Yini jilanyaya marninypungkupayi Jiyajakamu Yamijpa. Kulilpayiya, “Jii kujarrapula ngarnkajamu yankupayi.” Panapajpaya nyangu ka yini wajarnu, ‘Jiyaja’. Ka Puulpaya nyangu ka yini ‘Yamijpa’ wajarnu. Jilanyaya wajarnu Puulpa Yamijyuru

wangkapayi. <sup>13</sup> Jaaji, Jiyajaku tawunja yitingka ngarapayi. Yatilypa jiimartajilu pulukukaja kangu jaaji jiikarti, pungkura marninypungkuraku-pulanya Puulkamu Panapaj, puritipulawakajalurrju kangu. Katingu pulukukaja ngarajunu kiitungka jaajja, martuluuya pungkuraku, yarnngalu.

<sup>14</sup> Martu kujupalu-pulanya yanu jakurljunu, "Jaajingkaya pulukukaja kuwarri pungku, nyuntu kujarrantayapula marninypungkuraku, jumajipulan ngarnkajanu." Martukajapula wala pinirringu marrkurnu, jaartangkupula yarrpungkupayi. Juwukajalu jilanya murrarni jaarta yarrpungkupayi, martu karlkilu pakiwana kulinyjangka, martukajaluya nyakura junkuraku, pakiwanaya marninypungkujaku. Jilanya-jananyapula Puuljukamu Panapajju wajarnu, <sup>15</sup> "Nganangkamarranyurra puluku pungkukija? Mirta-linyajuyan marninypuwa!, martuliju nyuntunyuru. Yanuliju-nyurranya ngaakutu wajalkijalu wangka Mamamili kunyjunyu. Wajarninpaliju-nyurranya Jiaya, Yamijkamu junkura, marninypungkuparnilu. Jurraya minyjilypa!, Mama ngarnawarrapurlukawiyajunyurra marninypungkura. Jii maparnpa maju nyininpa, Mamalu jiilu ngarnka, parna kalyu ngapirnu.

<sup>16-17</sup> "Julyju-jananya Mamalu marrkulparni junkupayi, Mamakuraya yumu nyinara, martukaja. Mama jiilu-nyurrampa kalyu yiyalpayi, palunyajamu yukuri pakarni, mirrka wartangka. Palunyalu-nyurranya mirrka yunginpa pukurlpanyurra nyinara. Mama jilanya-nyurrampa

nyininpa. Mama julyjunyurra kulilngara, parnakamu kalyu nyangu. Yiltalu-nyurranya ngampurrju kanyirnin.” <sup>18</sup> Jilanyapula rawa wangkangu, mirtaya puluku pungkura, palunyangkaya junu.

<sup>19</sup> Palunyangkaya Lijarangka Juwu karlkipaya kuwarriwyaju yanu nyinapayi, tawun Yantiyukamartaji. Kujupakajalurrjuya kuwarriwyaju yanu nyinapayi, tawun Yakuniyammartaji. Tawun palunya Yantiyuka, parna Pijitiyangka ngarapayi. Jiikajalu-jananyaya Lijarampu martukaja wirrilyimanu, Puulku, yarnngaluya Puulpa purliwintilu yungkalpayi. Palunya parnangka punkarnuka ngarripayi, mituyuru. Mitu kararnuya Puulpa yilatingu katingu, tawunja yitingka wirrupungu, kaya junu yanu. <sup>20</sup> Jampa Puulpa ngarripayi, Jiijamili walyjakajaya kujungkarringu. Palunyajanu Puulpanga pakarnu yanu tawunkarti. Yungunjarrarrynjangapula Puulkamu Panapaj yanu ngaparti tawun Taapikutu.

### *Marlakurringupula Yantiyukakarti, parna Jiriyangka*

<sup>21</sup> Yanu-jananyapula Jiijamili wangka kunyjunyu nintilpayi, karaya martu lalturninguraya kulirnu nyinangu, Jiijakku. Palunyajanupula marlaku yanu yapurra, tawun Lijarakarti. Nyinangupula yumurringupula kayili yanu tawun Yakuniyamkart. Jiingkapula nyinangu yapurrarringupula yanu tawun Yantiyukakarti. <sup>22</sup> Ngurra jiiwana Jiijamili walyjakaja-jananyapula murlpirrmankupayi,

Jijajkuraya junga nyinaraku. Jilanyalu-jananyapula nintilpayi, “Mamalu-jananya palumilikajanga ngampurrju kanyirni. Palunyakajangkala-jananya kujungkarriku nyinaku, Mamakulara wulu junga nyinaku. Jiinju karlkinju-langkuya jankanyanja, jungalara wulu nyinaku.”

<sup>23</sup> Parna jiiwana-jananyapula yirnakaja junkura wanarnu, ngampurrju-jananya Jijajmilikaja kanyilkuranku. Tawun kujupangka-jananyapula junkupayi yupalpa, Tawun kujupangka yupalpa junkupayi. Wululu-jananyapula jilanyalungulyu junkupayi, yirnakaja. Tawun kujungka-jananyapula yirna junkukijalu mayi ngalkuparnilu kujungkarri-raluya Mamangka wangkapayi. Jilanyalupula wangkapayi, “Mama! Kulininpala Nyuntumili walyjakaja-lanyajun kanyirnin. Ngampurrju ngaakaja-jananya yirnakaja kanyila!”

<sup>24</sup> Palunyajanupula yanu ngaparti parna Pijitiyawana tawun Paakangka warinykatingu. Tawun palunyanga parna Pampiliyangka nyin-inpa. <sup>25</sup> Jijajmili wangkapula wajarnu, kapula tawun Yatilayakarti yanu. <sup>26</sup> Palunyajanupula puutungka tatirnuka kakarra marlaku yanu, tawun Yantiyukakarti, tawun jiingkangapula ju-lyju nyinapayi. Jiingkanga tawunjanga Jijajmili walyjakajaluya, Mamaya-pulampalura japirnu. Yiltalupula Mamamili warrkamu palyarnu wi-yarnu. <sup>27</sup> Yantiyukangkapula warinykatingu-jananyapula kujungkarnu, ka jakurljunkupayi, Jijajmilikajangka, Mamalu-pulanya ngampurrju

kanyilpayi. Jilanyapula jakurljulpayi Mamalu-jananya martukajangka yalyjirrju ngapilpayi. Jilanya-jananyapula wajalpayi, “Mamalu-linyaju nintirnu wanyjaljuliju-janampa Juwuparnika-jaku yiwarra wupuntamunu, Jijajkuya kuli-rakaya walyjarriira.”<sup>28</sup> Wulu-jananyapula nyinapayi, tawun jiingga, Jijajmili walyjakajangka.

## 15

### *Kujungkarringuya Jarujalumungka*

<sup>1</sup> Karlkinpaya Jijajmili walyjakaja tawun Yantiyukakarti yanu, parna Juutiyajanu. Warinykatinguya-jananya nintilpayi, Jijajmili walyjakaja jilanya, “Mitunyjarripurlukalulampa Muujajju wajarnu, murtilyakamu yirnakaja-jananyanyurra yirnamalkura. Yirnamankunyaparninga mirta Mamalu wankalku.”<sup>2</sup> Wangka palunyajanu Puulkamu Panapaj-janampapula wirrilyirringu, kajananyapula ngaparrju wajarnu, “Mirtajananyanyurra Jijajmili walyjakaja yirnamalkura.” Palunyangkaya-pulampa wajarnu yankuraya Jarujalumkartu kujungkarrira wangkara japilkurapula-jananya, martu karlkinjaya-jananya Yantiyukamartajingka, yankuraya Jijajmili jakurlpurlukakajangka wangkara, japilkura-jananyapula yirna jiimartajingkalurru.

<sup>3</sup> Palujanuya-jananya Yantiyukamartaji kujungkarringu, Jijajmili walyjakajaya-jananya yiyanu ngarran kujupa Jarujalumkartu. Puulkamu Panapajjaya-pulanya yanu. Parna

Panijiyyawanaya yanu parna Jamiriyakutu. Yanuya-jananya maa jakurljunkutikatipayi, “Kaya parna jiiwana Jiijajmili walyjarringu, lalturringu Juwuparnikaja.” Jiijajmilikajaya-janampa kulirnuka pukurlarringu, parna jiiwana. Yanuya tawun Jarujalumungka warinykatingu. <sup>4</sup> Puulmalu-janampaya nyangu pukurlarringu, Jiijajmilikaja, palunyamili jakurlpurlukakajakamu yirnakajalurru. Puulmapulu-jananyaya jakurljunu, Juwuparnikajaya yarnnga Jiijajmili walyjarringu, Mamalu-jananya maparn majulu martukaja wankarnu, kujupa kujupa-janampa palyarnu. Jilanyalu-jananyaya jakurljunu.

<sup>5</sup> Jiijajmili walyjakajalu karlkinjuya-janampa pakarnu wajarnu, Parajikajalu, “Juwuparnikaja-jananyanyurra jiikaja yirnamalku. Wajalkura-jananyanyurra Muujajku luwukuraya junga nyinaraku.” <sup>6</sup> Palunyangkaya Jiijajmili jakurlpurlukakajakamu yirnakaja kujungkar-ringu wangkangu. <sup>7</sup> Wululu-ngkuya ngaparrku paanypungkupayi. Palunyajanu Piijalu-jananya pakarnu wajarnu, “Walyjakajalurniya kulila! Julyjurni Mamalu yintarnu manu, yankurarna-jananya nintilkura, Juwuparnikaja, Jiijajmili wangka. <sup>8</sup> Mama-janampa pukurlarringu, jumajiya Jiijajmili wangka kulirnuka walyjarringu. Yulta Mamanga-lampa ngayunku laltukuyarraku ninti nyininpa. Yulta-janampa pukurlarringu-jananya palunyamili Kurrrurnpanga jarrpajunu. Ngayunja-langku julyju jarrpajunu, palunyayuru. Palujanurna kulini, Mama-janampa pukurlarringu.

**9** Mamanga-janampa layikamurrira nyininpa, Juwuparnikajaku, ngayunkuyuru-lampa. Walyku-janampalura yiltalu wirrupunginpa, Jiijajmili wangkaya yiltalu kulirnin.

**10** “Palunyangka, nganaku Mamaranyurra ya-jirninpa? Mirtaya Juwuparnikaja Juwuyuru nyinaku, Muujajku luwukuraya yumu nyinaku, mirtaya Juwuyuru nyininpa. Mitunyjanirrika-jaluraya purtu kulirnu, Muujajmiliku luwuku jungaraya nyinaraku, ngayunjulurrjulara purtu kulirnin. **11** Wangka palunyawanananyurra mirta kulinmal, maaja Jiijajpa-lampa wulu wulikajaku kunyjunyu-lampa nyininpa, Juwuparnikajaku, Juwukulurrju. Wulikajalula kulira walyjarrin-palara, wulikaja-lanya jiilu wankarninpa.”

**12** Palunyajanulu-jananyapula Puuljukamu Panapajju pakarnu jakurljunkupayi, Juwuparnikajaluya Jiijajpa kulirnu walyjarringuraya, Mamalu-pulanya maparn majulu murpirrmanu yalyjirrju kujupa kujupapula ngapilkura, nyakulaya kulilkura. Jilanya-jananyapula jakurljunkupayi, palunyangkaluya yakalu kulira nyinapayi. **13** Palunyajanupula nyinatingu. Jayimijpa kujupa pakarnu, wangkangu, “Walyjakajaluya kulila! **14** Jayimunju kuwarrilangku nintirnu, kurraryilu Juwuparnikaja Mamalu-jananya kulirnu, kuwarrilu-jananya ngampurrju manu kujungkanu, palunyamili walyjakaja. **15** Wangka palunyayuru julyujujanu ngarrinpa. Mamamili wangka jakurlpurlukalu jilanya wakarnu,

**16** ‘Ngulamparna-jananya marlakurriku, ngampurrju wumulku kanyilku, mitun-

yjarripurlukamiličaja Tayipitmiličaja.  
 Tayipitja martu marlajanu maajarna-  
 janampa parna parlparriku nyinajunku.  
<sup>17</sup> Palunyangkayilajuya Juwuparnikaja martu  
 laltukuyarrarriku, ngayuku walyjarriku,  
 kujungkarrikurniya. Julyjurna-jananya  
 kulilpayi ngayuku walyjakaja. <sup>18</sup> Jilanyarna  
 julyjurna-janampa ngayulu Mamalu wangka  
 junu.”

<sup>19</sup> Jayimiju wituka-janampa wajarnu,  
 “Mamamili wangka palunyala kulirnu,  
 Mama-janampa Juwuparniku pukurlarrini,  
 yiltaya Mama kulini. Palunyajanurna-  
 janampa ngayulu kulirni, Mirtala-janampa  
 putamanku, mirtala-janampa wajalku,  
 Juwukurnu luwungkaya nyinaraku, jiikaja  
 Juwuparnikaja. <sup>20</sup> Mirlimirlingkala-  
 janampa luwu yupalwiyaju wakalku, jilanya.  
 Juwuparnikajaluya murrarniraya mayikamu  
 kuka mirtayirti katiraluya yungkupayi  
 Mamayurungka. Palunyajanuluya mankura  
 ngurrangka katira ngalkupayi. Mirtaya  
 Juwuparnikajalu mayikamu kuka jilanyalu  
 ngalkunma!. Nyupa walyjakurluwiyajuya  
 ngarrima!. Kukaya pungkula miji yintilku  
 wiyalku. Palunyayururaya ngalkunma!  
 Kukakurnu mijiya mirta jikilku. Wangka  
 jiikajawiyajuya kulilkukaraya junga Mamaku  
 nyinaku, jumaji jilanyartuka Muujajku wangka  
 nyininpa. <sup>21</sup> Juwukajalula jilanya Muujajmili  
 wangka riitamurninpa. Muujajkurnu  
 wangkaya jilanyartuka riitamulpayi, Jariti  
 kujupa Jariti, parna parlparriwanalu,

Juwukurnu jaajikajangka. Muujajkurnu wangkalurrjuya parra wajalpayi, tawun kujupa tawun kujupawana. Palunyangkaya Juwuparnikajaraya walyja nyinaku Muujajku luwukuwiyaju, yupalku.”

*Mirlimirliya-janampa yiayarnu, Juwuparnikajaku*

<sup>22</sup> Miiting palunyangkaya-janampa kulirnu pukurlarringu, Jijajmilikaja, jakurlpurlukakajamu yirnakaja. Kulirnuya karlkiajananya yiayalkija, Yantiyukakarti. Puulkamu Panapajkamungkaya-pulanya yumurringuya-pulanya manu Juutajkamu Jayilaj. Juutajpa jii yini kujupaya wajalpayi, ‘Paajapaj’. Jii kujarrakuya-pulampa rawa pukurlpa nyinapayi, jiimartaji, Jijajmili walyjakaja. <sup>23</sup> Mirlimirliyapulanya wakarnu yungu yiayarnu.

Mirlimirlingkaya jilanya wakarnu, “Mirlimirlilaju-nyurrampa ngaa yiayarni, Jijajmili jakurlpurlukakajalukamu yirnakajalu. Ngayunpalaju-nyurrampa walyjakaja nyininpa. Jijajmili walyjakajakulaju-nyurrampa pukurlarinpa, Juwuparnikajaku. Ngurra parlparrwananyurra nyininpa, ngurra Yantiyukangka, parna Jiriyawana, parna Jilijiyawanalurrju. <sup>24</sup> Jakurlpalaju kulirnu, parna ngaamartajilu-nyurranyaya karlkilu yanu pakiwana wajarnu. Palunyajanunyurra juni walykurringu. Ngayunjulaju-jananya mirta yiayarnu. <sup>25-27</sup> Palunyangkalaju wangkangu martu kujarralaju-pulanya yiayarnu, maa yankula-nyurranyapula wangkaraku,

Juutajjukamu Jayilajju-nyurranyapula wangka mirlimirlingka ngaajanu jakurljunku. Kujungkaya-pulanya yanku Puulkamu Panapajja. Layikamurrialaju-pulampa nyinin, Puulkukamu Panapajku. Wululupula jii kujarralunga maaja Jijajmili wangka parra wajalpayi, jampaya-pulanya pungkukijarriipayi.

<sup>28</sup> “Mamamili Kurrrurnwintilulaju kulirninpa junganyurra nyinaraku, Muujajkurnu luwuku yupalkuwiwayu. Luwu-nyurrampa yupalpa jilanya nyinin. <sup>29</sup> Murrarniluya mayikamu kuka mirtayirti katiraluya yungkupayi, Mamayurungka. Palunyajanuluya mankura ngurrangka katira ngalkupayi. Mirtanyurra mayikamu kuka jilanyalu ngalkunma! Kukakurnu mijinyurra mirta jikilku. Kuka pungkula miji yintilkunyurra wiylaku! Jilanyayururaya ngalkunma! Nyupa walyjakurluwiwayunyurra ngarrima! Wangka jiikajakuwiwayunyurra junga nyinaku, kanyurra Jijajmili walyjakaja kunyjunyu nyinaku. Kulilkunyurra yiltalaju-nyurrampa pukurlarrin.” <sup>30</sup> Jakurlwintiya-jananya yiaynu.

Kayiliya yanu tawun Yantiyukangka kujungkanuya-jananya Jijajmili walyjakaja, kaya-jananya mirlimirli yungu. <sup>31</sup> Mirlimirli jiiya riitamunu pukurlarringu, wangka palya junga ngarringu. <sup>32</sup> Yantiyukangka laltu-jananyapula wululu nintirnu, pukurlmanu, Juutajjukamu Jayilajju. Jii kujarrangapula Mamamili wangka jakurlpurlukapula nyinapayi. <sup>33-34</sup> Rawa-jananyapula nyinangu, kapula marlaku yankukija. Wajarnuya-pulanya jiimartajilu,

“Yankunpula ngampurrpa, Mamaluntapula katinpa.”<sup>35</sup> Yanupula marlaku ngaparti, Jarujalumkarti. <sup>36</sup> Puulkamupula Panapaj wulu nyinapayi, Yantiyukangka. Kujungkaluya-jananya Mamamili wangka nintilpayi.

### *Puulkamupula Panapaj jaalpurringu*

<sup>36</sup> Ngulampa Puulju Panapajku wajarnu, “Yankurali Jijajmilimapukarti, julyjuli-jananya tawun jiiwana parra nintilpayi. Yankuli-jananya wangka kulilkul, wanyjalpaya nyininpa.” <sup>37</sup> Panapajju kulilpayi Jaan Maakpa katiraku. <sup>38</sup> Ka Puulju marrkurnu, “Jurra!, jumaji-lingku julyju junu yanu parna Pampiliyangka. Kujungkalula-jananya nintilngaranpa.” <sup>39</sup> Ngaparrpungku-langkupula wajarnu jaalpurringupula yanu. Panapajju Jaan Maakpa katingu. Puutjapula tatirnu yanu yapurra, parna Jayipurijkarti. <sup>40</sup> Puulju manu Jayilaj. Jijajmili walyjakajaluya Mama ngarnawarrapurlukaraya japiro, ngampurrjpulanya katira. <sup>41</sup> Puulkamupula kayili yanu parna Jiriyawana. Palunyajanupula parna Jilijiyawana yankupayi. Parna jiiwanalupula-jananya Jijajmilikaja nintira murlpirrmankutikatipayi.

## 16

### *Puulkamupula Jayilaj yanu*

<sup>1</sup> Puulkamupula yapurra yanu tawun Taapikutu, kapula yanu tawun Lijarakutu. Tawun Lijarangka, Timiti nyinapayi, Jijajmili walyja. Timitimili yipinga nyinangu

Juwu, Jijajmili walyja. Palunyamili mamanga kiriki wangkawinti nyinangu. <sup>2</sup> Timitikuraya pukurlarrira nyinapayi tawun Lijaramartajikamu tawun Yakuniyammartaji, Jijajmili walyjakaja. <sup>3</sup> Puulju Timiti kulirnu katiraku, kujungkalu-jananyaya parra wajalkuranku. Kayila katikijalu yirnamarnu, Juwukajaya jiiwana wirrilyirrijaku. Juwu jiiwanaluya kulilpayi Timitiku, mamangara Kiriki wangkawinti, Juwuparni. <sup>4</sup> Palunyajanuya tawun laltuwana parra nintilpayi-jananyaya, Jijajmili walyjakajangka. Nintilpayi-jananyaya luwu yupalpa, mirlimirlingkaya-janampa kurraryi yyiyanyjajanu, Jarujalumumartajilu, Jijajmili jakurlpurlukalukamu yirnakajalu. Wajalpayi-jananyaya jungaya nyinaraku, luwu jiikajaku. <sup>5</sup> Palunyajanuya Jijajmilikaja laltrurringu, parna jiiwana. Karrpu kujupangka karrpu kujupangkaya-jananya karlki kujupa walyjarriipayi.

### *Puulju kapukurrilu nyangu*

<sup>6</sup> Puulmapuya yanu kayili parna Purijiyawana. Parna jiiwana Jijajmili wangka-jananyapula parra wajalpayi, parna Kilijiyawananalurru. Mamamili Kuurtilu-pulanya marrkurnu, mirtapula-jananya parna Yayijawana nintilkura. <sup>7</sup> Parna Majiyangka yitiwanapula yanu. Purtupula yanu jarrpangu parna Pijiniyangka, Jijajmili Kuurtilu-pulanya ngampapungu. <sup>8</sup> Palunyajanupula parna Majiyangka yitiwana yapurrikarti yanu tawun Turuwajangka jarrpangu. <sup>9</sup> Mungajarra Puulju kapukurrinu

nyangu, yirna ngarapayi, Majatuniyamartaji. Wajarnura Puulku, “Yarrarni-lampaju ngayunmili ngurrakarti!, parna Majatuniyakarti, nintilkura-lanyaju.”<sup>10</sup> Puulju palunyanga kapukurrilu nyanguka, raatirringulaju, jumaji-lanyaju Mamalu wajarnu yankuralaju-jananya nintilkura, Jijajmili wangka kunyjunyu. Ngayurna-pulanya Luukpa kujungkarringu Puuljakamu Jayilajja.

### *Tawun Pilipayikartiya yanu*

<sup>11</sup> Puutjalaju tatirnuka junga yapurra yanu parna Jamujarikarti. Palunyajanulaju karrpu kujupangka yanu puutja tawun Niyapulajakarti, puutjanulaju tiputingu. <sup>12</sup> Palunyajanulaju jinangu kayili yanu tawun Pilipayikarti. Jiinga tawununga jantulwintikajalu palyarnu, julyju, Ruuman-martajikajalu. Tawun jiinga majuminyirri ngarapayi, tawun jiikajangkamarrangka-janampalura majuminyirri. Jiingkangalaju karrpuparaku nyinapayi. <sup>13</sup> Jarrittingkalaju yanu tawunja yitiwana. Kulirnulaju, “Mayitiya murrarni Juwukaja yankupayi palunyakartinga karrukarti, Mamangkaluya wangkakura.” Yanulaju-jananya nyangu karrungkanga wantikaja. Yanulaju-jananya nyinanguka wangkapayi. <sup>14</sup> Palunyakajangka-jananya wanti kuju nyinapayi, yini Litiya, Jayatayamartaji, Mamakura walyja nyinapayi. Palunyalunga kuluj maru-jananya jalamlukupayi. Jiilunga wantilunga Puulkurnu wangka kulirnuka Jijajmili walyjarringu, jumaji Mamaku

Kuurtilulu nintirnu. <sup>15</sup> Palunyajanuya-jananya Litiyamapu kalyungka jarrpajunu, palunyamili walyja karlkilurrju. Palunyajanu-lanyaju Litiyalu marrkurnu. Jilanya-lampaju wajarnu, “Kuwarrirna ngayulu yiltalu Jijajpa kulirnin, ngayumili mayangkaya yarra nyinama!” Jilanyalu-lanyaju marrkurnu, yanuyilalaju nyinapayi.

### *Jiiljaya nyinangu*

<sup>16</sup> Palunyajanulaju yankukija ngurra palukarti, karrukarti. Mamangkalaju wangkakija, kutungka-lanyaju warinykatingu, wanti malpuwinti, maajakajaku-janampa warrkamupurluka. Wantingkalu malpu nyinanyajanungka palunyangka-janampa wajalkatipayi ngulampanga yiltarriku. Wantiya jii parra katira nyinajunkupayi, martukajalu wantimili wangka kulira manira yungkuraku. Palujanu jiilu-jananya wantilu mani karlkinja mankura yungkuran maajakaja. <sup>17</sup> Puulmapungka-lanyaju wanalpayi, wantilunga wajalkatipayi, “Ngaakajaya Mama ngarnawarrapurlukaku warrkamupurluka, maparn majukuraya. Wajalkatinpanyurranyaya wanyjalpanyurra wankarriku, Mamakuranyurra walyjarriku.” <sup>18</sup> Jilanyajananya wanara wajalkatipayi, karrpu kujupa karrpu. Palunyangka Puulpara wirrilyirriraka pijirringu wajarnura, “Jijajmiliwintilurnanta maparnwintilu wajarninpa. Pakalalura yarra!” Palunyajanu pipurrulura malpunga pakarnu yanu.

**19-20** Wanti jiinga palyarringu nyinapayi. Palunyangkaraya maajakajalunga purtu kulilpayi, wanyjaljuya mani mankuran. Puulju wankanyjangka yumurringuraya wirrilyirringu. Palunyajanuya-pulanya Puulkamu Jayilaj winirnu katingu, maajakajakarti. Tawunja kutungkaya-pulanya katingu ngarajunu, kuutja. Tawunja kutungkaya murrarni mayinga payamunkupayi parlkarrangkaya-pulanya jüwati ngarajunu. Kaya-jananya kuutpurlukangka wajarnu, “Ngaa kujarrangapula Juwu kujarra, ngaamartaji-jananyapula jaarramurnin. **21** Ngaa kujarralu-lanyajupula marrkurninpa luwula Ruummili junkura, luwu kujupawintila nyinara. Ngaangkangala Ruumanmapu nyinin.” **22** Martu laltuya-pulampa wirrilyirringukaya-pulanya warrkira pungkupayi.

Kaya-pulampa kulujkaja yarrpungu wirrupungu, kuutpurlukakajalu. Kaya-janampa karlki kujupaku wajarnu wartawintiluya-pulanya yungkalku, Puulkamu Jayilaj. **23** Wululuya-pulanya yungkarnu katingu Jiilja jarrpajunu. Jiilku maajangkaluya wajarnu ngampurrju-pulanya kanyilkura. **24** Jilanyaluya wajanyjangka palunyajanuyila-pulanya katingu Jiilja kutungka nyinajunu, pakarapula yankujaku. Palunyajanu-pulanya jina kujarra, karrpirnu witurrpungu junu.

**25** Kutuwatirnipula Puuljukamu Jayilaj Mamangkalupula wangkara yinkalpayi, Mamapula marninypungkupayi. Jiiljaya laltu kujupa nyinanyjanjuya-pulanya kulilpayi. **26** Palunyangka parnakamu maya yurriyurringu,

palunyangka mayangka jiingga tuwukaja wupunarringu. Martukajangka-jananya yarnngangka jinajanukamu marajanu jiinkaja wupulyanu. <sup>27</sup> Jiilku maajayila kanarringu pakarnu nyangu tuwukaja wupunpa. Kulirnuyila ngurlurringu, "Jiiljanukajaya yulta pakarnu yanu, ngayukurnulu maajalurni mitu pungku." Palunyajanuyila palunyamili nayipu warlpukurru yilarnukangku wakalkijarringu. <sup>28</sup> Palunyajanu Puuljulu wiltulu wajarnu, "Jurrangku!, ngaalaju wamumpu nyininpa."

<sup>29</sup> Maaja palunyalu tili manuka, pinirringupulanya murti pupatinguka, tititipungkupayi. <sup>30</sup> Yitiwana-pulanya winirnu katingu-pulanya japiro, "Mamaturni wankalkura, wanyjal-mankurna?" <sup>31</sup> Wajarnurapula, "Kulila! Maaja Jijajkuran junga nyinaku, palunyajanuyilan wankarriku. Jijajpayilaya kulilkuka, nyuntumili walyjakajalurrju wankarriku." <sup>32</sup> Palunyajanuyila-jananyapula Jijajmili wangka nintilpayi, Jiilku maajangka, palunyamili walyjakajangkalurrju. <sup>33</sup> Palunyajanu-pulanya maajalu katingu ngarnta pantimulpayi. Palunyajanu-jananyapula mungajarra Puulju kalyungka jarrpajunu <sup>34</sup> Maajaluya-pulanya Puulkamu Jayilaj manu katingu mayangka jarrpajunu, kaya-pulanya mayi yungu. Ngalangukaya pukurlarringu, jumajiya kuwarri Jijajmili walyjarringu.

<sup>35</sup> Yungunjarrarryja kuutpurlukaluya-jananya ngalyikarrpilkaja wajarnu yiyarnu jiilkarti, yankuraya-pulanya yiylakura. Kaluya

wajarnu jiilku maajangka, jii kujarra-pulanya yiylaku. <sup>36</sup> Jiilku maajalu Puulkura wajarnu, “Pakalapula yarra! Kuutpurlukakajalurniya wajarnu, ‘Kunyjunyupula pakala yarra!’ Mamaluntapula ngampurrju katiku.”

<sup>37</sup> Ka-janampa Puulju wajarnu, ngalyikar-pilkajaku, “Paki. Kuutpurlukalu-linyajuya yankurni yiylaku, mirta-linyajuya yakalu yiylakura. Yankurni-linyajuya martu laltungka kurungka yiylaku, jumaji-linyajuya wartawintilu yungkarnu jarrpajunu. Mirtaliju putamanu, paki, ngayu kujarrangaliju Ruumanmartaji nyininpa.” <sup>38</sup> Palunyajanuya-jananya marlaku yanu wangka jakurljunu, kuutpurlukaka-jangka. Kuutpurlukakajaluya kulirnuka ngurlurringu, jumajipula Ruumanmartaji kujarra. <sup>39</sup> Palunyajanuya kuutpurlukakajaya yanu jiilkutu, kaluya Puulja wangkangu, “Yungkalparnilulajuntapula junkungara, pakiwanalulajuntapula yungkalpayi.” Palunyajanuya-pulanya yiylarnu, kaya-pulampa purrkarringu wajarnu tawunpa palunyapula junkuraka yankura. <sup>40</sup> Yumurringupula yanu Litiyaku mayakarti, jiingkaya mayangkanga Jijajmilikaja nyinapayi. Wangkangu-jananyapula murlpirrmanu junukapula yanu.

## 17

### *Jijaluniyakartipula yanu*

<sup>1</sup> Puulkamupula Jayilaj yulparirra yanu tawun Yampipulijawana. Kapula yanu tawun Yapuluniyangka warinykatingu.

Palunyajanupula wulu yapurra yanu tawun Jijaluniyangka warinykatingu. Jiingkapula yanu Juwukurnu jaajingka jarrpangu. <sup>2</sup> Puulpanga murrarni yankula jarrpapayi, Juwukurnu jaajingka, tawun kujupangka. Jurripalangka Jarritingka-jananya Puulju wululu Mamamili wangka nintilpayi, kaya ngaparrpa jafilpayiya. <sup>3</sup> Jilanyalu-jananya nintilpayi, "Mamamilingka wangka jilanya ngarrinpa. Kurayipanga yiltaya pungku. Ngarrikuka yilta marlaku wankarriku." Wituka-jananya Puulju jilanyalu nintilpayi, "Ngayulurna-nyurranya nintirnin martu kujupa, palu yini Jiijajpa, yilta Kurayipanga nyininpa, Mamalu七月 jamartapungu kurtinkuraku." <sup>4</sup> Juwu karlkinjuya Puulkurnu wangka kulirnuka Jiijajmili walyjarringu, kiriki wangkawintilurrju, jiikajangaya Mamaku walyjaraya七月 nyinapayi. Maaja wantikajalurrijuluya kulirnuka Jiijajmili walyjarringu. Martukaja yarnngaya-pulanya kujungkarripayi Puulkamu Jayilajja.

<sup>5</sup> Palunyangkaya-janampa Juwu karlkinpa wirrilyirringu, Jiijajmili walyjakajaku. Jurtarringuya-janampa kujungkarnu karlki kujupa, martu walykukaja. Palunyajanuya-jananya jiimartaji wirrilyinu. Jayijanku mayangkaya-pulanya kulirnu kukurripayipula Puulkamu Jayilaj. Palunyangkaya yurntturnu tuwu wupuntamunu jarrparaya-pulanya mankuraku. Kulirnuya, mankulaya-pulanya katira kuutja ngarajunkura. <sup>6-7</sup> Puulkukamu-pulampaya purtu ngurrirnu yumurringuya-jananya Jiijajmili karlki kujupa manu, Jayijanlurrju. Manuya-jananya katingu tawunku

maajakajangka ngarajunu. Ngarajunukaya-janampa wajarnu, "Jayijanju-pulanya ngaalu kanyilpayi mayangka Puulkamu Jayilaj. Jii lu kujarra-jananyapula martu yarnnga jaarramulpayi, tawun kujupawana tawun kujupawana. Kuwarripula ngayunkurnu tawunkarti yanurni. Ngaakajaya maaja Yukajajku luwuku parlanypa nyininpa. Jilanyaya wajarni, 'Maaja kujupa-lampa nyininpa Jijajpa.'"<sup>8</sup> Palunyajanuya-jananya wangkangu jiimartaji jaarramurnu, martukaja, maajakajalurrju. Warrkilpayi-ngkuya.<sup>9</sup> Maaja kuutpurlukaluya-jananya maniku japirnu, Jayijanmapu. Mani manuka-jananya wajarnu, "Puulkamu Jayilajpula kukurringu, mirtapula yanu. Palu kujarrapula yankunyjangkalaju-nyurranya mani marlaku yungku." Palunyajanu-jananyaya yiayarnu.

### *Puriyakartipula yanu*

<sup>10</sup> Mungajarraya-pulanya junu yanu, Puulkamu Jayilaj, Jijajmili walyjakajalu, Juwukajangkamarra. Ngapartipula yanu tawun Puriyakarti. Puriyangkapula warinykatinguka yanu Juwuku jaajingka jarrpangu. <sup>11</sup> Puriyamartajiya palya nyinapayi. Mamaku wangkakuraya kulira pukurlarripayi, mirtaraya parlanypa nyinapayi, Jijaluniyamartajiyuru. Karrpuparakuya karrpu Mamamili wangka riitamura nyinapayi. Puuljukamu Jayilajju-jananya Mamaku wangka nintilpayi, kayilaya ngurrirnu nyangu mirlimirlingka Puulju-jananya wajanyjajanungka. Kulirnuya, "Mayiti-

lanyangku wiyawana wajarnin.” Palujanuya mirlimirlingka nyangu. <sup>12</sup> Palunyajanuya jiimartajilu Jijajmili wangka kulirnuka walyjarringu, Juwukaja, Kiriki wangkawintikajalurru, jiinpaya karlkinpa wantikaja maajakaja. <sup>13</sup> Puulju-jananya Mamamili wangka tawun Puriyangka nintilpayi. Jijaluniyamartajiluya Juwukajalu jakurlpa kulirnuka yanuya Puriyakarti. Yanuya-jananya wirrilyinu Puulkukamu Jayilajku. <sup>14</sup> Palunyajanuya Puriyamartajilu Puulpa wajarnu yiayarnu, Jijajmili walyjakajalu, pungkujakuya, tawunkutu kalyungka yirrirringka. Jayilajkamupula Timiti tawun Puriyangka wulu nyinapayi. <sup>15</sup> Puriyamartajikajaluya Puulpa walarnu katingu yulparirra tawun Yajankarti. Puulju-jananya marlaku wajarnu yiayarnu, Jayilajjakamuya-pulanya Timitingka jakurljunkura. Jilanya-janampa wajarnu, “Yarrarnipula walayuru tawun Yajankarti!” Kaya-pulampa marlaku yanu Puriyakutu.

### *Yajanja Puulpa nyinangu*

<sup>16</sup> Puulpa-pulampa majalpayi tawun Yajanja. Wulu-jananya Puulju nyinara nyakupayi, Mamayuruya laltu ngarajunkupayi, marninypungkuraku. Jiimartajiluya-jananya laltu marninypungkupayi. Jumajiya Mama ngarnawarrapurlukaku ngurrpa, Puulju-jananya nyangu, nyarrurringu-janampa. <sup>17</sup> Palunyajanu Juwuku jaajikutu yanu-jananya wangkapayi. Nintilpayi-jananya Jijajmili wangka, Juwukajangkakamu

Juwuparnikajangka, kaya marlaku japilpayi. Jiiya Juwuparnikajaya Mamakuraya walyja nyinapayi. Tawunja kutungkalurrju-jananya wajalpayi, Jiijamili wangka. Puulju-jananya nyurilu wajalpayi, jampaya jiiwana karrujunkupayi, karlkiluraya japilpayi.

<sup>18</sup> Karlkiluya mitunyjarripurlukamili wangka nintilpayi, Yipikurujkurnu. Jiinjuya Puulpa warrkilpayi, karlkinjulurrju Juwikaku wangka-nintikajalu.

Jilanya-ngkuya japirnu, “Ngana wajarni, pakikaja?” Karlkinjuya wajarnu, “Mama kujupala marninypunkuraku wangkinpa, mirta mamakaja-lampa ngarnkajantu-lampa wangkinpa, paki.” Jilanyaya wangkapayi Puulju-jananya wajalpayi Jiijamila mitujuanu wankarringu. <sup>19</sup> Palunyangkaya katingu Puulpa kanjulkutu. Murrarniya kujungkarripayi yapu palungka wangka kujupa kulilkuraku. Karaya wajarnu, “Wajala-lanyaju wangka palunya! Nganan wangka wajalpayi? <sup>20</sup> Kuwarrilaju wangka palunya kulirnu, wangka kujupa kujupa. Nintila-lanyaju wangka palunya!”

<sup>21</sup> Yajanjamartajiya kujungkarripayi, kaya pukurlarripayiya wangka kujupaya kulilkuraku. Murrarniya kujungkarripayi wangka kujupa kujupaya wajaraka kulilpayi.

<sup>22</sup> Kanjulukajangka-jananya Puulju ngaranguka wajarnu jilanya, “Martukajalurniya kulila!, ngaamartajilu ngurralu. Ngayulurna tawunja ngaawanalu nyakupayi, Mama kujupayurunyurra marninypunkupayi.

<sup>23</sup> Mama kujupayurunyurra purlijanu ngapira

marninypunkupayi. Kujurna nyangu mama kujupa, yiniparni. Purli jiinya wakarnunyurra jilanya, ‘Purli ngaanyanyurra nyakura mama kujupa kulirni, yiniparni.’” Puulju-jananya yarrarnu wajarnu, “Mamayuru palunya yiniparni nintilkurna-nyurranya. Palunyakurayan ngurrpa, marninypunkurayan.

<sup>24</sup> Mama palunyalu parnakamu ngarnka, kalyukamu martulurrju ngapirnu. Mirta palunya jaajingka nyininpakamu purlingka, paki, palunga yulta murlpirrminyirri nyininpa, parnakukamu ngarkakulurrju, maaja.

<sup>25</sup> Mirtalara Mama ngapira parnajanu yunginpa, paki, palunyalu ngaanya parna ngapirnu. Mirrkakamu kukalurrju-lanya yunginpa, ka wanka kanyini-lanya. <sup>26</sup> Palunyalu yirna kuju ngapirnu, palunyajanuya martuya laltu yarnngarringu. Martuya laltu wangka kujupa kujupa-jananya ngapirnu, nyinajunu parlparri. Mamalu-jananya karlki parna kujupa kujupangka nyinajulpayi, ngurra walyjangka, warrarn kujupangka. Mamalu-janampa kurtingkuni kalyu tayimungka, palunyajanu-janampa yukuri pakarni, mirrka wartangka. Mamalu-janampa tayimpa kanyirni. <sup>27</sup> Mamalu-jananya jilanya mangarri yungkupayi, martukajaluya palunya kulilkura jilanya, ‘Yulta Mama ngarnawarrapurluka nyininpa, mangarri-lanya yunginpa. Yulta-lanya kulini, mirta-lampa yurtuyurtu nyininpa.’” Puulju-janampa yarrarnu wajarnu, “Mirta-lampa Mama yurtuyurtu nyinani, wirrirli, paki, ngamu-lanya nyinani, kulini-lanya.

<sup>28</sup> Kujupalu julyju wajarnu, ‘Mama-lanya nyinani, palunyangkala wanka nyininpa.’ Nyuntunku-nyurrampa mirlimirlipurlukalu wajarnu jilanya, ‘Mamakulara jijikajayuru nyininpa.’

<sup>29</sup> “Mamalu-lanya ngarnawarrapurlukalu wanka nyinajunu, mirtala kulilkura palunya purlijanukamu kuulujanu, paki, mirtaya yalyjirru ngapirnu mama purlijanukamu kuulujanu, wiya, paki. <sup>30</sup> Julyjuya martukaja Mamakuraya ngarnawarrapurlukaku ngurrrpa nyinapayi. Palunyangka-jananya Mamalu mirta pungkupayi, jampaya nyinapayi wuumurru, junkupayi-jananya. Kuwarri Mamalu-lanya nintirni parlparringka walykukajala junkura, kala Mamaku junga nyinara. <sup>31</sup> Mamalu-lanya ngula kuutja ngarajunku, walykukajajananya wajalku wiyalku. Kuutja jiingka Jiijajpa maaja nyinaku, Mamalu wajarnu. Palunyangka tayimja Jiijajju-jananya wajalku jungalu, walykukajangka. Julyju Mamalu maaja maju Jiijajpa wankarnu, mitujanu. Ngayunjulaju ntilu kulirnu Mamalu palunya mitujanu wankarnu, ka maaja maju nyinajunu kuutja.”

<sup>32</sup> Jilanyaya kulirnu Jiijajpa mitujanu wankarringu, karlkiya nyurni yikarringu. “Wiya, paki wajarni.” Karlki kujupaluya wajarnu Puulja, “Karrpu kujupangkalajunta kulilku.” <sup>33</sup> Palunyangka-jananya Puulju junu yanu. <sup>34</sup> Karkiluya wanarnu kaya kujungkarrira wangkamaya. Karlkiluya kulirnu Jiijajku wangka junga, jiingka kuju nyinapayi yini Tiyunijiaypa, maaja palunyamartajiku,

wantiyila yini Tamariyajpakamu martu  
karlkinpalurruju.

## 18

### *Tawun Kurinyjikutu Puulpa yanu*

<sup>1</sup> Palunyajantu Puulpa tawunpa Yajanjanu junu yanu, ka tawun Kurinyjikutu yanu. <sup>2</sup> Ngurra jiingka nyanguka kujungkarrungupula nyupararrapula, Juwu kujarra. Yirna palunya yini Yakuwila, Puntujmartaji, ka wanti palunya yini Pirijila. Palu kujarrapula parna Yitalijanu yankupayi, tawun Ruumjanu. Juwukajaya tawun palunya junu yanu, maaja Kulutiyajjananya wajarnu yiyanru. <sup>3</sup> Puulpa-pulanya yanu kujungkarringu nyinatingu, murrarniluya tiinpa kaliki ngapilpayi. Palunyajanupula nyinangu tiinpa ngapilpayi. <sup>4</sup> Palunyangka tawunja jaajingka Juwukurnungka Puulpa jarrpangu nintijulpayi-jananya. Wangkara warnipayingkuya murrarni, Jarriti kujupangka Jarriti kujupangka. Jilanya-jananya Puulju nintilpayi, Juwukajangkakamu Juwuparnikajangka.

<sup>5</sup> Palunyangkapula yankupayi ngurra Majatuniyajantu, Jayilajkamu Timiti. Ka Puulju-jananya Juwukajangka nintilpayi karrpuparakungka karrpuparakungka. Nintijulpayi-jananya Jiijajpa yiltaminyirri Kurayijpa nyinani, Mamalu nyukurni jamartapungu yiylalkija. <sup>6</sup> Puulpaya Juwukajalu

wirrilyilu warrkirnu, palunyangka Puulju-jananya parna juturnu. Palunyangka jilanya-jananya Puulju wajarnu, “Nyamu! Ngayulurna-nyurrranya junku yankuni. Palunyarnantaya nintijunkupayi jungalunyurra kulinngara, Mamalu-nyurrranya ngula wajara kurtingku. Nyamu! Yankurna-jananya Juwuparnikaja nintijunku.”<sup>7</sup> Ka junu-jananya yanu Titiyaj Jajajku ngurrakutu nyinapayi. Yirna palu Juwuparni Mamaku walyja nyinapayi. Palumili maya Juwukurnu jaajingka kinti ngarapayi.<sup>8</sup> Yirna kujupa tawunja jiingka nyinapayi, yini Kirijpaj, Juwukurnu jaajiku maaja nyinapayi. Yirna palunya Puulkurnu wangka kulirnu ka Jijajku walyjarringu, palumili walyjakajalurru. Jiimartajiya laltu kujupalu kulirnuka Jijajku walyjarringu, kalyungkaya jarrpangu.

<sup>9-10</sup> Palujanu mungajarrarringu ka Puulju kapukurrinu. Ka kulirnu Mamalu jilanya wajarnu, “Ngurluparni wulungulyu wangkama!, mirtan yakarri! Ngayu kujarrali kujungka ngaraku, pungkujakuntaya kujupalu. Ngaangkaya nyinani karlki kujupa, kaya kulilku wangka ngayumili ka walyjarriku.”<sup>11</sup> Puulju-jananya wululu nintilpayi, Mamaku wangka wantajarra kujarrangkayuru.

<sup>12</sup> Puulpa ngurrangka palungka nyinapayi, maaja Kaliyu nyinapayi, palu tayimu. Kaliyunampa parna Yakayamartajiku maaja nyinapayi. Palujanuya Juwukajalu winirnu Puulpa katingu kuutkarti. Kuutku maajangkaluya jakurljunu jilanya,<sup>13</sup> “Yirna ngaalu-jananya markurni Juwukaja Muujajkurnu luwuya junkura,

kaya Mama marninypunkuraku yiwarra kujupa kujupawana, Jijajmili wangka.”

<sup>14</sup> Puulpa ngaparrpa wangkakijalu ka maaja Kaliyulu-jananya marrkurnu, Juwukaja jilanya, “Juwukajaluya kulila! Wangka jilanyayururna wiya kulirni, mirtarna wajalku. Mayitpi ngaalu ngulyulu mankujaku, mayitpi yirna kujupa pungkujaku, palunyangkarna ngayulu wajanngara, ngaa jiilkarti yankuraku.

<sup>15</sup> Wirrilyirrinparanyurra ngaaku, jumaji wangka kujupa nintini. Nyuntukurnu luwu warlangkuninpa, palunyanyurra wirrilyirrinpa. Nyurrartinju-ngkuya palyamala!, ngayurna wiya, ngurrpa.” <sup>16</sup> Maajalu kuutja-jananya warrkirnu kurtingu. <sup>17</sup> Palujanuya Juwukajalu yanu Jajiyarpa wirrilyilu winirnu, kaya kuutkutu katingu. Jajiyarpa jii Juwuku jaajiku maaja nyinapayi, kanguya kuutja yawujayiti pungkupayi, wartawintilu. Kaliyulu kulirnu junuka yumu nyinapayi, wiya-jananya marrkurnu.

### *Puulpa Yantiyukakarti yanu*

<sup>18</sup> Palujanu Puulpa wulu nyinapayi, tawun palungka Kurinyjingka. Nyinanguka Jijajmili walyjakaja-jananya junu yanu, kaya yanu tawunu Kinkiriyakutu, wulikaja Pirijilakamu Yakuwila. Yanuya tawun Kinkiriyakutu jarrpangu. Palunyangka Puuljungku kata katupungu. Murrarni-ngkuya katupungkuni Mamakuraya junga nyinaraku. <sup>19</sup> Puutjaya tatirnu tawunu Yipajajkutu yanu tiputingu. Puulju-pulanya junu yanu ka Juwuku jaajingka

yanu jarrpangu. Jaajingka Puulju-jananya wajalpayi Jijajmili wangka Juwukajangka, kaya marlaku japilpayi. <sup>20-21</sup> Wangkamaya wulu kaya palumartajilu Puulku wajarnu, “Ngayunjalyaju nyinama!” Palunyangka wajarnu, “Wiya, yaninparna. Mayitpirni Mamalu ngula wajalku kurtingku. Palunyangkarna ngayu marlakurriku.” Palunyangka Puulpa tatirnu puutungka ka tawun Jijariyakarti yanu.

<sup>22</sup> Ka palungka tawunja tiputingu, ka Jijajmili walyjakajangka-jananya kujungkarringu. Puulpa-jananya wangkangu ka tawun Yantiyukakarti yanu. <sup>23</sup> Wulu nyinangu ngurra palunyangka ka yanu parna Kilihiyawana, parna Purijiyawananalurru. Tawunparakungka parra yankupayi, nintilpayi-jananya Jijajmili walyjakaja murlpirrminyirriya wangkaraku, nyinarakulurru.

### *Yapulujpa Yipajajkarti yanu*

<sup>24</sup> Palujanu yirna kuju Yapulujpa tawun Yipajajkutu yanu nyinangu, palunya Juwu nyinapayi, tawun Yalikijantaramartaji. Wangka kunyjunyu-jananya nintilpayi, nintipukalu. Mamakurnu wangkakura nintiminyirri nyinapayi. <sup>25</sup> Jaanju-jananya julyju kalyungka jarrpajunu ka nintirnu. Jaankurnu wangkakura ninti nyinapayi. Jijajmili wangkalurrujananya jakurljulpayi, ngurrpa ngurrpalu, mirta kulirnu, Mamalu palumili Kuurti martukajangka jarrpajunkuraku. <sup>26</sup> Yapulujjananya jaajingka murlpirrju nintilpayi, Juwukurnnungka. Palunyangkapula Pirijilakamu

Yakuwilalu kulirnu ka katingupula palumili ngurrakarti, nintirnu Jijajmili wangka junga nintilkura. <sup>27</sup> Yapulujpa jiingka nyinangu, ngurra Yakayakutu yankukija kulirnuka wangkangu. Palujanuya Jijajmili walyjakaja pukurlarringu wajarnu, "Yuwa. Palyan yanku parna palukarti. Mirlimirli-lajungku wakalku, katiku-jananyan nintilku. Mirlimirlingkaya nyaku nyuntuku-ngkuya pukurlarriku." Jilanyaraya wakarnu yungu. Ngurra palukarti yanu Yapuluj, ka-jananya nintijulpayi, Jijajmili walyjakaja. Murlpirrmanu-jananya. Jiipurlukaya pukurlarringu kaya ngampurru kanyilpayi, Jijajmili walyjakajalu. Jiipurlukaya julyju walykuwinti nyinapayi, ka Mama-janampa nyarrurringu, ka kunyjunyu-janampa nyinapayi, palujanuya Jijajmili wangka kulirnu. <sup>28</sup> Jiimartaji Juwukajangka-jananya Yapulujju nyurilu murlpirrju wajalpayi jilanya, "Jijajpa yiltaminyirri Kurayijpa nyininpa, Mamalu julyju jamartapungu yiylkjija." Purtuya kulirnu japilkijara, marlaku.

## 19

### *Puulpa Yipajajkarti yanu*

<sup>1</sup> Yapulujpa tawun Kurinyjingka nyinapayi. Palunyangka Puulpa yapuwana yanu, tawun Yipajajja jarrpangu. Puulju-jananya nyangu kujupakaja, Jijajmili walyjakaja ka kujungkarringu-jananya. <sup>2</sup> Japirnu-jananya, "Julyjunyurra Jijajmili walyjarringu, kaji jarrpangu-nyurranya, Mamamili Kuurti?"

Wajarnulya, “Paki. Mamamili Kuurtikulajura ngurrpa, mirtalaju kulirnu.”<sup>3</sup> Puulju-jananya japirnu, “Kajinyurra kalyungka jarrpangu?, Jijajmili walyjarringu?” Wajarnulya, “Jaanju-jananya kalyungka jarrpjunkupayi, palunyayuku-lanyajuya kalyungka jarrpjunkupayi.”<sup>4</sup> Puulju-jananya wajarnu jilanya, “Jaanju wajarnu, ‘Walykuya jurraka junga nyina! Palunyangka kalyungkarna-nyurranya jarrpjunku.’ Yarrarnu-janampa wajarnu, Jaanju Yijurilmili marlajanukajaku jilanya, ‘Kujuparni marlakarti ngayungka yanku. Palunyanyurra nyakura ka kulikku yilta Mamamili.’” Palujanu Puulju-janampa wajarnu, palunya Jijajpa julyjurni yanu.

<sup>5</sup> Wangkaya jilanya kulirnuka wajarnulya, “Jijajpa-lampa yilta maaja nyininpa, jilanyalaju kulirninpa. Palunyangka-lanyaju kalyungka jar-rpajula!” Palunyangkaya kalyungka jarrpangu.  
<sup>6-7</sup> Puulju-jananya maralu pampurnu wanarnu. Palunyangka Mamakurnu Kuurti-jananya jar-rpangu, kaya wangkapayi, wangka kujupa ku-jupa. Mamakurnu wangkalurrjuya wajalpayi. Yirna tuwal wulikajaya nyinangu, wantikajalur-rju.

<sup>8</sup> Puulpa Juwuku jaajingka yanu jarrpangu. Wululu-jananya murlpirrju nintilpayi, yupalja wirlarrangka. Jilanya-jananya wajalpayi kaya ngaparrju jafilpayi. Nintilpayi-jananya, Mamalu-janampa ngampurrju kanyilkuraku, palumili walyjakaja.<sup>9</sup> Karlkinjuya mirta kulirnu wangka Jijajmili, parlanyarripayiya.

Puulpaya nganarnpungu Jiijajmili wangkawinti, palujanu Puulju-jananya Jiijajmili walyjakaja katingu maya kujupakarti. Maya jiingka-jananya martulu yini Tayiranajalu julyju nintilpayi, palumili walyjakaja. Palungkaya mayangka Jiijajmili walyjakaja kujungkarriipayi, karrpuparaku karrpu. Jiingkaya wangkama Jiijajkurnu wangka. Puulju-jananya wululu jiingka nintilpayi. <sup>10</sup> Jiingkaya kujungkarringu nyinangu rawa, yiiya kujarrangka. Kayilapaya martukaja jiimartaji wangkaya kulilpayi Jiijajmili, kaya walyjarrima. Parna Yayijamartajiluya Juwukajalukamu Juwuparnilulurrju kulinma Jiijajmili wangka.

*Malpulu-jananya pungu kurtingu, martu japan wulikaja*

<sup>11</sup> Palunyajanu Puulju kujupa kujupa yalyjirru ngapilpayi, Mamamili maparnju. <sup>12</sup> Palunyangka Puulmili yangkijikamu wara mankupayiya, kaya kangkura pampulpayi ngarntakaja, martukaja, kaya kunyjunyurripayi. Malpuwintikajaya kunyjunyurrima, yangkijiwintilu-jananyaya jampa pampulpayi. <sup>13</sup> Karlkinpaya Juwukaja parra yankupayi, malpuwintikaja payira kurtinkura, maparnwintilu. Jilanyaya malpu payira kurtinkukijalu wajalpayi, “Ngayulurnanta payirni maparn Jiijajmilu. Pakala yarralura! Jilanya Puulju-jananya wajarni, kayila ngayulurnanta wajarni.” <sup>14</sup> Yatilypa maju Kiipalu japan wulikaja kaja kanyilpayi. Palu kajaparakuluya yankura malpukaja payira kurtinkupayi. Jilanyaya

malpuwinti kujungkaluya wajarnu, “Ngayunjulajunta payirni maparn Jiijajmililu. Pakala yarralura!”

<sup>15</sup> Malpulu-janampa wajarnu, “Ngananyurra wajarni? Nintirna-pulampa Jiijajkukamu Puulku. Ngananyurra nyunturtinpa?”

<sup>16</sup> Martu palu malpuwintilu-jananya pakarnu kurtakaja pungku. Kulujkajalurrju-

janampa warlangu kaya nikitpala pinirringu, mijikurlu. <sup>17</sup> Jilanya-jananya malpulu pungunyjangkaya kulirnu Yipajajmartaji ngurlurringu, Juwukajakamu Juwuparnikaja,

kaya Jiijajpa kuju marninypungu. <sup>18</sup> Karlkinjuya Jiijajmili walyjakajalu nyuwanju kulirnuya kaya jakurljunu Jiijajmili walyjakajangka,

jumajiya walyku nyinapayi, kaya jungarringu. <sup>19</sup> Karlkin kujupaluya mirlimirlikaja manu kaya kujungkanu kampangu warungka. Mirlimirli

palunyaya kanyilpayi walyku, malpumili, martu kujupaya pungkupayi. Kaya tilirnu warungka, yarngaluya kurulu nyangu. Mirlimirli

palunyaya julyju payamunu mani majuwintilu, pipiti jawujun talawintilu. <sup>20</sup> Palunyangkaya

martumapukuyarraluya kulirnu kaya Jiijajmili walyjarringu.

### *Yipajajjaya wirrilyirringu*

<sup>21</sup> Palunyangka Puulju kulirnu tawun Jarujalumkarti yankukija, parna Majatuniyawana ka parna Yakayawananalurrju. Palunyalu-jananya jilanya wajarnu, “Jarujalumkuturna yanku, karna tawun Ruumkartu yanku.” <sup>22</sup> Puulju-pulanya

kurtingu walyja kujarra, Timitikamu Yirajajpa parna Majatuniyakarti, Jijajmili wangka-jananya nintijulkura. Puulpa parna Yayijangka wulu nyinama, tawun Yipajajja.

<sup>23</sup> Palunyangkaya yarnnga kujupa wirrilyirringu Puulku, jumaji Jijajmili wangka nintijulpayi. <sup>24</sup> Tawunja jiingka Yipajajja ngarapayi wanti Tayanaku jaaji. Ngururipa jaajingka ngarapayi Tayana, Mamayuruya yankula marninypungkupayi, kuulujanuya ngapirnu. Palunyangka yirna kujulu yini Timitiriju ngapilpayi jaaji julikaja. Jaaji julikaja jiinya Tayanaku jaajiyuru ngapilpayi, jilpajantu. Martukajaluja jaaji julikaja palunya payamulaya kaya kati ngurra walyjangka marninypuwa. Yarnngaluya mankupayi mani maju, Timitirijmapulu, palumili warrkamupurlukakajalu. <sup>25</sup> Karlki kujupaluya jilpangka warrkamurripayi, Timitiriju-janampa mirrangu kujungkanu, palumili warrkamupurlukalurrju. Wajarnu-jananya jilanya, “Yarnngaluya kulila! Ngayunpala jilpangka warrkamurrinpa. Jilpa palunyala jalamaninpa kala maju mani maninpa, jiikunyurra ninti nyininpa. <sup>26</sup> Martu yarnngangka-jananya Puulju wajarnu marrkurnu, ‘Wiyanyurra marninypuwa!, purli kuulujanukamu jilpajantu, Mamayuru.’ Yilta Puulju-janampa wajarnu, palunyangkaya martukajalu mirta payamulkuranpa, manilampa pakirriku. Martukajalu yarnngaluya kulirnuya Puulpa kaya mirta payamunkupayi, ngaamartajilu ka parna Yayijamartajilu.

<sup>27</sup> Martukajaluya mirta-lampaya payamunku jilpakaja ka yaalurrikula?, warrkamupa-lampa pakirriku. Yarnngaluya martukajalu Yayijamartajilu marninypunginpa Tayana ngarnkajantu, ka parna kujupalulurrjuya. Yaalurrikula? Tayana ngaa minyjilyarriku, palumili mayalurru.”

<sup>28</sup> Wangka jiinyaya kulirnu, kaya wirrilyirringu, ngarnkangka mirrapayi jilanya, “Tayana-lampajuku murlpirrpaa, maparn maju yilta, Yipajajmartajiku.” <sup>29</sup> Palujanu yanuya-jananya karlkinpa jaarramunu, wirrilyiwintilu, kaya yarnnga karlkinpa wirrilyirringu Yipajajmartaji. Puulku walyja kujarra-pulanyaya yanu winirnu Kiyajkamu Yarajakajpa, palunya ku-jarrapula parna Majatuniyamartaji. Yankupay-ilupula kujungka Puulja. Winirnu-pulanyaya katingu parlkarrakarti, murrarniya kujungkarrima, palungka. <sup>30</sup> Puulju kulirnu yankura jananya wangkara marrkulkura. Palunyangkaya Jiijajmili walyjakajalu marrkurnu, ka wajarnuya, “Mirta-jananya marrkula!, jurra!” <sup>31</sup> Maaja karlkin kujupaluraya kurtingu mirlimirli, Puulmili walyjalu. Wajarnuraya mirta parlkarrra palungka yutirrira, pungkujakungkamar-ray. <sup>32</sup> Parlkarrangka palungkaya kujungkar-ringu kaya mirrara-ngkuya warrkilpayi jurtalu. Karlkin kujupaluya purtu kulilpayi, “Nyaakuya mirraninpa?” <sup>33</sup> Juwukajaluraya wajarnu maaja Yalikijantaku yankura purantakutu. Palujanu karlkin kujupaluya kulirnu, “Mayiti jiilu-jananya maaja Yalikijantaluu jaarramunu.” Palunyangka Yalikijantaluu-jananya maralu marrkurnu, mar-

tukaja yakarrirakuya. Purtu-jananya mar-kurnu.<sup>34</sup> Kaya yintarnu, “Jingga maaja Yalik-ijanta Juwu ngarani.” Kaya wulungulyu wiltu mirrapayi, “Tayana-lampa kuju maparn majuminyirri, Yipajajmartajiku.” Jilanyaya mirrangu rawa puri yapurrikartijanu puri kakarrakartirringu, “Tayana-lampajuku murlpirrpa, maparn maju yilta, Yipajajmartajiku.”

<sup>35</sup> Palunyajantu-jananya tawunku maajalu-jananya yakamanu. Kaya yakarringu wajarnu-jananya, “Yipajajmartajiluya kulila! Martukaja wirrirlijanulurrjukamu ngaamartajilu nintirayan Tayanaku, maparn majuminyirri nyininpa, ngaangkala Tayanaku jaajpa ngampurrju kanyirni. Purli palunya punkarnu-lanya ngarnkajantu, palunyala ngampurrju kanyirni. Jilanyaya martu yarnngalu kulirni, nintilu. <sup>36</sup> Karlkilu-langkuya purtu warrkilku, ngayunjula mirta paki kanyirni. Palunyangkanyurra wiya martukaja pungkuraku, jurraya! <sup>37</sup> Palunyangkapula ngaa kujarralu mirta Tayana nganarnpungu, paki. Ngaa kujarralupula mirta Tayanaku wartakaja ngulyulu kangu, ngurrapapula. <sup>38</sup> Palunyangka Timitirijmapuya yankura kuutja wangkaraku, mirta ngaangka. Kuutjaya yarra wangkama!, kuutpurlukangkaluya, kuwarringa yupunpa. <sup>39</sup> Mayitpinyurra wangka kujupa kulirninp, wangkakija. Majalaya ngulaku miitingku yiltakumarta! <sup>40-41</sup> Kuwarrila kujungkarringu warrkirnu-langku, palunyangka kapamanjulangku warrkiljaku, kuutja. Palunyangkala purtu kuliljaku ngaparrpa wangkakura.

Jilanyangkamarra ngurrakutuya yarra!"

## 20

### *Puulpa parna Majatuniyakarti yanu*

<sup>1</sup> Palunyajantu Puulju-jananya martukaja, Jiijajmili walyjakaja wangka kurtingu, yankuraya kujungkarrira. Kujungkanu-jananya ka Puulju wangkangu-jananya murlpirrmanu. Wangkangu-jananya junu yanu parna Majatuniyakijakarti. <sup>2</sup> Parna paluwana yankura ka Jiijajmili walyjakaja-jananya wangkara murlpirrmankupayi, tawunpartu tawun kujupakaja. Palujantu parna Kirijikarti yanu. <sup>3</sup> Parna palungka Puulpa nyinangu wirlarra yupalja. Puulju kulirnu puutja tatilkija, parna Jiriyakartiku. Palujantu Juwu karlkinpa kujungkarringu jaalpu wangkapayi, Puulpaya pungkukijalu. Puulju jakurlpa kulirnu, pungkukijaya. Palunyangka jinangu yanu, marlaku parna Majatuniyawana. <sup>4</sup> Kujungkaya yanu Jupata Puriyamartaji, Pirajaku kaja. Karlkin kujupa yiniya Yarajakajpa, Tikuntaja tawun Jijaluniyamartaji, Kiyajpa tawun Taapimartaji, Timiti. Tijikajpula Turupimaj parna Yayijamartajipula. <sup>5</sup> Jilanyaya yanu tawun Taruwajukutu, kaya Taruwajungkaya majarnu ngayurtinku. <sup>6</sup> Ngayurtinpalaju Luukpakamu Jiijajmili walyjakaja kujupa tawun Pilipayingka nyinapayi. Tawun palungkalaju Juwukurnungka turlkungka nyinapayi. Turlku palunyangka murrarniya Juwukajalu yinkalpayi, ka mirrkaya ngalkupayi, pikinpawutuparni,

ka Mamaya marninypungkupayi. Turlku palungkalaju nyinangu ka puutungka tatirnu, tawun Pilipayilaju junu yanu. Puutjalalu payip karrpupararakungkalaju yanu tawun Taruwajungka warinykatingu. Kujungkarringulaju-jananya Puulmapungka kujungka wiikingkalaju-jananya nyinangu.

*Puulju-jananya tawun Taruwajungka nintil-payi*

<sup>7</sup> Kujungkarringulaju Jaantingka mirrka ngalangu ka kulirnu, Jijajkurnu wangka, jiimartajilurrju. Puulju-lanyaju wululu nintirnu kutuwatirringu, jumaji yungunpa yankukijalu. <sup>8</sup> Maya majungkalaju nyinapayi, ngarnawarrangka, layitikajawinti. <sup>9</sup> Kujungkalaju nyinara kulilpayi, warrinyji kujulu, yini Yutikajju. Wintangka palungka nyinangu kunyalarringu, Yutikajpa, jampa Puulpa wulu wangkapayi. Palujanu Yutikajpa wintajanu maya ngarnawarrajanu punkarnu, parnakutu. Tiputinguya, kaya nyangu mitu ngarripayi. <sup>10</sup> Puulju tiputtingu yampurnu ka wajarnu-janampa, “Mirtanyurra yulama!, ngaanga mitujanu wanka ngarrini.” Yilta wanka nyinapayi. <sup>11</sup> Palujanu Puulju tatirnu mirrka ngalkupayi. Wulu-lampajuku wangkapayi, yungunkarti. Palunyajanulaju yanu. <sup>12</sup> Warrinyji palunya wankarringu kaya pukurlarringu, kangu ngurrakarti.

<sup>13</sup> Puulkulajura kurranayirringu puutja tatirnu yanu tawun Yajujakarti. Tawun palunyangkalaju kulirnu Puulpa tatijunkukijalu.

Julyju Puulju-lanyaju kurraryinu ka marla jinangu yankurakurni. <sup>14</sup> Tawun Yajujangkalaju kujurringu ka Puulpa puutja tatirnu. Kalaju kujungka yanu puutja tawun Mitilinikarti. <sup>15</sup> Mitilinilaju junu yanu kalaju yanu parna Jiyujawana yirritingka ka mungarringu. Wululaju yanu tawun Jamujakarti mungarringu. Palujanulaju yanu puutja tawun Yipajajpalaju nyangu junu yanu. Kalaju yanu mungarringu ka yungunarringu. Kayilapalaju tawun Malitajja yanu jarrpangu. <sup>16</sup> Tawun Yipajajjalaju yanurranpa mirtalaju tiputingu. Puulju kulirnu, mirta nyinaraku parna Yayijawana, jumaji junga yankupayi wala Jarujalumkarti, Jarujalumja turlku yini Pintikajja nyinakija.

*Yipajajmartajingka-jananya*                            “*Palulyu*”  
*wajarnu*

<sup>17</sup> Tawun Malitajjalaju tiputingu, ka Puulju kuju martu kurtingu wangkawinti, Jiijajmili maajakaja-jananya kangkurakurni, Yipajajmartaji. <sup>18</sup> Kulirnukaya Puulkartiluya yanu. Puulju-jananya wajarnu jilanya, “Julyjula kujungka nyinapayi, Yipajajja, palujanu nintijunyurra ngayuku. Julyjurna parna Yayijangka jarrpangu nyinapayi junga, Mamaku ngarnawarrapurlukaku. <sup>19</sup> Ngayurnara junga nyinapayi Mamaku, palunyangka Juwukajajuya parlanypaminyirri nyinapayi, warrkilpayirniya. Jaalpuya wangkapayi ngayurniya pungkuraku. Karlkinjuya Jiijajmili wangka kulirnu, kaya marlaku yanu walykukarti. Palunyangkarna-janampa ngayu yulama. Ngayurna junga wulu

nyinama Mamaku, karna marninypungama, mirtarnaju walyja marninypungama. Wu-lurna Mamaku warrkamupurluka nyinapayi. <sup>20</sup> Wulurna-nyurranya nintilpayi wangka kunyjunyu, mirtarna kurntarrira junkupayi. Nyuntunkurnu ngurrangkarma-nyurranya nintilpayi ngurra kujupangka ngurra kujupangka. Jilanyakunyurra ninti nyinapayi.

<sup>21</sup> “Yarnngangkarna-nyurranya nintilpayi Juwukajangkakamu Kiriki wangkakajangka. Marrkulpayirna-nyurranya walykunyurra junkura ka Mamangkanyurra junga nyinara, maajangka Jiijajjalurrju. <sup>22</sup> Kuwarrirna Jarujalumkarti yaninpa. Mamamili Kuurtilurni nintirnu tawun palukartirna yankuraku. Tawun palungkarniya wanyjalmanku? <sup>23</sup> Purturna kulirni, wanyjalmankurniya? Jilanyarna kulirni. Mamakurnu Kuurtilurni marrkurnu, mayitpirniya warrkilkukamu pungku, mayitpirniya jiilja jarrpajunku. Jilanyarni marrkurnu tawun kujupangkakamu tawun kujupakajangka. <sup>24</sup> Jiikurna mirta ngurlurri, pungkurakurniya mitu. Jiijajkurnara wulu junga nyinamalpa. Ngayulurna kulini Mamakurnara warrkamu ngapilkku. Maajalu Jiijajjurni wajarnu palu warrkamurnara ngapilkura. Jilanyarni Jiijajju wajarnu, ‘Martukaja-jananya nintijula!, ngayumili wangkaya kulira junga nyinaraku, ka-janampa Mamalu walykukaja nyarrurrikuka warningku.’

<sup>25</sup> “Ngayulurna-nyurranya nintilpayi jilanya. Mamalu-nyurranya palumili walyjakaja ngampurrju kanyirni, palumili walyjakaja

kujupakajalurrju. Jilanyakunyurra ninti nyininpa. Kuwarrirna yaninpa, nintilurna-nyurrampa wajarni. Mirtarna-nyurrampa ngula marlakurriku, paki, mirtarna-nyurranya wituka nyaku, paki. <sup>26</sup> Palunyangkarna-nyurranya marrkurni jilanya. Mayitpinyurra martu karlkinju Mamamili wangka kulira nyinara ka ngula junku. Palunyangka Mamalu-nyurranya ngula kuutja kurttingku, purtulunyurra jilanya kajalku, ‘Puulju-lanyaju mirta nintilpayi Jiijajku.’ Jilanya mirtanyurra wajalku, ngayulurna-nyurranya junga nintilpayi. <sup>27</sup> Mamamili wangkarna-nyurranya wulikaja jungalu nintilpayi, mirta yaapurna-nyurranya nintilpayi.

<sup>28</sup> “Palunyangka ngampurrpaya nyinama!, wuluraya Mamaku, karlki kujupalu-nyurranyaaya yankura nintijuljaku, wuumurru. Jiijajmili walyjakajalurrjuya-jananya Yipajajmartaji ngampurrju kanyila, maaja jungalu!, Mamamili Kuurtilu-nyurranya junu maajalu-jananyanyurra jungalu kanyilkura. Jiijajmiliya walyjarringu palukaja jumaji-janampa Jiijajpa miturringu, miji-janampa yintingu. <sup>29</sup> Nintilurna kulirni. Karlkinparniya yanku kaya pakiwana wajalku-nyurranyaaya. Palunyangka ngampurrpaya-janampa nyinama! <sup>30</sup> Yiltarna-nyurranya wajarni. Karlkinjuya walyjakajalu pakiwana nintilku. Palujanu Jiijajmili walyjakajaluya karlkinju kulilkuya kaya kujungkarriku-jananyaaya maaja palukajangka, nintipurluka walykukajangka. <sup>31</sup> Palunyangka ngampurrpaya

nyinama!, palunyakajangkamarra. Mirtanyurra manarrarri!, maajalu-jananya kunyjunyulu kanyila! Jilanya kunyjunyulu kulinma! Ngayulurnanya maaja kunyjunyulu nintilpayi, wululu, karrpungka mungangkalurru, jurri yijjakarti. Martu karlkiluya purtu kulilpayi ngayurna-janampa yulapayi nyarrukajaku. Palujanu maajaluya-jananya kunyjunyulu kanyila!

<sup>32</sup> “Kuwarrirna ngayu yankuni, Mamaluntaya ngampurrju kanyilku. Mama-nyurrampa nyarru nyininpa, mirta-nyurranya junku yanku. Palumili wangkanyurra kulilku ka murlpirrpanyurra nyinaku. Jilanya-nyurranya wulu ngampurrju kanyilku, Mamalu, palumili walyjakaja kujupayuru.” <sup>33</sup> Puulju-janampa yarrarnu wajarnu, “Ngayurna parlanypa nyinapayi kulujpa kujupakukamu manikulurru, mirtarna-jananya japilpayi ngurrangka nyakuraka. <sup>34</sup> Walyjarnaju warrkamurrrira mani mankupayikamu kulujpa, jilanyakunyurra ninti nyinani. Kujungkalaju ngayunpa yankupayi, palunyangkarna-janampa payamunkura yungkupayi. <sup>35</sup> Jilanyakayururna nyinara warrkamurripayi, kajunyurra ninti nyinapayi karninyurra nyakupayi. Palunyayuruyan warrkamurrrira nyinaku. Jilanyakayurunyurra warrkamurrrira ka mani-jananyanyurra yungkura, karlkinpa nyarrukaja. Maaja Jijajju julyju wajarnu jilanya, ‘Martu nyarrukaja-jananyanyurra yungkura, kanyurra yulta pukurlpa nyinaku.’”

<sup>36</sup> Wangkangu jilanyakayuru Puulpa. Palun-

yangkaya kujungka pupatingu, ka Jijajjaluya wangkangu. <sup>37</sup> Palunyangkaraya yulapayi, kaya Puulpa yampurnu kaya nyunyjurnu kurtingu. <sup>38</sup> Kujilarringuraya Puulku jumaji mirta marlakurrikijalu wajarnu. Palujanuya wanarnu kujungka puutukarti.

## 21

### *Puulpa Jarujalumkarti yanu*

<sup>1</sup> Yipajajpurluka martukajalaju-janampa wajarnu, "Palulyu". Junu yanulaju-jananya, ka puutja tatirnu. Jungalaju yanu parna Kuujuwana ka mungarringu. Palunyajanu parna Ruutuwanalaju yanu tawun Patarangka jarrpangu. <sup>2</sup> Jiingkalaju tiputingu ka ngurrirnu puutu kujupaku ka tatirnulaju parna Panijiyakutu yankukija. <sup>3</sup> Tatirnulaju yanu parna Japurijpa nyangu. Nyakuralaju kakarrarringu yanu parna Jiriyakarti, tawun Taayangkalaju jarrpangu. Palujanu puutpurlukalu-janampaya wartakajakamu mirrka junu-janampaya. <sup>4</sup> Jiingkalaju tiputingu ka ngurrilpayilaju-janampa, ka kujungkarringu, Jijajmili walyjakajangka. Palungkalaju-jananya ngurrangka nyinangu kujungka, wiikingka. Mamamili Kuurtilujananya nintilpayi palumartaji, kaya Jijajmili walyjakajalu kulirnu, karaya Puulku wajarnu, mirta Jarujalumkarti yankuraku. <sup>5</sup> Puutu yankukijalu palunyangkalaju yanu tatilkuraku. Jijajmili walyjakajalurrjulaju yanu palumili nyupakajalurrju, jijikajalurrju. Yanulaju

kalyuwarti parnangka yirritingka pupangu, ka Mamangkalajulu wangkangu.<sup>6</sup> Wajarnulaju-jananya, “Palulyu.” Ka puutungkalaju tatirnu, palunyangkaya ngurratu marlaku yanu.

<sup>7</sup> Tawun Taayajanulaju yanu tawun Talamay-ijakarti. Tawun jiingkalaju tiputingu ka Jiijamili walyjakajangka kujurringu. Ka nyinangulaju karrpungka kujungka.<sup>8</sup> Yungunarringu ka pakarnulaju puutja tatirnu yanu tawun Jijariyakarti. Tiputingulaju ka yanu Pilapuku mayangka jarrpangu nyinapayi. Jiilu Pilapulu Jijajmili wangka parra wajalpayi, julyjulu. Kuju nyinapayi palunya julyjuya-jananya yintalpayi japan wulikaja yirnakaja, Jarujalumungka. Jijajmili warrkamuya ngapira nyinapayi, wantikaja yirnaparnikajaya-jananya ngampurrju kanyilkura.<sup>9</sup> Pilapu palunya nyinapayi puu wulikaja yurrkanywinti, yurntalkajaraya, nyupaparniya nyinapayi. Paluka-jaluya parra wajalpayi, Mamamili wangka.<sup>10</sup> Karrpu yupaljalaju mayangka palungka nyinapayi. Palunyangka Yakapajpa Mamamili wangka jakurlpurluka parna Juutiyanurni yankupayi, ka mayangka warinykatingu jarrpangu.<sup>11</sup> Palunyajantu Puulmili nanpa tikamturnu, kayilapangku mara kujarra tayimapurnu, jina kujarralurrju. Jilanya-jananya wajarnu, yirna Yakapajju, “Nanpakura ngaaku walyja jilanyayuruya tayimapulku Juwukajalu, Jarujalumja, kayilapaya katiku yungku Juwuparnikajangka. Jilanyarni Mamamililu Kuurtilu nintirnu.”<sup>12</sup> Palunyangkalaju kulirnu kalajulu Puulja pertu wajarnu, mirta yankuraku Jaru-

jalumukutu. <sup>13</sup> Palunyangka-lanyaju wajarnu, “Mirtajunyurra yulama!, kunyjunyurna Jarujalumkartı yanku. Mayitpirniya tayimapulku, mayitpirniya pungku mitu. Kunyjunyurnara Jijajku yanku miturriku, jumajirnara wulu walyja nyinaku.” <sup>14</sup> Purtulaju wajarnu yumurringu. Kalaju wajarnu, “Nyamunta Mamalu ngampurrju kanyilku.”

<sup>15</sup> Palujanulaju Puulmapulu wartakaja manuka tawun Jarujalumkartı jinangu yanu. Ngayullurrjurna Luukpa kujungkalaju yanu <sup>16</sup> Karlkinju Jijariyamartajilu-lanyajuya katingu mayakarti. Kutungkalaju Majankurnungka mayangka nyinapayi. Julyju nyinapayi Jayipurijja, Jijajkura nyinapayi. <sup>17</sup> Yanulaju tawun Jarujalumkartı jarrpangu. Palunyangka-lampajukuya Jijajmili walyjakaja, pukurlarringu.

### *Jayimijalu wangkangu Puulpa*

<sup>18</sup> Yungunpa-lanyaju Puulju katingu Jayimijjalaju nyakuraku. Palungkaya nyinapayi, Jaajipurluka maajakajalurrju. <sup>19</sup> Puulju-janampa pukurlarringuka, jakurljunu-jananya jilanya, “Mamalurni ngampurrju kanyilpayi, Juwuparningkarna-jananya nintilpayi Jijajmili wangka. Laltuluya kulirnu kaya Jijajmili walyjarringu.” Jilanyalu-jananya rawalu jakurljulpayi. <sup>20</sup> Palunyangkaya kulirnu Puulpa, kaya Mama marninypungkupayi. Kaluya Puulja wajarnu jilanya, “Juwukajaya laltu ngaamartaji Jijajmili wangka kulira, kaya Jijajmili walyjarringu nyininpa. Juwukurnu luwulurrjuya kulira walyja

nyininpa. <sup>21</sup> Jakurlpaya kulirnu jilanya, ‘Puulju-jananya Juwuparnikaja ngurrangka nintilpayi. Palungka-jananya nintilpayi, Juwukaja ngurra tiwapurlukakaja, Muujajkurnu luwuya junkuraku. Nintijulpayi-jananya mirtaya-jananya jijikaja julijulikaja yirnamalkuraku, mirtaya Muujajkurnu luwu wanalkuraku.’” <sup>22</sup> Yarrarnuya Puulja Jaajpurlukakajalu wajarnu, “Juwukajaluntaya ngaamartajilu kulikku nyuntun yanurni. Nyuntukuya wirriliyi nyininpa. Wanyjalmalkula?”

<sup>23</sup> Yarrarnuya Puulja Jaajpurlukakajalu wajarnu, “Kulirninpala junta jilanyan nyuntulu ngapilku. Kangku-jananyan puu wulikaja Jijajmili walyjakaja, ngaamartaji jaaji majukarti. Julyjuya Mamangkaluya jamartapungu jungaya nyinakija. Kuwarriya yanku nyaku-jananya yatilyju, Muujajkurnu luwuya wanarni.

<sup>24</sup> Nyuntu-jananyan kujungka yanku ka mirtayirti payamula yuwa-jananyan!, yatilypa yungkuraku. Palunyajanu-ngkuya jii puu wulikajalu kata katapungkuraku, jilanya Muujajkurnu luwu nyininpa. Jilanyan nyuntu nyinaku jaajingka Muujajkurnu luwu wanalku, Juwukajaluntaya nyuntu nyakura pukurlarriba. Jilanyaya kulikku, mirtan pakiwana nyininpa, Muujajkurnun luwu nyuntulu wanarni.”

<sup>25</sup> Palunyangka Jayimijmapulu-janampa yarrarnu wajarnu, “Tiwamartajipurlukakulaju-janampa Juwuparnikajaku七月 juylju kurtingu mirlimirli, Jijajmilikajaku. Wakarnulaju jilanya, ‘Mirtayirtiya yunginpa Mamayuru kujupaku. Mirtanyurra mirtayirti jilanya ngalkuranpa.

Mirtanyurra mijikaja jikilkuraku. Kamu mirtanyurra kuka miji ngalkuraku, miji yintira ngalkuraku. Kanyurra mirta nyupa kujupangka ngarririraku, kujupakurnungka.’”

<sup>26</sup> Karrpu kujupangka Puulju-jananya katingu jaajikarti majukarti puu wulikaja. Kujungkaya palungka turlkungka nyinangu, jaajingka. Ka yatilyalu Puulju yanu wajarnu, wiikingka ku-jungkaya mirtayirti yungkuraku.

### *Jaajingkaya Puulpa manu*

<sup>27</sup> Wiikingka palungka pakirrinyangka, Puulpaya nyangu jaajingka majungka, Juwukajalu, parna Yayijamartajilu. Parna Yayijamarta-jiluya nyangukaya jakurljunu Puulpa karlkinja Juwukajangka, Jarujalumumartijingka. Palun-yangkaya wirrilyirringuraya martukaja, kaya ngalurnu kanyilpayi jaaji majungka. <sup>28</sup> Jilanyaya wangkangu, “Juwukajaluya kulila! Ngaalu-jananya Puulju parna parlparriwana ninti-julpayi martukaja, ka Juwukaja-lanya minyji-lypa warningu, jaaji majulurrjukamu Muuja-jmili luwu. Palulu-jananya kuwarri Kiriki wangkawinti, Juwuparnikaja katingu jaaji majungka jarrpajunu. Wiyala-jananya jarrpajunin ngaangka Kiriki wangkawinti, Juwuparnikaja, paki, jumaji Mamakura ngarnawarrapurlukaku ngurra.” <sup>29</sup> Kujungkapula yankupayi Puulkamu Turupimajja Yipajajmartaji, Kiriki wangkaw-inti. Mirtapula yanu jarrpangu jaaji majungka. Palunyayuru kararnuya kaya Puulku wirrilyir-ringu.

<sup>30</sup> Jilanyaya kulirnu kaya wirrilyiwinti kujungkarringu pinirringu manu Puulpa, kaya yilarlu yawujayiti katingu jaaji majuwartajanu, kaya kiituya jatamapurnu.

<sup>31</sup> Palunyangkaya martukajalu Puulpa pungkukijalu mitu, kaluya karlkin kujupalu yanuya-jananya jakurljunu jantulwintikajangka, Ruumanmartajingka. Jilanyaya-jananya jakurljunu,

“Jarujalummartajilu-ngkuya pungkuninpa.” <sup>32</sup> Kulirnukaya pinirringu

Ruumanpurluka maaja, jantulwintikajalurru. Yanuya-jananya ngarlkilmalpayi martukaja. Jantulwintikajaya-jananya nyangu kaya Puulpa junu, pungkuparnilu. <sup>33</sup> Jantulwintikajaku-

janampa maajalu wajarnu, ka yanupula jantulwinti kujarralu Puulpa winirnu, ka mara kujarrapula tayimapurnu, jiinwintilu. Palunyangka-jananya maajalu martukaja japistnu, “Ngana ngaa martu? Nyaa ngapirnu?” <sup>34</sup> Karlkiluya wangka kuju wajalpayi, karlkin kujupaluya wangka kujupa wajalpayi. Palunyangka-jananya

maajalu purtu kulirnu. Ka wajarnu-jananya jantulwintikajaku kangkurakuya Puulpa, jantulwintikajaku mayakarti. <sup>35</sup> Palujanuya jinangu Puulpa jantulwintikajalu katingu. Kaya jantulwintikajangka mayangka tuungka kintirrinya Puulpaya jarlirnu katingu, jumajiya martukajalu pungkujaku, wirrilyiwintilu-minyirri. <sup>36</sup> Jampaya jantulwintikajalu katipayi,

palunyangkaya martukaja wanarnukaya mirrapayi, “Pungkuralaju mitu junkura!”

*Martukajangka-jananya wirrilyiwintingka Puulpa wangkangu*

<sup>37</sup> Palunyangkaya mayangka jarrpajulkijalu, kalu wajarnu Puulju maajangka jilanya, “Japilkurnanta?” Kara maajalu wajarnu, “Nyunturan Kiriki wangkaku ninti?” Kayilapa Puulju yuujunu. <sup>38</sup> Maajalura yarrarnu wajarnuka, “Kulirnurna, Yijipimartajilu-jananya kuwarri kujungkanu-jananya maaja majukaja kapamankaja pungkukijalu. Jurtawartakajajananya kujungkanu pujimankarti kangu, laltuminyirri, puu jawujun. Kajin nyuntu maaja palukajaku?” <sup>39</sup> Palunyangka Puulju wajarnu, “Paki. Ngayurna parna Jilijiyyamartaji, tawun Taajajmartaji, Juwurna nyininpa, tawunpaju Taajajpa nyininpa, maju. Ngayurna-janampa maaja nyininpa. Kajirna-jananya wangkaku?, martukajangka ngaakajangka?” <sup>40</sup> Palunyangka maajalura Puulku yuujunu. Puulpa-jananya tuwungka ngururrpa ngarnawarra wangkangu, martukajangka. Ka marrkurnu-jananya maralu yakarrikuraya. Palunyangkaya yakarringu jananya wangkangu, Yipuru wangka.

## 22

<sup>1</sup> Yikingu-jananya Puulju jilanya wajarnu, “Walyjakajalurniya kulinma, ngayungka wangka!”

<sup>2</sup> Puulju-jananya Yipuru wangkalu wajarnu. Kulirnukaya yakarringu. Jilanya-jananya yarrarnu wajarnu, <sup>3</sup> “Ngayurna Juwu yikininpa karna Jilijiyyamartaji, tawun Taajajpaju ngayuku ngurra. Jijirna Jarujalumja yanurni nyinapayi ka majurringurna. Nintipukalurni yirnalu

Kamayilalu nintirnu, kuulja. Pukurrakajamilirni nintilpayi, luwu rawalu. Palunyangkarnara Mamaku ngarnawarrapurlukaku nintilu kulini. Mamakuranyurra nintilu kulini, palunyangkarnara nyuntuyuru ninti nyininpa.

<sup>4</sup> Julyjurna-jananya Jiijamili walyjakaja wululu mankupayi. Parlanyparna-janampa nyinapayi wajalpayirna-janampa, ngayumili warrkamupurlukakajaluya-jananya mitu pungkura. Winirarna-jananya katipayi jiilkarti, yirnakajakamu wantikaja. <sup>5</sup> Ngayulurna-jananya jilanyalu mankupayi, kajuya yatilypa, maaja majukamu kanjulukaja ninti nyininpa. Jiikajalurniya mirlimirli yungu, katirarna-jananya nintilkura, Juwukaja Tamajakajmartaji, Jiijamili walyjakajarna-jananya mankuraku. Palunyajantu tawun Tamajakajkartirna yanu Jiijamili walyjakajarna-jananya mankuraku, jiirmuntulkuraku ka Jarujalumkartirna-jananya kangkuraku, jiiljaya jarrparaku.

### *Puulju-jananya jakurljulpayi*

<sup>6</sup> “Tawun Tamajakajkartirna yanu kintirringu, jirntu kutuwarti. Palunyangkarni layiti maju yikingu, ngarnawarrajantu.

<sup>7</sup> Parnangkarna punkarnu karna wangka kulirnu jilanya, ‘Juulpawu! Juulpawu! Kulilarni! Nyaakujun jurtarringu?, pungkukija-jananyan ngayumili walyjakaja.’ <sup>8</sup> Kulirnukarna wajarnu, ‘Ngana nyuntu maaja wangkinpa?’ Wajarnuju, ‘Ngayurna Jiijamila Najarijmartaji, nyuntujun jurtarripayi.’ <sup>9</sup> Ngayuku walyjakajajuya kujungka yankupayi, palunyangkaya layiti

majuwarta nyangu. Mirtaya wangka palunyalu kulirnu, ngayulurna kujulu. <sup>10</sup> Wajarnurna, ‘Maaja! Wanyjalmalkurna?’ Wajarnurni, ‘Pakala!, tawun Tamajakajkarti yarra kurruwa! Palunyangkanta kujupalu nintilku, nyaan ngapilkuraku.’ <sup>11</sup> Pakarnurna pertu nyakupayi, kururna pampururringu. Layiti palunyalurni kuru pampururnu. Palunyangkarniya mara winirnu katingu tawun palukarti.

<sup>12</sup> “Tawun palunyangka Yananayajpa nyinapayi, Juwukurnu luwukura ninti palu nyinapayi, junga. Juwukajaluya palumartajilu wajalpayi, ‘Yananayajpa yirna kunyjunyu.’ <sup>13</sup> Palunyarni yanu ngaranguka Yananayajju wajarnu, ‘Juulpa! Ngayukujun walyja. Kuru kunyjunyurri!’ Pipurrulurna kunyjunyulu nyakupayi. <sup>14</sup> Wajarnurni, ‘Mamalunta julyju yintarnu wangkangungku nyuntuku, palumili wangkan parra wajalkuranpa. Mamalunta yintarnu, layitin nyangu, palunyangka Jiijajmili wangkan kulikuraku. Kayilan kulirnu yiltaminyirri Jiijajpanta wangkapayi, ruutungka. <sup>15</sup> Palunyangkan Jiijajmili wangka parra wajanmalpa, jumajin kulirnu Jiijajpa yiltaminyirri, wangkangunta.’ <sup>16</sup> Yananayajjurni yarrarnu wajarnu, ‘Nyamu pakala!, ka kalyungka jarrpa! Maaja Jiijajpa japila!, walyukajangku warningkura.’”

<sup>17</sup> Puulju-jananya martukajangka jantulwintikajangkalurru-jananya mayangka, ngarnawarralu yarrarnu wajarnu, <sup>18</sup> “Jarujalumkartirna marlaku yanu, ka Juwukurnu jaaji majuwartangkarnalu

Mamangka wangkangu. Jiingkarna nyangu kapukurrilu Maaja ngarnawarrapurluka. Palunyalurni wajarnu, ‘Wala pakala yarra!, Jarujalumja ngaangka mirtaya nyuntumili wangka kulilku, jampa-janampan ngayukurnu wangka wajanyjan, paki.’<sup>19</sup> Puuljurna wajarnu, ‘Maaja! Nyuntuku walyjakajarna-jananya mankura pungkupayi, Juwukurnu jaaji kujupangkakamu jaaji kujupa kujupakajangka. Jiijarna-jananya katira junkupayi. Jaajpurluka maajakajajuya ninti nyininpa, Jarujalummartaji.<sup>20</sup> Nyuntumili wangka Tiipanju wajalpayi. Palunyangkaya pungu, ngayurna pukurlpa yikipayi. Kuurturniya warningkupayi, palunyaya yungkalkijalu. Ngayulurna pukurljurna-janampa kuurtukaja kanyilpayi.’<sup>21</sup> Palunyangkarni Maajalu Mamalu Puulja wajarnu, ‘Tawunpa ngaanya jurra yarra!, ka yarra-jananya Juwuparnikajangka jakurljurra!’”

<sup>22</sup> Yakaluya wululu kulilpayi Puulkurnu wangka, martukajalu. Palunyangkaya kulirnu jilanya, “Juwuparnikajangka-jananya jakurljulkijalu, Puulju” Karaya Puulku wirrilyirringu. Kaya wiltulu wajalpayi jilanya, “Jiinyala pungku junku, mirta palunya wanka nyinakura.”<sup>23</sup> Mirrapayiya ka parnalurrijuya warningkupayi ngarnkangka. Kaya kulujulurrju-ngkuya warlangkupayi, Puulku wirrilyiwintilu.<sup>24</sup> Jantulwintikajaku maajalu wajarnu-jananya winira katira Puulpa, mayangka yinjayiti. Ka maajalu purtu kulirnu, “Nyaakuya martukaja wirrilyirrini, Puulku? Mayitpirna pungkunyjangka

wajalkurni.” Ka maajalu-jananya wajarnu, jantulwintikajangka Puulpaya wiipuwintilu pungkuraku. <sup>25</sup> Pungkukijaluya wiipuwintilu manuya tayimapunu ngarajunu. Palunyangka jantulwinti kujungkalu Puulju wajarnu jilanya, “Ngayurna Ruumanpurluka. Kaji kulirninyurra kunyjunyu wiipuwintilurniya pungkura? Mayitirninyurra kuutja kurraryi katira ngarajunkura?”

<sup>26</sup> Jantulwintilu kulirnu Puulku wangka, palunyangka yanu jantulwinti maajangka wajarnu, “Yirna palu Ruumanpurluka ngarinpa, mirtala pungkura, junkurala!” <sup>27</sup> Palunyangka jiilu maajalu yanulu Puulja japiro, “Yiltan nyuntu Ruumanpurluka ngarinpa?” Puulju wajarnu, “Yuwa, yiltarna.” <sup>28</sup> Puuljalu wajarnu maajalu, “Ngayurna Ruumanpurluka, mirtaju ngayuku mama Ruumanmartaji nyinapayi, paki. Palunyangkarnara mani maju yungurnara Ruumanmartaji maaja maju. Palunyangkarni wajarnu, ‘Nyuntturnanta ngarajuni, yulta Ruumanpurluka.’” Puuljura wajarnu jilanya, “Ngayuku mama Ruumanmartaji nyinapayi, palunyangkarna ngayu Ruumanpurluka nyinani.” <sup>29</sup> Palunyangkaya jantulwintikajalu kulirnukaya Puulku ngurlurringu. Jilanyaya kulirnu, “Martu palunyalala tayimapunu jiinwintilu. Junkungarala jumaji Ruumanpurluka. Luwu-lampa nyininpa, mirtala-jananya Ruumanpurluka tayimapuni, mirta pungkuraku.” Palunyangkamaraya junu, pungkuparnilu. Maaja majulu palunyalu kulirnu ka ngurlurringu, jumaji Ruumanpurluka

kulirnu.

<sup>30</sup> Yaarlipalarringu palunyangka maajalulu palumili warrkamupurluka kurtingu, Puulja tikamatunkura jiinpa. Maaja jiilu wululu purtu kulipayi, “Nyaajanuraya wirrilyirringu?, ngaaku, Juwukaja?” Jantulwintikajaku maajalu-jananya wajarnu kujungkanu miitingku, Juwumili maajakaja, yatilykajakamu kanjulukaja. Maaja jiilu-jananya jilanya purtu japiro, “Nyaajanunyurra wirrilyirrini?, paluku pungkuraku.” Palujanu maaja jiilu-jananya Puulpa katingu yikijunu.

## 23

### *Puulpa maajakajangka wangkangu*

<sup>1</sup> Maajakajangka-jananya palukajangka Puulju yikinguka-jananya murlpirrju nyakupayi. Ka-jananya wajarnu, “Walyjakajaluya kulila! Mama ngarnawarrakurnara rawa junga nyinapayi, ka kuwarrirnara junga wulu nyinani. Jilanyarna ngayulu kulini.” <sup>2</sup> Wangka palunya kulirnuka maaja majulu, yatilyju wajarnulu Yananayajjulu, martu kujupangka, pungkuraku Puulpa yirranyuku. <sup>3</sup> Pungkunyjangka Puulpa palunyangkara yatily majuku wajarnu, “Nyuntun mayunyu. Mama ngarnawarralunta puntaju pungku. Nyuntun nyinani Muujakurnu luwungka ngayurnin jungalkijalu. Palunyangkan luwu palunya warlangu, wajarnu-jananyan pungkurakurniya.”

<sup>4</sup> Kinti yikipayi palunyangkalu Puulja wajarnu, “Mirtan kuru wajala maaja maju!, yatilypa, paki, Mama ngarnawarrapurlukalu maaja junu

ngaanya.”<sup>5</sup> Puulju wajarnu, “Ngurrpalurna kuru wajarnu, maaja majungka yatilyja, wajalparnilurna junkungara. Jilanya Mamamili wangka nyinani, ‘Martuluya mirta maaja maju kuru wajani.’”

<sup>6</sup> Puulju-jananya yintarnu, karlkinpaya nyinapayi Parajikajakamu karlkin kujupa Jaajmili maajakaja. Jaajmili maajakajaluya kulira nyinapayi, martuya mirta ngula wankarrini mitujanu. Puulju-janampa yarrarnu wajarnu, “Walyjakajalurniya kulila! Ngayukuju mama Paraji nyinapayi, palunyayururna ngayu Paraji nyinani. Ngayulurna kulini, Mama ngarnawarrapurlukalu-lanya ngula martukaja mitujanu wankanmalpa, palunyarna ngayulu kulini. Palunyangkamarrarniya ngayu ngaangka kangu yikijunu.”

<sup>7</sup> Kaya wangka jiinya kulirnuka-ngkuya ngaparrju warrkilpayi, Parajikajakamu Jaajmili maajakajalu. <sup>8</sup> Karlkin kujupaluya kulirnu, Jaajmili maajakajalu, mirtaya ngula martukaja mitujanu wankarriku. Wangka kujupalurrujya jilanya kulirnu, mirtaya wikarrukaja nyinin kamu malpukaja. Jilanyaya kulira nyinapayi, ka karlki kujupaluya Parajikajalu yulta kulira nyinapayi. <sup>9</sup> Wirrilyirringuya kaya Parajikajalu pakarnu wajarnu jilanya, “Ngayurtinjulaju kulini, yirna ngaanya Puulpa yikini, mirta walyukaja ngapirnu. Mayitpilu Kuurti ngaangka Puulja wangkangu, mayitpilu Mamamili wikarru wangkangu.”

<sup>10</sup> Palunyangka jurtalu-ngkuya warrkirnuka pungu. Puulpaya pungkujakungkamarra

palunyangka jantulwinti maajalu wajarnu-janampa, Puulpaya yankura winira katira marlaku, mayakarti, jantulwintikajalu. Jantulwintikajamili mayakartiya katingu junu. <sup>11</sup> Palungka mayangka mungajarra maaja Jiijajpa Puuljalu yutirringu wangkangu, “Mirtan ngurlurri! Nyuntun kunyjunyu wangka-jananyan wajarnu ngayumili, ngaangka Jarujalumja. Ngula-jananyan Ruumja yanku wajalku, jilanyalu.”

### *Puulpaya pungkukijalu wangkapayi*

<sup>12</sup> Yungun pakarnukaya Juwukaja kujungkarringu jaalpu wangkangu, Puulpaya pungkukijalu, mitu. Jilanyaluya Mamangka wajarnu, “Kuwarrila Puulpa pungku mitu. Jilanyawiyajula kulini, mirtala mirrkaku kulini, kala palunyajanu mirrka ngalkukamu kalyu jikilku.” <sup>13</sup> Jilanyaya wajarnu, laltuluya puuti wulikajalu, pungkukijalu. <sup>14</sup> Palunyangkaya jurtawartakaja yanu maaja majukajakarti yatilykajakartikamu maaja yirnakajakarti. Yanuya-janampa jilanya wajarnu, “Ngayunjulaju Mamangka wajarnu, Puulpalaju kuwarri pungkukijalu. Mirtalaju kuwarri mirrka ngalkukamu kalyu jikilku, Puulpalaju mitu pungku, palunyajanulaju mirrka ngalkukamu kalyu jikilku. <sup>15</sup> Palunyangkaluyan jantulwintikajaku maaja majungkaluyan wangka kurtingkura. Jilanyaluyen wajalku, ‘Puulpaya winila katirni miitingkarti wangkakura!, ngayunjula kintilu japira kulilkura.’ Palunyangka Puulpaya katini

kutukarti ngayunjulaju pungkura junkura.” Jilanyaluya maajakajangka wajarnu.

<sup>16</sup> Puulku puuyilu, palumili jurtuku kajalu kulirnu wangka palunya, ka jantulkajamili mayangka yanulu jakurljunu Puulja. <sup>17</sup> Wangka palunya Puulju kulirnu ka jantulwintikura mirrangu. Palungkarni yanu kara Puulju japiro, “Kajin ngayuku puuyiju katiku, maaja majukarti?, wangka wajalkuralu.” <sup>18</sup> Jantulwintilu palunyalu Puulmili puysi katingu maaja majukartilu. Katingu yikijunu ka wajarnu, “Puuljurni wajarnu jilanya, murtilyarna ngaanya kangkura wangkarakunta.”

<sup>19</sup> Maaja majulu murtilya palunya yawujayiti katingu, martu kujupaluya kuliljaku. Ka japiro, “Nyaarnin wajalkijalu?”

<sup>20</sup> Murtilyalura wajarnu, “Juwukajaluya kujungkarringuya kulini nyuntuntaya jafilura, jilanyantaya yumulu jafilura Puulpayan katira yungunpa miitingkarti. Jilanyantaya kajalku, ‘Puulpaya katira miitingkarti, maajakajaluya kintilu japiro kulikuraku.’ <sup>21</sup> Mirtajananyan kulila!, karlki kujupaluya Puulpa jurtawartakajalu kutungka pungkujaku, martu puuti wulikajalu. Palunyakajaluya Mamangka ngarnawarrapurlukangka wajarnu, Puulpaya mitu pungkukijalu, palunyangkaya mirta mirrka ngalkukijalukamu kalyuya mirta jikilkuraku. Puulpa mitu ngarrinyjangkawiyajuya palujanu mirrka ngalkukamku kalyu jikilkku.” Murtilyalu yarrarnu wajarnu jilanya, “Karkkiluntaya jafilijalu majani.”

22 Jantulwintipurlukalu maajalu  
 murtilyangkalu wajarnu jilanya,  
 “Ngayungkarnin nyuntulu jakurljunu, mirtajananyan karlki kujupangka jakurljula!”  
 Palujanu murtilya palunya wajarnu kurtingu.

*Puulpa maajalu kurtingu, Pilikijkarti*

23 Maaja majulu palunyalu jantulwinti kujarraku-pulampa mirrangu ka wajarnu-pulampa, “Jantulwintikajaku-janampapula mirra!, yankurakurniya kujungkarrikura, tuu yantarta wulikajaku, kaya Puulpa tawun Jijariyakarti kangkura. Jilanyakulurrjupula mirra!, jantulwintikajaku, japanti wulikaja yawartawinti. Palunyangka karlki kujupakupula mirra!, jantulwintikajaku, tuu yantarta wulikajaku. Palunyakajapulan kujungkalku ka mungajarranyurra yanku, mirta kutuwatirni, kurranyi kurranyi. 24 Puulkulurrjuraya yawarta yupalpa marra!, kanyurra kintilu katiku, maaja Pilikijkarti, pungkujakungkamarrraya.”  
 25 Jantulwintimili maaja majulu, mirlimirli wakarnu jilanya,

26 “Ngayulurna Kulutiyaj Layijalu mirlimirli ngaanya wakarnu, nyuntukarti, maaja majukarti, Pilikijkarti. Kunyjunyun nyininpa?

27 Yirna ngaanyaya Puulpa Juwukajalu manu, mituya pungkukijalu. Ngayunjulaju jantulwintikajalu manu katingu, mituya pungkujakungkamarra. Karlkilurniya wajarnu palunya Ruumanmartaji, palunyangkarna yanu wankarnu, pungkujakungkamarrraya. 28 Purturna kulirnu, ‘Nyaapa ngaalu putamanu?’ Palunyangkarna

katingu ngarajunu, Juwumili kanjulukajangka, kulirarna nintirriraku.<sup>29</sup> Juwukajaluya palunya kuru wajarnu, jumaji Juwukurnu luwungka-jananya warrkilpayi. Mirtaya ngukarrinu ngulyulu mankupayikamu martu kujupa pungkupayi, paki, palujanurna pertu kulirnu, jiilja wulu kanyilkuraku. Mirta palunyaya mitu pungkukaraku, mirta walyku ngapirnu.<sup>30</sup> Martu kuju-palurni wajarnu, Juwukajaluya jaalpu wangkapayi, Puulpa mitu pungkukijaluya. Palun-yangkamarra ngayulurnanta pipurrulu kurt-ingkuni. Wajarnurna-jananya Juwukajangka kuutja wangkara nyuntumili tawunja, jiika-jaya yankura wangkara nyuntungka.” Wangka palunya mirlimirlingka wakarnu, Kulutiyajju, yungura maaja Pilikijkartilu kangkura yungku-raku.

<sup>31</sup> Palujanuya katingu Puulpa mungangka, tawun Yantipatirijikarti, maaja majulu wajany-jangka. <sup>32</sup> Yungunpaya tawun jiingka jantulwin-tikajaluya karlkinjuya junu yanu, kaya marlaku jinangu yanu, tawun Jarujalumkart. Karlkin kujupaluya Puulpa wululu katingu tawun Ji-jariyakarti, yawartawintikajalu. <sup>33</sup> Tawunja Ji-jariyangkaya jarrpangu karaya mirlimirli yungu, maaja majungka, Pilikijja. Maaja palun-yangkaluya Puulpa yikjunu. <sup>34</sup> Maaja palun-yalu mirlimirli riitamunu ka-jananya japiro, “Parna wanyjapurluka jiinya Puulpa?” Palun-yangkaluya wajarnu, “Puulpa parna Jilijiya-purluka.” Kulirnuka maaja Pilikijjulu wajarnu, Puulja, <sup>35</sup> “Karlkinkula-janampa majalku, nyuntuntaya kuru wajalku kuutja. Palunyangkarna

kulilku, nyuntumili wangka.” Palunyajanujanampa jiilu maajalu wajarnu, jantulwintikajaku, Puulpaya nyakura ngampurrju kanyilkura, Yirutmili mayangka, mirta jiilja. Yirutpa palunya maaja maju nyinapayi Pilikiju.

## 24

### *Puulpaya nyurnimanu*

<sup>1</sup> Palujanu payipu wulikajangka karrpungka yatilypa maaja maju Yananayajmapuya pakarnu tawun Jarujalumjanu, kaya jarrpangu tawun Jijariyangka. Kujungkaya pakarnu Yananayaj-pakamu maaja majukaja, Tatalajlurrju, Tatalajpa kuutja wangkapayi. Maaja Pilikij nyinapayi, palunyangkaya kuutja jarrpangu Puulpaya nyurnimankupayi. <sup>2</sup> Palunyangkara maaja Puulku mirrangu, yankura nyinakuraku. Kayila Tatalajpa pakarnu wangkangu jilanya,

“Nyuntun maaja yulta. Nyuntu-lampajun maaja ninti nyinapayi. Kunyjunyulu-lanyajun kanyilpayi, ngampurrju, palunyangka palyalaju nyinapayi, mirta-lanyajuya pungkupayi, karlkin kujupalu, paki. <sup>3</sup> Jilanya-lanyajun nyuntulu kunyjunyulu kanyilpayi, palunyalaju kulrnuka pukurlpa nyinin. <sup>4</sup> Palunyangkarnanta wangka juku wajalku, rawan nyuntu nyinajungkamarra, kulilku-lampajun kuju wangka juku. <sup>5</sup> Yirna ngaanya Puulpanga jurtawarta. Ngaalu-jananya Juwukaja wangkara jaarramul-payi, parna parlparriwanalu. Ngaa-janampa

maaja Jijajmili walyjakajaku. Jijajpa Najarij-martaji ngaa marninypungkura nyinapayi, pakiwana. <sup>6-7</sup> Ngaalu Puulju martu kuju, Juwuparni katingu Juwuku jaaji majungka jarrpajulkija. Mirtaya Juwuparni jaaji jiingka jarrpinpa, paki, Juwukajawiyajulaju jarrpinpa. Palunyangkalaju Puulpa winirnu manu, jumaji jaaji-lampaju jinya walykurrijaku. <sup>8</sup> Japilalu Puulpa!, nintirrikuyilaran wangkaku palumiliku. Nyuntuyilan kuliklu, ngayukurnuju wangka junga nyinin.” <sup>9</sup> Palunyangka Juwu karlkin kujupaluya kulirnuka wajarnu, “Tatalajpa ngaa junga wangkipa.”

### *Puulpalu Pilikija wangkangu*

<sup>10</sup> Maaja Pilikijura mara wangkangura nintirnulu Puulja, wangkakuraku. Palunyangka Puulju wajarnu, “Pukurlarrinparnangku nyuntuku. Nyuntu-lampajun maaja maju nyinapayi, rawa, kuutpurluka. <sup>11</sup> Wiiki kujarrangkarna tawun Jarujalumungkarna jarrpangu nyinapayi, Mama ngarnawarrapurlukarna marninypungkupayi. <sup>12</sup> Kunyjunyurna nyinapayi mirtarna-jananya warrkilpayi, jaaji majungkakamu Juwukurnu jaaji kujupangka, paki, mirtarna-jananya jaarramulpayi, Jarujalumungka, paki. <sup>13</sup> Wangka palunyaya Juwukajalu paki wajarnu. Wangka yiltayuruya wajarnu. Wajala-jananya!, jungalurniya wajalkura. <sup>14</sup> Wangka jilanyawiyajuya yulta wajarnu, ngayulurna Mama ngarnawarrapurluka marninypungkupayi, Jijajpalurrjurna wanpalpayi. Jilanyaya Juwukajalu kulirni,

ngayulurna pakiwana Jijajpa wanarni. Muujajkurnu luwurna ngayulu kujungkalu kulira wanalpayi. Luwu kujupalurrju Mamamili jakurlpurlukakamuluya mitunyjarrilu mirlimirlingka junkupayi julyju, kulirarna ngayulu wanalpayi. <sup>15</sup> Kujungkalaju Juwukajalu ngaanju kulira nyinapayi jilanya, Mama ngarnawarrapurlukalu-lanya martukaja mitujuanu ngula wankalku ka kuutja-lanya wajalku, palumili walyjakajakamu walykukajalurrju. <sup>16</sup> Palunyangkarnara Mamaku junga nyininpakamu, martukajakulurrjurna junga nyininpa.”

<sup>17</sup> Puulju-janampa yarrarnu wajarnu, “Tawun kujupa kujupangkarna yarngangka yiyyangka nyinapayi. Jarujalumkartirna yanurni jarrpangu, ngayuku martukaja walyjakaja mani yungkurakukamu mirtayirti yungkuraku, Mama ngarnawarrapurlukaku. <sup>18</sup> Mamakurnara jaaji majungka mirtayirti kangkura yungkupayi, nyakupayirniya Juwukajalu Palunyangkarna-jananya mirta warrkilpayi, kujurna palungka nyinapayi, mirtalaju yarrrnnga nyinapayi. <sup>19</sup> Karlkin kujupalurniya nyangu Jaajingka palungka Juwukajalu, parna Yayijamartajilu. Palunyakajaluya yanurni wajalngara ngaangka kuutja, jamparna walyku ngapinnbara. <sup>20</sup> Ngaakajangkarna-jananya Juwukajangka wangkangu kuutja Jarujalumungka. Jiikajaluntaya wajalkura jamparna walyku ngapinu. <sup>21</sup> Mayitpintaya jiikajalu wangka kuju wajalku, jilanyarna-jananya wajarnu, ‘Ngaangkarna-nyurranya

yikini jumajirna ngayulu kulini, “Mitukajaya ngula wankarriku.” ”

<sup>22</sup> Wangka palunya kulirnu ka maaja Pilikijju-janampa wajarnu, “Ngularna-nyurranya wituka kulilku, maaja Layijiyyajparni yanku.” Maaja Pilikijpa Jiijajmiliku wangkaku ninti nyinapayi. <sup>23</sup> Palunyangkalu kujungka jantulwinti maajangka wajarnu, Puulpaya kintilu ngampurru kangkura kanyilkura, mayangka. Palunyangka palya wajarnu Puulmiluya walyjakajalu yankura nyakura, ka mirrkalurrju, wartakamu yungkurakuraya.

### *Puulpa-pulanya Pilikijjakamu Turijilangka wangkangu*

<sup>24</sup> Ngulapula maaja Pilikijkamu palumili nyupa Turijila yanu jiilkarti Puulpa nyakukijalu. Maaja jiilura Puulku kurtingu palumili warrkamupurluka yankura mankuraku. Puuljupulanya Jiijajmili wangka wajalpayi. <sup>25</sup> Puuljupulanya wulu nintilpayi, martuluya Mamamili wangka kulilkura ka jungaya nyinakura, mirtaya walyjalu kulira nyinakura. Ngula Mamalu-jananya kuutjayuru kuru wajalku, martukaja yarnnga. Wangka palunya kulirnu ka ngurlurringu, Pilikijpa. Wajarnulu, “Nyamu, maa yarra!, ngularnangku mirraku.” <sup>26</sup> Pilikijju wangka kujupawana kulirnu, “Mayitpirni Puulju mani yungku, jamparna kurtingku.” Palunyangka Maaja jiilura wululu Puulku kurtingkupayi palumili warrkamupurluka yankura mankuraku, wangkakuraku. Wululu wangkara kulipayi, “Mayitpi Puuljurni mani

yungku.”<sup>27</sup> Wulu Puulpa nyinapayi tawun Jijariyangka, yiiya kujarrangka. Pilikiju Puulpa jiilja wululu kanyirnu, Juwukaja-jananya pukurlmankuraku. Palujanu maaja kujupa Pujiyaj Pijaj nyinapayi.

## 25

### *Puulju japijirnu maaja Yukajajjura kulilkura*

<sup>1</sup> Tawun Jijariyakarti maaja Pujiyaj Pijajja yanurni jarrpangu, maaja-janampa palu nyinakijalu. Yupal wulikajangka karrpungka nyinangu ka tawun Jarujalumukarti yanu.

<sup>2-3</sup> Puulpaya walyku jakurljunu, maaja Pijajja, Juwuku maajakajalukamu, yatily majukajalu. Palunyangka maaja Pijajjaluya wajarnu, Puulpaya Jarujalumukarti katira, kuutja ngarajunkuraku. Jaalpuya julyju yaka wangkangu, Puulpaya kutungka pungkukijalu.

<sup>4</sup> Maaja Pijajju-janampa wajarnu, “Puulpaya wululu kanyilkura tawun Jijariyangka. Ngularna marlaku yanku tawun palukarti.<sup>5</sup> Palunyangka kujungkala yanku kuutkartijiikarti wangkaraku. Jiingkanyurra nyunturtinju kuru wajalku, mayitpi walyku ngapinyjangka, Puulju.”

<sup>6</sup> Maaja Pijajpa Jarujalumja nyinangu wiiki kujungka, palunyangka marlaku yanu tawun Jijariyakarti, Juwukajalurrju. Palunyangka yungunarringu ka kuutja jarrpangu nyinapayi, ka wajarnu Puulpa kangkurakurni.<sup>7</sup> Juwukajaya

jiingga kuutja nyinapayi, Puulparni yanu. Palunyangkaya Juwukajalu kuru wajarnu, kuutja jilanya, wangka pakiwana yiltayuru parra wajalpayi. Mirtaya katingu kurulu nyakunyjanjanulu junga wajalkuraku, pakiya wajalpayi.

<sup>8</sup> Palujanu Puulju wajarnu jilanya, “Mirtarna ngayulu minyjilypa junkupayi Juwukajaku luwu. Mirtarna-janampa jaaji maju minyjilypa junu. Mirtarna maaja maju yini Yukajajpa minyjilymunu, Ruumanmartajiku maaja, paki.”

<sup>9</sup> Palunyajanu maaja Pijajju kulirnu, Juwukaja-jananya pukurlmankuraku. Ka japijnura Puulpa jilanya, “Kunyjunyun kulini?, jantulwintikajaluntaya Jarujalumkartikangkura marlaku, kuutjarnin ngayungka wangkaraku.” <sup>10</sup> Palujanu Puulju wajarnu, “Kunyjunyurna yikini maaja Yukajajjkurnu kuutja ngaangka. Ngaangkarninyurra kuru wajalkura. Mirtarna-jananya Jarujalumungka Juwukaja walykumanu, jiikuran nyuntu ninti nyinani. <sup>11</sup> Mayitpirna walyku ngapinyangka palunyangkarninyurra mitu pungku. Pakiwanarniya Juwukajalu kuru wajarni, palunyangka mirtarnin Jarujalumukarti kurtiwa, Juwukajakarti!, paki. Ngayulurnanta japijni maaja Yukajajjarna kuutja yanku wangkakura.” <sup>12</sup> Maaja Pijajju kulirnuka yanu-jananya wangkapayi, palumili warrkamupurlukakajangka. Palujanulu yanu Puulja wajarnu, “Japirnurnin Maaja Yukajajjan wangkakuraku. Nyamurnanta ngayulu kurtingku.”

*Pijajju maaja Yakiripangka jakurljunu Puulku*

<sup>13</sup> Palujanu ngulapula maaja Yakiri-papula Punija paluku jurtu, yanupula Jijariyakarti, maaja Pijajpapula nyakuraku.

<sup>14</sup> Karrpupararakungkapula palungka nyinapayi. Palujanu Pijajjulu maaja Yakiripangka jakurljunu Puulpa jilanya, “Yirna kuju Puulpa wulu nyinapayi, jiilja ngaangka, kuwarri wulu nyininpa, mirta maaja Pilikiju palunya kurtingu.

<sup>15</sup> Julyjurna Jarujalumukarti yanu. Palujanurniya yatily majukajalu Puulpa ngukarrinu, yirnakajalulurrju. Wajarnurniya Puulju julyju walyku ngapirnu. Palunyajanurniya wajarnu Puulpaya mitu pungkuraku, Juwukajalu.

<sup>16</sup> Wajarnurnajananya jilanya, ‘Ruumanmartajilulaju mirta punginpa, kurraryilulaju kuutja murrarnilu kangkura yikijunin, mirtalaju-jananya karlkin kujupa yungkunin, pungkurakuya.’ Wajarnurnajananya kuutjawiyajuya kuru wajalkura, jumaji Puulpa puntaju wangkakura.

<sup>17</sup> “Palujanu Juwukajaya yanurni ka pipurrurna yanu kuutja nyinapayi. Karnara Puulku mirrangu kangkurakurniya.

<sup>18</sup> Puulpa yanu yikipayi, palunyangka mirtaya ngukarrinu jii walykukaja ngapilpayi, mirtaya wajarnu palunyalu ngulyulu mankupayikamu martukajajananya pungkupayi, paki. Palunyayuru kakanurna kulilpayi.

<sup>19</sup> <sup>19</sup> Warrkirnuya jumaji Juwuku luwu walykumalpayi, ka warrkilpayi-

ngkuya Jijajjamarralurrju. Julyju Jijajpa jiinya miturringu, ka Jijajpa Puulju wajalpayi mitujanu wankarringu.”

<sup>20</sup> Maaja Pijajjulu

maaja Yakiripangka yarrarnu wajarnu jilanya, “Purturna ngayulu kulirnu, palunyangkarna Puulpa japidnu, wituka yankuraku kuutkartu, Jarujalumukarti, Juwukajaluya jiingga kuru wajalkuraku.”<sup>21</sup> Puuljurni japidnu, maaja Yukajajkartilu yankura kuutja wangkakura. Japidnurni ngaangkaya jantulwintikajalu ngampurrju kanyilkura, ngulalu maaja Yukajajkartu yankuraku. Ngayurnara yuujunu.”<sup>22</sup> Maaja Yakiripalulu wajarnu maaja Pijajja, “Ngayulurna kulilkura Puulpa.” Pijajju wajarnu, “Yuwa. Yungunpan kulikku.”

<sup>23</sup> Palujanu yungunpa maaja Yakiri-pakamupula paluku jurtu Punija jarrpangupula kulujungka kunyjunyungka, kapula yanu maajakarti. Jantulwintikajalu-pulanyaya katingu kintilu kuutkartu jarrpajunu. Kaya jantulkajamili maaja majukajalurru jarrpangu marlakarti, tawun Jijariyamartaji maajakajalurru. Palujanu maaja Pijajju wajarnu Puulpaya kangkurakurni.<sup>24</sup> Puulpa yanu yikingu ka maaja Pijajju wajarnu jilanya, “Maaja Yakiripa, kulila, karlkinjulurru! Nyawaya yirna ngaanya! Juwukajaluya ngaanya ngukarrinu walyku nyinapayi, Jarujalumumartajilukamu ngaamartajilu. Wiltulurniya wajalpayi ngaaya mitu pungkuraku.”<sup>25</sup> Ngayulurna ngaangka japidpayi rawalu, karna kulirni mirtaya ngaanya mitu pungkuraku, jumaji mirta walyku ngapirnu. Ngaalurni japidnu, Puulju maaja Yukajajkartilu yankura kuutja wangkakura. Palunyangkarna kurtingkura maaja Yukajajkartu.”<sup>26</sup> Purturna

kulini, ‘Yaalurnara mirlimirli wakalku?’ Mirlimiriraya maaja Yukajajkutu kangkura. Murrarnilulaju kurtingkuni mirlimirli maaja majukarti, kuutpurlukakarti, jampaya walyku ngapini. Ngaarnanta kangu Puulpa yikijunu, nyuntulun Yakiripalu Puulpa japilkura, ka kulilkurarna, palunyangkarna mayitpi walykukaja mirlimirlingka wakalku kurtingkura.<sup>27</sup> Ngayulurna purtu kulini Puulpa kurtingkuraku mirlimirliwinti. Purturna kulini nyaarnara wakalku, mirlimirlingka. Ngana walyku ngapirnu?’

## 26

### *Puulpalu maaja Yakiripangka kuutja wangkangu*

<sup>1</sup> Maaja Yakiripalulu Puulja wajarnu, “Nyamu wajala!” Puulju maralu yuujunu wangkakijalu. <sup>2</sup> Jilanya-jananya wajarnu, “Pukurlarrinparnangku nyuntuku maaja Yakiripaku, ngayukujun wangka kulilkuk. Wajalkurnanta Juwukajalurniya ngukarrini. <sup>3</sup> Ngayulurnanta kulini, nyunturan Juwumili luwuku ninti, murrarnilu-ngkuya warrkirninpa, palujanu japirotnanta ngayumili wangkan kintilu kulilkura.”

Puuljulu yarrarnu wajarnu maaja Yakiripangka, <sup>4</sup> “Ngayurna jiji nyinapayi ngayuku ngurra walyjangka. Palujanurna Jarujalumungka nyinapayi, jilanyakujuju Juwukaja ninti nyininpa. <sup>5</sup> Ngayurna julyju Juwumili luwukurna junga nyinapayi. Juwu

karlkinlurrjuya junga nyinapayi ka ngayurna jungaminyirri nyinapayi, Paraji. Yilta Parajikajalaju jungaminyirri nyinapayi jiiku, luwuku. Jilanyakuya Juwukaja nintijuya nyinipa, ngayurna Paraji nyinapayi. Kuutjaya jilanya julyju wajalngara.<sup>6</sup> Kuwarrirna yikini ngaangka jumajirna kulirni, martukajaya ngula mitujanu wanka pakalku. Jilanya Mama ngarnawarrapurlukalu-janampa jamartapungu mitunyjarriku.<sup>7</sup> Juwukajala walyjakaja tuwal wulikaja nyinipa. Jiikajala wangka palunya kulini, yilta Mamalu-lanya ngula mitujanu wankalku. Wangka jilanyala kulini ka Mamala marninypungkuni wululu. Maaja Yakiripa, kulilarni! Wangka jiinyarna kulirni, palunyangka Juwukajalurniya kuru wajalpayi.”<sup>8</sup> Yarrarnu Puulju-janampa wajarnu, “Nyaanyurra kulini?, Mamalu-jananya mirta ngula mitujanu wankalku?” Yiltanyurra kulinngara.

<sup>9</sup> “Ngayulurna julyju kulira nyinapayi jilanya, ‘Palyarna-jananya Jiijamili walyjakaja pungkura nyinapayi, Jiijamarna Najarijmartaji minyjilyjunkupayi.’<sup>10</sup> Palunyayururna kulipayi. Tawun Jarujalumungka Jiijamili walyjakajarna-jananya mankura jiilja jarrpajunkupayi, yatily majukajalurniya wajalpayi. Jiijamili walyjakajaya kuutjaya yikipayi, palunyangka ngayulurna-jananya kujungkalulaju maa-jakajalulurrju, wajalpayi mituya-jananya pungkuraku, Jiijamili walyjakaja.<sup>11</sup> Juwumili jaajikajangkarna-jananya parra yankura mankupayi, karna-jananya jiilkarti katipayi,

Jijajmili walyjakaja. Marrkulpayirna-jananya mirtaya Jijajpa marninypungkura, karna-janampa wirrilyirripayi. Tiwarna yankupayi tawun kujupatu tawun kujupakuturna-jananya wanara mankupayi, wirrilyiwintilu. <sup>12</sup> Jilanyakurna tawun Tamajakajkartirna yanu, yatily majukajalurniya wajarnu yiayarnu.”

*Jijajpa kulirnu Puulju ka kuutja jakurljunu*

<sup>13</sup> Palunyangkalu Puulju wajarnu maaja Yakiri-pangka jilanya, “Maaja kulilarni! Ngayurna tawun jiikarti Tamajakajkartirna yankupayi. Kintirrinyjalurna nyangu, layiti maju, karrpungka, rantarnu-lanyaju yiltaminyirri, ngarnawarra-janu, jirntuyuru. <sup>14</sup> Parnangkalaju punkarnu ngarripayi. Kulirnurna Yipuru wangkawintilurni wajarnu jilanya, ‘Juulpa! Juulpa! Nyaaku-jun jurtarringu, ngayumili walyjakaja-jananyan pungkuninpa. Mirtan kulirnin walyjalungkun pungkuninpa.’ <sup>15</sup> Palujanu ngayulurna wajarnu, ‘Maaja nganan nyuntu wangkinpa?’ Maajalurni wajarnu, ‘Ngayurna Jijajpa, nyuntu-jun jurtarinpa. <sup>16</sup> Pakala yiki!, nyuntujun ngayuku warrkamupurluka nyinaku. Nyuntulu-jananyan yanku wajalku martukajangka, kuwar-rirnin ngayu nyangu. Parra wajalku-jananyan ngayumili wangka. Wangka kujuparnanta nintilku ngula, wangka jiilurrju-jananyan parra wajalku. <sup>17</sup> Ngayulurnanta ngampurru kany-ilku Juwukajangkamarra-kamu Juwuparningka-marra. Jiikajakartirnanta Juwuparnikajakarti kurtingku, ngayumilin wangka parra wajalkura. <sup>18</sup> Nintinmalpa-jananyan jiikaja Mamakuraya

ngurrpa nyinajakukamu, malpuku maajakuraya nyinajaku. Nintinmalpa-jananyan Mamakuraya junga nyinakura. Ngayurniya Jijajpa kulilku, palujanu Mamalu-jananya walykukaja warningku, palujanuya nyinakura Mamaku walyjakaja.’”

<sup>19</sup> Puuljulu yarrarnu wajarnu maaja Yakiripangka, “Maaja, kulila! Wangka jilanyarna ruutungka kulirnu junga, ka mirtarna kulirnu junu. <sup>20</sup> Jungalurna-jananya yanu nintilpayi, Tamajakajmartaji. Palujanurna yanu Jarujalumungkarna-jananya nintilpayi, parna Juutiyawanalurrju. Palujanurna yanu ngurra kujupakajangka Juwuparningkalurrju nintilpayi. Jilanyarna-jananya wulikaja nintilpayi, ‘Walykuya jurra jungaya nyina Mamaku! Kunyjunyu-janamppanyurra nyinakura, martu karlkinku.’ <sup>21</sup> Jilanyarna-jananya parra wajalpayi, palujanurniya Juwukajalu manu mitu pungkukijalu, Jarujalumungka, jaaji majungka. <sup>22</sup> Mamalurni wululu murlpirrmaninpa, palunyangka kuwarrirna-nyurranya wajarninpa, ngurluparnilu maajakajangkakamu martukajangka. Mirtarna-jananya wangka kujupa parra wajalpayi, Muujajmili wangkakamu Mamamili jakurlpurlukakajaku wangkarna parra wajalpayi. <sup>23</sup> Jiikajaluya Muujajjulurrjuya wajalpayi jilanya, ‘Kurayijpa yiltaya pungku mitu, ka pakalku wanka. Palunya kurraryi mitujuanu pakalku, palunyayuruwa palumili walyjakaja ngula pakalku, mitujuanu. Yilta Kurayijpa wankarriku ka-jananya wajalku

palumili wangkaya kulilkura martulu,  
 kaya wanka wulu nyinakura. Jilanya-  
 jananya wajalku, Juwukajangkakamu  
 Juwuparnikajangka.”

<sup>24</sup> Puulju jiinya wangka wajalpayi ka  
 maaja Pijajju wajarnu wiltulu jilanya,  
 “Puulpa! Nyuntun ngakumpa, Mirlimirlin  
 nyuntulu wululu nyakura ngakumparrinin.”

<sup>25</sup> Puuljulu wajarnu maajangka, “Jungarna  
 wajarni, mirtarna ngakumpa. Jungalurnanta  
 wajarninpa.” Palujanu Puuljulu yarrarnu  
 wajarnu maaja Yakiripangka, <sup>26</sup> “Yakiripa!  
 Nyuntun wangkakuran palunyaku ninti  
 nyininpa, palunyangkarnanta murlpirrju  
 wajarni. Nyuntulu-jananyan kulilpayi  
 jakurlpurlukakajangka palunyaya wajalpayi,  
 jamparniya manu kanyilpayi.” <sup>27</sup> Maaja  
 Yakiripara japiro, “Kaji-jananyan kulini  
 wangka?, jakurlpurlukakajaluya julyju  
 Mamamili wangkaya wajalpayi. Nintirnangku,  
 yiltan nyuntulu Mamamili wangka palunya  
 kulini.” <sup>28</sup> Maaja Yakiripalura wajarnu,  
 “Mirtarna Jiijamili walyjarriku, pipurru  
 kuwarri. Pakiwanan kulini nyuntulu.”

<sup>29</sup> Puuljura wajarnu, “Ngayulurna kulini  
 nyuntun Jiijamili walyja nyinakura, mayiti  
 kuwarri, mayitpi ngula. Karlkin kujupalurrjuya  
 ngaangka nyininpa, Jiijamili walyjaya  
 nyinakura. Ngayuyukunyurra nyinakura  
 Jiijamili, jirnmuntuparni. Jilanyakurna Mama  
 japijku.”

<sup>30</sup> Palujanuya maaja Yakiripakamu Pijajpa,  
 Punijalurrjuyila pakarnu yanu, karlkin ku-

jupalurrjuya. <sup>31</sup> Pakaraya yawujayiti yanu, kaya wajalpayi, “Jiinya yirna Puulpa mirta walykukaja ngapirnu. Palunyangka mirta ji-ilja nyinakurakamu, mirtaya mitu pungkura.” <sup>32</sup> Maaja Yakiripalulu wajarnu Pijajja, “Yirna jiilunta Puulju julyju japiro, maajaminyir-ringkalu yankura wangkakura, kuutja, maaja yini Yukajajja. Jilanyanta mirta japiro kali kuwarri kurtingkungara. Nyamu, maaja Yukajkartili kuwarri kurtingku.”

## 27

### *Puulpa tawunu Ruumkarti yankukijalu*

<sup>1</sup> Parna Yitalikartiya Puulpa kurtingkuraku wajarnu, maaja majukarti yini Yukajajkarti. Puulpayia kujungka katingu yungu, maaja Juliyajja, karlki kujupalurrjuya jiirnmuntu. Juliyajpa jii maaja maju-janampa jantulwintikajaku. Martukajaluya wajalpayi jii jantulwintikajaya yini, “Maaja Yukajajmapu”. <sup>2</sup> Ngayurna-jananya Luukpa kujungkarringu Puulmapungka, kalaju yanu puutja tatirnu tawun Yaturamitityamja. Puutpa jiinya yankupayi parna Yayijkartia. Takarnulaju kujungka yanu Yarajakajpa, parna Majatuniyamartaji. Palukura ngurra Jijaluniya. <sup>3</sup> Yanulaju mungajarrringu. Palujanulaju yanu tawun Jayitanja ka yungunpalaju jarrpangu. Palujanu maaja Juliyajjulu nyarrurringu Puulja wajarnu, yankura-jananya nyakuraku, palumili walyjakaja, mayitpi yungkurakuraya wartakajakamu, mirrkakaja. <sup>4</sup> Palujanulaju puutja tatirnu yanu. Wangaljamarralaju

yanu yirritingka parna Jayipurijwana  
wuungkuwana.<sup>5</sup> Parna Jilijiyawananakamu parna  
Pampiliyawanalaju yirritiwana yanu tawun  
Marangka warinykatingu, parna Lajiyangka.

<sup>6</sup> Jantulwinti maajalu tiputingu yanu ngur-  
rirnu manu, kujupa puutu, parna Yitalikarti  
ngarapayi. Puutu palu tawun Yalikijanta-  
janu yankupayi. Maaja palulu marlakurringu-  
lanyaju manu kalaju tatirnu. <sup>7</sup> Kintilaju yanu  
karrpuparakungka, wangalkarti. Palujanulaju  
tawun Jintajja yitiwana yanu, ka parna Ku-  
uritiwanalaju wuungkuwana yanu, wangalja-  
marra. Yanurranpalaju parna Jalamanwana.  
<sup>8</sup> Parna yirritiwanalaju wulu kinti yankupayi  
parna kutu kujarrangka. Palunyangka jiingka  
wuungkungkalaju jarrpangu puutpa ngarajunu.  
Wuungku palunya yini ‘Piyipan’ ngarapayi.  
Palunyangka kinti tawun Lajiya ngarapayi.

<sup>9</sup> Jiingka wuungkungkalajura wulu majal-  
payi, jumaji wangalpa majuwarta wangka-  
payi. Wululaju majalpayi palujanu wan-  
tajarrakijalu. Murrarniluya puutpurlukalu  
kulilpayi, wuungkungkaya puutwinti majala,  
wangalpa ngula julirrinyjangkaya yankura ka-  
lyuwana. <sup>10</sup> Palujanu Puulju-jananya mar-  
rkurnu jilanya, “Majalkurala ngulala yankura,  
jumaji wangalju-langku majulu yungkaljaku,  
palunyangka warlangku-lampa puutu, wartaka-  
jalurrju pakirrijaku, martukajalurrju.” Jilanya-  
jananya purtu marrkurnu. <sup>11</sup> Jantulwintiku  
maajalu Puulja ngangkurnu junu, ka-pulanya  
maaja kujupa kujarra kulirnu, puutku maa-  
jakamu puut walyajarra. <sup>12</sup> Puutku war-

rkamupurlukakajaluya jilanya wajarnu, “Mir-tala wulu ngaangka wuungkungka nyinakija, wangalju majulu-langku yungkaljaku, jumaji wuungku julijuli. Palyala mayitpi kuwarri yanku tawun Pinikijkarti. Jiingkalaju kunyjunyu wantajarra nyinamalpa, wuungkuwana.” Tawun jiinya parna Kuuritingka nyinapayi.

*Wangal majulu-jananya yungkalpayi,  
puutkurlu*

<sup>13</sup> Wangal ngapartijanu kinti wangkapayi, palunyangkaya kulirnu, “Kunyjunyurringu, yankurala tawun Pinikijkarti.” Yayinpa jiinkurluya warrkamupurlukalu yilalpayi, kalyujanu, ka puutungka junu. Yayin palunyaya julyju warningu kalyungka puutpalampaju ngalulkura. Maalaju yanu kalyu majuwartangka parna Kuuritingka yirritingka.

<sup>14</sup> Yankupayilaju palunyangka wangal majulu-lanyaju yungkalpayi. Wangal palunyaya wajalpayi yini ‘Kayilikarta’. <sup>15</sup> Purtulaju kayili yanu, wangal majulu-lanyaju yungkalpayi. Palunyangkaya puutu marlakurnu kalanyaju wangalju yurntura wanalpayi, marlaku. <sup>16</sup> Murrarniluya puut majukajalu puutpa jukujukukaja yilarninpa, ruupwintilu. Ngapartilaju wulu yankupayi parna Kuutangka wuungkuwana. Wuungkuwanalaju yanu ka puutpa julijulilaju ruupuwintilu yilalpayi, marlakarti, kalaju takajunu karrpirnu junu puutungka, punkaljaku. <sup>17</sup> Palujanu puutku warrkamupurlukaluya ruupuwintilu puutpa maju kultuwana karrpirnu ka tayimapurnu.

Ka witukaya ruupu kujupawintilu kultuwana karrpirnu ka tayimapurnu. Ka witukaya ruupu kujupawintiluya kultuwana karrpirnu ka tayimapurnu. Jilanyaya karrpirnu, jumaji wangalju yungkara yaarrpungkujaku, kayila kurrunkujakulu kalyu, ka puutu jarrpajuljaku, kaninyjarra kalyungka. Kalikiya karrpirnu tipujunu, wangalju yungkaljakungkamarra, jumajiya ngurlulu jilanya kulirnu, “Mayitpi kaliki maju-lampa wangalju yungkaljaku, ka parnakarti-lampa yurntulku kangku, parna Lipiyakarti. Jiingka-lampa mayitpi warlangku puutpa.”<sup>18</sup> Kurluwa majulu-lanyaju pungkupayi, kaya karrpu kujupangka wartakajakamu mirrkakajaya puutpurlkakajalu warningkupayi, kalyungka, jumaji parliljaku puutpa ka jarrpajaku.<sup>19</sup> Palujanu karrpu kujupangkaya warningkupayi ruupukajakamu puutmili wartakaja.<sup>20</sup> Kurluwalu majulu-lanyaju pungkupayi wululu. Ka puutu ngaa wangalju majulu yurntulpayi. Purtulajura jirntukukamu kurtalyakajaku nyakupayi karrpuparaku karrpuparakungka. Purtulaju kulilpayi, “Yiltalaju wankaparni nyinaraku, jumaji-lanyaju kurluwalu majulu pungkuninpa, pungkura-lanyaju kalyungka mitu jarrpajulkija.”

<sup>21</sup> Puutpurlukakajaluya warrkamurringu rawa ngalkuparnilu. Ka-janampa Puulju wajarnu, “Yirnakaja! Kulinnigararninyurra ngayungka julyjurna wajalpayi, parna Kuuritingkala nyinangara wuungkungka.<sup>22</sup> Wajarninparna-nyurranya kuwarri murlpirrpaya nyinama, pukurlpa! Mirtala miturriku, mirtala kalyungka

kurrungrku, wankala nyinamalpa, ngaanya puutuwiyaju-lampa warlangku kalyungka jarrpaku. <sup>23</sup> Mama ngarnawarrapurlukaju ngayuku maaja nyininpa, palunyarna marninypungkuni. Palunyalurni mungajarra palumili wikarru kurtingu. <sup>24</sup> Jiilurni yutirringuka wajarnurni jilanya, ‘Puulpa. Ngurluparni nyinama!, yiltaminyirrin nyuntu maaja Yukajajja yikiku, Ruummartajingka. Palujanurna-jananya kujupakaja puutungka kalyungkamarra wankalkurna-jananya, wulikaja.’ <sup>25-26</sup> Yirnakaja! Ngarnkajanulurni, Mamamili wikarrulu wangka jilanya wajarnu, palujanu murlpirrpaya nyina!, ngayulurna kulirni Mamamili wangka yiltarriku. Wangal majulu-lanya katiku parnakarti.”

<sup>27</sup> Wiiki kujarrangkalaju puutungka yankupayi wuungkujanu tawunu Pinikijjanu, kurluwalu-lanyaju wululu pungkupayi. Kalyu jiinyaya yini wajalpayi, ‘Mititiriniyanpa.’ Palunyangkaya kutuwartini kulirnu puutpurlukakajalu, parna ngamurringu. <sup>28</sup> Palujanuya ruupu yapuwinti warningu kalyungka, parnakuya pampulkuraku, mayitpi ngamurrini. Yilaranya ruupu palunya, kaya miijaramunuya parnaku. Yanuya kaya wirrupungu marlaku ruupu kalyungka, ka marlakuya yilarnu miijaramunu, parna ngamurripayi. <sup>29</sup> Kulirnuya ngurlurringu, “Mayitpi puutulu yapukaja pungkujaku.” Palujanuya ji-inpa yayinkurluya puu wulikaja warningu putja marlakarti, parnangka ngalulkuraku putpa. Palujanuya Mamangkaluya japiro, jirttuya nyakuraku. <sup>30</sup> Puutpurlukakajaluya Pu-

utu japuwarta kalyungka tipujunu. Kajarnuya-jananya, “Yayinpa jiinwintilaju kurraryi katikija, puutukarti.” Jilanyaya-jananya kajarnu ngaampaya puutungka japuwartangka yankukija parnatu. <sup>31</sup> Jiikaja-jananya nyangu Puulju ka jantulwintikajangka maajangkalurru jakurljunu jilanya, “Jiinyaya puutpurlukakaja nyinaraku pututja ngaangka, warrkamurrira. Mirtaya parnakutu yankuraku. Pakingkangala wulikaja miturriku.” <sup>32</sup> Palujanuya jantulwintikajaluya puutmili ruupu katupungu yiayarnu, jaalpu yanu martuparni.

<sup>33-34</sup> Yaarlipalangka Puulju-jananya marrkurnu wajarnu, “Mirrkaya ngala!, wiiki kujarrangkanyurra wulu mirrkaparni yankupayi. Palujanuya mirrka ngala! Mirrkanyurra ngalku kanyurra kurrrurnpa murlpirrarriku. Mirtanyurra ngurlurriira, murlpirrpanyurra nyinakura. Mirtanyurra miturriku, paki, kumurlparninyurra yanku.” <sup>35</sup> Puulju palu wajarnu ka mirrka manu, ka Mamangkalu wangkangu marninypungu, ngalanguyila. Nyanguya wulikajalu, <sup>36</sup> kulirnukaya pukurlarringu kaya wulikajalu ngalangu. <sup>37</sup> Jiingkalaju martu yarnnga nyinapayi, wulikaja jiirri yantartayuru. <sup>38</sup> Mirrkaya wulikajalu ngalangu kaya karlkinpa mirrka wilykikaja warningu puutjanu kalyungka, jumaji purtulyarrijaku puutpa.

### *Kalyulu puutpa warlangu*

<sup>39</sup> Jirntu pakanyjangka, puutpurlukakajaluya purtu parna yintalpayi. Jiingkaya nyangu karru

majuwarta ngarripayi, kaya jilanya kulirnu, “Karru jiikutula puutpa katiku, ka jiingka par-nangkala yikijunku.” <sup>40</sup> Palunyangkaya jiinpa yayinwintikaja katupungu kaya junu yanu. Pu-utungka marlakarti warta yikipayi, puutpaya tarnamulkurakuranpa. Palunyaya julyju ru-upuwintilu karrpirnu. Ruupukajaya palukaja katupungu, puutpaya tarnamulkuraku. Kaya kaliki yikijunu wangalju yungkalkura ka yurn-tulkuraku, karrukartiya palukarti yankukijalu. <sup>41</sup> Yankuraya parnangka jarrpangu, mirtaya nyangu kalyungka ngururr ngarripayi. Puutu kurraryikarti parnalu ngalurnu ka marlakarti kalyulu yurnturnu yurnturnu warlangu.

<sup>42</sup> Palujanu jantulwintikajaya wangkangu jaalpu jirnmuntukajaya-jananya pungkuraku mitu, kalyungkaya jarrpara parnakarti yankura kaya kuku pinirrijaku. <sup>43</sup> Jantulwinti maajalu-jananya marrkurnu mirtaya-jananya pungkuraku, Puulpalurrjuya pungkujakungkamarra. Maaja jiilu-jananya wajarnu, “Martukajayan nintikaja kalyuku jarrparaku, kurraryiyan parnakarti yankura, <sup>44</sup> ka karlkin kujupayan kalyuku ngurrpa, marlayan tiputiku puutmili wartakaja ngalulku ka yanku.” Palujanulaju martukaja wulikaja yanu parnakarti, wankalaju wulikajangulyu.

## 28

### *Parna Multangkaya nyinapayi.*

<sup>1</sup> Parnangkalaju palungka yanu nyinapayi. Palunyamartajilu-lanyajuya nintilpayi jilanya,

“Parna ngaanya yini Multa.” <sup>2</sup> Palunyamartajilu-lanyajuya nyangu walyjarringu, kalyulu pungkupayi, kayilalaju yaltarringu. Nyarrurringu-lampajukuya ka waru-lampajukuya kangurni kujarnu, ka warungkalaju yikingu junpurrarringu. <sup>3</sup> Puulju warukaja yanu manu kangu kujungka junu, jumaji warukaja kampangu japurringu. Warungka palungka kaninyjarra jila ngarripayi, ka pakarnu Puulpa pajarnu. Mara pajarnuka wulungulyu kanyilpayi. <sup>4</sup> Martukajaluya jiimartajilu nyanguka-ngkuya wajarnu, “Mayitpi martu kuju pungu mitu ngaalu, kalyungka miturringara. Ngaanya kalyujanu wankarringu, kuwarringa miturringara jilajanu.” Jilanyaya murrarnilu kulilpayi, “Jilalu-lanya nintini, palunyangkala kulirninpa, ngaalu julyju martu mitu pungu.” <sup>5</sup> Puulju marajanungku yurrijingarnu, ka jila warungka warningu, palunyangka wulu ngarntaparni yikipayi. <sup>6</sup> Jiimartajiluya purtu majalpayi, nyaarta Puulpa punkalkura mitu. Mirta juurlaparringu. Purtuya majarnu kaya kulirnu, “Ngaanga ngarkajantu, marturringu ka ngarinpa.”

<sup>7</sup> Palunyamartajiku-janampa maaja yini Papiliyajpa nyinapayi. Paluku kaatanmayakamu maya ngamu yikipayi. Maaja jiilu-lanyajuju wajarnu palumili mayakartilaju yankura nyinakura. Juingkalaju nyinapayi yupalja ngurrangka, ngampurrju-lanyajuju kanyilpayi. <sup>8</sup> Palumili mama ngarnta ngarripayi, parltiparliti ngarripayi, jurninyirri. Puulpalu yanu mayangka palungka jarrpangu ka

marangku junu, ka kunyjunyurringu palumili mama. <sup>9-11</sup> Palunyangka kunyjunyurrinya jakurlpaya kulirnu, ka ngarnta kujupakajaluya Puulkarti yanu. Pampurnu-jananya kaya kunyjunyurringu. Wululu-lanyajuya wartakaja yungkupayi.

### *Ruumkutuya yanu*

Puutu kujupa jiingka yikipayi wantajarrangka rawa, puutu palunya Yalikijantaramartaji. Puutu jiinyaya yini wajalpayi, 'Kurtararra ngarnkajanu.' Multangkalaju wirlarra yupalja nyinapayi. Kalaju puutja jiingka tatilkijalu, ka-lanyajuya jiimartajilu pukurlwintilu mirrkakajakamu kukakajalurrju kangu puutja junu, yirnilu. Kalaju tatirnu yanu. <sup>12-13</sup> Kalyuwanalaju yanu tawun Jarakurujangka warinykatingu. Tawun jiingkalaju karrpu yupalja nyinapayi, ka puutjalaju wulu yanu tawun Riiiyamakarti. Yungunpa wangalpa ngapartikarti wangkapayi, palunyangkalaju yanu karrpu kujarrangka tawun Putiyulingka warinykatingu. <sup>14</sup> Tawun jiingkalaju tiputtingu yanu kalaju-jananya kujungkarringu, Jiijajmili walyjakajangka. Jiingka-lanyajuya japirnu kujungkalaju wiikingka nyinaraku, palujanulaju jiingkalaju nyinapayi. Palujanulaju yanu tawun Ruumkarti yankukija. <sup>15</sup> Jiijajku walyjakajaluya kulirnu Ruummartajilu kaya yanu tuumaya yupalwana kujungkarringu-lanyajuya, tawun Yapipurumangka. Puulju-jananya nyangu ka pukurlarringu-janampa, Mama ngarnawarrapurluka marninypungu.

*Ruumja-jananya Puulju nintilpayi*

<sup>16</sup> Yanulaju tawun Ruumja warinykatingu. Puulpa mirta jiilja nyinapayi, maya kujupangka jaalpu nyinapayi, jantulwintilu kujulu ngampurrju kanyilpayi. <sup>17</sup> Karrpu yupalja nyinapayi, palujanu Puulju-janampa wangka kurtingu, Juwukajaku, maajakajaku, yankurakurniya kujungkarriraku. Jiingkaya mayangka kujungkarringu, ka-jananya Puulju jilanya wajarnu, “Ngayuku walyjakaja. Ngayulurna mirta walyku ngapirnu. Mitunyjarrikurna-janampa luwu mirta putamanu, mirtarna Juwu kujupa nganarnpungu, paki. Pakikurniya jiingkamarra winirnu Jarujalumja. Jii jantulwinti maajalurni kuutja yikijunu, Ruumanpurlukangka maajangka. <sup>18</sup> Maaja jiilurni kulirnuka wajarnu kurtingkurakurni. Jilanya wajarnu, ‘Puulju mirta puta walykumanu. Mirtaya Puulpa mitu pungkuraku, kunyjunyu yankuraku.’ <sup>19</sup> Juwukajaluya Jarujalumumartajilu kulirnu, karniya wulu jankapayi. Palujanurna ngayulu japijnu maaja Yukajajkartu yankuraku, ngayumili wangka kulilkuraku. Maajangka jiingkarnalu mirta wajalkijalu, jiikajarna-jananya Juwukaja nyurnimankukija, jumajijuya ngayuku walyja. Kunyjunyurna jiinparni nyinakijalu wajalku maaja jiingka. <sup>20</sup> Wangka jilanyanyurra kulilkurakurna-nyurrampa wangkapurluka kurtingu. Juwukajalara majarni Kurayiju, Mama ngarnawarrapurlukalulampa Kurayij jiinya julyju jamartapungu, kurtingkukijalu. Kurayij jiikurnara junga

nyininpa, palunyangkamarrarniya jiinamunu. Kuwarri wulurna jiinwinti nyininpa.”

<sup>21</sup> Palujanuya Juwukajalu Ruummartajilu wajarnu jilanya “Mirtalaju mirlimirli manu Juutiyanu, nyuntumili. Mirtaya martukaja yanurni Juutiyanu wajalkurakuya, nyuntulun puta ngapirnu, paki. <sup>22</sup> Nyuntumili wangkala-junta kulilkura. Jakurlpalaju kulirnu Jiijajmili walyjakajaya-jananya nyurnimani, ngurra kujupakamu ngurra kujupawana.” <sup>23</sup> Jilanyaya wajarnu kujupangka karrpungkaya Puulpa kujungkarrira kulilkura. Jiingka jirntungkaya Puulku mayangka kujungkarringu, martukaja yarnnga kulilkurakuya. Puulju-jananya wululu nintilpayi ka mungajarrarringu. Nintilpayi-jananya Mamalu-jananya palumili walyjakaja ngampurrju kanyini. Yarrarnu-jananya wajalpayi jilanya, “Jiijajpa yilta Kurayijpa nyininpa, Mamalu七月 jāmartapungu kurtingkukijalu.” Jilanya-jananya Puulju jakurljulpayi, Muujajju wajalpayikamu Mamamili jakurlpurlukululur-rijuya wajalpayi, jilanya Kurayijpa yiltangulyu ngula nyinaku.

<sup>24</sup> Puulmili wangkaya karlkinju kulirnu, ka karlkin kujupaluya mirta kulirnu, kulirnuya junu. <sup>25-29</sup> Puulju-jananya wajarnu mitunyjaripurlukamili Yayijayamili wangka jilanya, “Jungalu Mamamili Kuurtelu-jananya wajarnu, mitunyjarringka, wangka jilanya. Yayijayalu七月 mirlimirlingka wakarnu,

‘Martu ngaakajangka-jananya yarra wajala! Ngangkulkunyurra kuranju, palujanunyurra purtu jungalu kulikku. Nyakunyurra

kurulu, palujanunyurra purtu yintalku. Yapuyurunyurra nyinaku purtunyurra jungalu Mamamili wangka kulilku, Mamamili wangkanyurra kulilku junku. Mirtarninyurra kulira japirni walykukajarna-nyurrampa warningkuraku, paki, walykukajawintinyurra wulu nyinakijalu kulirni.’”

Jilanya Puulju-jananya wajarnu, palujanungkuya ngaparrju warrkilpayi. Yarrarnujananya wajarnu, “Kulilaya! Kuwarri, Mamalu kunyjunyu kulirni Juwuparnilu wangka jiinyaya kulilkura. Kurayijpa maaja maju nyininpa kulilkuya junga nyinaku. Walykukaja-jananya warningku, Mamalu, ngarnawarrapurlukalu.” Juwu jiikajaluya kulirnukaya ngurrakutu yanu.

<sup>30</sup> Puulpa tawun Ruumja nyinapayi wulu, yiyya kujarrangka. Maya kujupangka payamura nyinapayi. Jiikartiya martukaja yarnnga yankupayi, palunya nyakura kulilkija. <sup>31</sup> Nintilpayi-jananya martukajangka maaja Jiijaj Kurayijkurnu wangka, Mamalu-jananya ngampurru kanyilkuraku, palumili walyjakaja. Jungalu-jananya wululu nintilpayi, mirtaya maajakajalu marrkulpayi.

**Mamamili Wangka  
Portions of the Holy Bible in the Martu Wangka  
language of Australia**

copyright © 1999 Bible Society of Australia

Language: Martu Wangka

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-21

---

PDF generated using Haiola and XeLaTeX on 11 Nov 2022 from source files dated 22 Nov 2019

4012452d-4a59-52ec-a42c-bdeca0ab4ea2